

飲酒二十首

余閒居寡懽，兼此夜已長。偶有名酒，無夕不飲。顧影獨盡，忽焉復醉。既醉之後，輒題數句。自娛。紙墨遂多，辭無銓次。聊命故人之書，以為懽笑爾。

衰榮無定在。彼此更共之。邵生瓜田中。寧似東陵時。寒暑有代謝。人道每如茲。達人解其會。逝將不復疑。忽與一觴酒。日夕懽相持。

【二】

積善云有報。夷叔在西山。善惡苟不應。何事立空言。九十行帶索。飢寒況當年。不賴固窮節。百世當誰傳。

【三】

道喪向千載。人人惜其情。有酒不肯飲。但願世閒名。所以貴我身。豈不在一生。一生復能幾。倏如流電驚。鼎鼎百年內。持此欲何成。

【四】

栖栖失羣鳥。日暮猶獨飛。徘徊無定止。夜夜聲轉悲。厲響思清晨。遠去何依依。因植孤生松。斂翮遙來歸。勁風無榮木。此蔭獨不衰。託身已得所。千載不相違。

【五】

結廬在人境。而無車馬喧。問君何能爾。心遠地自偏。採菊東籬下。悠然見南山。山氣日夕佳。飛鳥相與還。此中有真意。欲辨已忘言。

【六】

行止千萬端。誰知非與是。是非苟相形。雷同共譽毀。三季多此事。達士似不爾。咄咄俗中惡。且當從黃綺。

【七】

秋菊有佳色。裛露掇其英。汎此忘憂物。遠我遺世情。一觴雖獨進。杯盡壺自傾。日入羣動息。歸鳥趨林鳴。嘯傲東軒下。聊復得此生。

【八】

青松在東園。衆艸沒奇姿。凝霜殄異類。卓然見高枝。連林人不覺。獨樹衆乃奇。提壺挂寒柯。遠望時復爲。吾生夢幻閒。何事繼塵羈。

【九】

清晨聞叩門。倒裳往自開。問子爲誰歟。田父有好懷。壺漿遠見候。疑我與時乖。繼糲茅簷下。未足爲高栖。舉世皆尚同。願君汨其泥。深感父老言。稟氣寡所諧。紆轡誠可學。違己詎非迷。且共懽此飲。吾駕不可回。

【十】 在昔曾遠遊。直到東海隅。道路迴且長。風波阻中塗。此行誰使然。似爲飢所驅。傾身營一飽。少許優有餘。恐此非名計。息駕歸閒居。

【十一】 顏生稱爲仁。榮公言有道。屢空不獲年。長飢至於老。雖留身後名。一生亦枯槁。死去何所知。稱心固爲好。客養千金軀。臨化消其實。裸葬何必惡。人當解意表。

【十二】 長公會一仕。壯節忽失時。杜門不復出。終身與世辭。仲理歸大澤。高風始在茲。一往優當已。何爲復狐疑。去去當奚道。世俗久相欺。擺落悠悠談。請從余所之。

【十三】 有客常同止。趣捨邈異境。一士常獨醉。一夫終年醒。醒醉還相笑。發言各不領。規規一何愚。兀傲差若穎。寄言酣中客。日沒燭當秉。

【十四】 故人賞我趣。挈壺相與至。班荆坐松下。數斟已復醉。父老雜亂言。觴酌失行次。不覺知有我。安知物爲貴。悠悠迷所留。酒中有深味。

【十五】 貧居乏人工。灌木荒余宅。班班有翔鳥。寂寂無行跡。宇宙何悠悠。人生少至百。歲月相從過。鬢邊早已白。若不委窮達。素抱深可惜。

【十六】 少年罕人事。遊好在六經。行行向不惑。淹留遂無成。竟抱固窮節。飢寒飽所更。敵廬交悲風。荒艸沒前庭。被褐守長夜。晨雞不肯鳴。孟公不在茲。終以翳吾情。

【十七】 幽蘭生前庭。含薰待清風。清風脫然至。見別蕭艾中。行行失故路。任道或能通。覺悟當念還。烏盡廢良弓。

【十八】 子雲性嗜酒。家貧無由得。時賴好事人。載醪祛所惑。觴來爲之盡。是語無不塞。有時不肯言。豈不在伐國。仁者用其心。何嘗失顯默。

【十九】 疇昔苦長飢。投耒去學仕。將養不得節。凍餒固纏已。是時向立年。志意多所恥。遂盡介然分。拂衣歸田里。冉冉星氣流。亭亭復一紀。世路廓悠悠。楊朱所以止。

雖無揮金事。濁酒聊可恃。

【二十】

羲農去我久。舉世少復真。汲汲魯中叟。彌縫使其淳。鳳鳥雖不至。禮樂暫得新。洙泗輟微響。漂流逮狂秦。詩書復何罪。一朝成灰塵。區區諸老翁。爲事誠殷勤。如何絕世下。六籍無一親。終日馳車走。不見所問津。若復不快飲。空負頭上巾。但恨多謬誤。君當恕醉人。

止酒

居止次城邑。逍遙自閒止。坐止高蔭下。步止華門裏。好味止園葵。大懼止稚子。平生不止酒。止酒情無喜。暮止不能寢。晨止不能起。日日欲止之。營衛止不理。徒知止不樂。未知止利己。始覺止爲善。今朝真止矣。從此一止去。將止扶桑淡。清顏止宿容。奚止千萬祀。

述酒

儀狄造杜康潤色之

重離照南陸。鳴鳥聲相聞。秋草雖未黃。融風久已分。素礫晶脩渚。南嶽無餘雲。豫章抗高門。重華固靈墳。流淚抱中歎。傾耳聽司晨。神州獻嘉粟。西靈爲我馴。

諸梁董師旅。半勝喪其身。山陽歸下國。成名猶不勤。卜生善斯牧。安樂不爲君。平王去舊京。峽中納遺薰。雙陵甫云育。三趾顯奇文。王子愛清吹。日中翔河汾。朱公練九齒。閒居離世紛。峨峨西嶺內。偃息常所親。天容自永固。彭殤非等倫。

責子

白髮被兩鬢。肌膚不復實。雖有五男兒。總不好紙筆。阿舒已二八。懶惰固無匹。阿宣行志學。而不愛文術。雍端年十三。不識六與七。通子垂九齡。但覓梨與栗。天運苟如此。且進杯中物。

有會而作并序

舊穀既沒。新穀未登。頗爲老農。而值年災。日月尚悠。爲患未已。登歲之功。既不可希。朝夕所資。煙火裁通。旬日已來。始念飢乏。歲云夕矣。慨然永懷。今我不述。後生何聞哉。

弱年逢家乏。老至更長飢。菽麥實所羨。孰肯慕甘肥。怒如亞九飯。當暑厭寒衣。歲月將欲暮。如何辛苦悲。常善粥者心。深念蒙袂非。嗟來何足吝。徒沒空自遺。斯濫豈彼志。固窮夙所歸。餒也已矣夫。在昔余多師。

蜡日

風雪送餘運。無妨時已和。梅柳夾門植。一條有佳花。我唱爾言得。酒中適何多。

未能明多少。章山有奇歌。

四時

春水滿四澤。夏雲多奇峯。秋月揚明暉。冬嶺秀孤松。

陶淵明集卷四

詩五言

擬古九首

榮榮窗下蘭。密密堂前柳。初與君別時。不謂行當久。出門萬里客。中道逢嘉友。未言心先醉。不在接杯酒。蘭枯柳亦衰。遂令此言負。多謝諸少年。相知不忠厚。意氣傾人命。離隔復何有。

【二】

辭家夙嚴駕。當往至無終。問君今何行。非商復非戎。聞有田子泰。節義爲士雄。斯人久已死。鄉里習其風。生有高世名。既沒傳無窮。不學狂馳子。直在百年中。

【三】

仲春遘時雨。始雷發東隅。衆蟄各潛駭。草木縱橫舒。翩翩新來燕。雙雙入我廬。先巢故尚在。相將還舊居。自從分別來。門庭日荒蕪。我心固匪石。君情定何如。

【四】

迢迢百尺樓。分明望四荒。暮作歸雲宅。朝爲飛鳥堂。山河滿目中。平原獨茫茫。古時功名士。慷慨爭此場。一旦百歲後。相與還北邙。松柏爲人伐。高墳互低昂。頽基無遺主。游魂在何方。榮華誠足貴。亦復可憐傷。

【五】

東方有一士。被服常不完。三旬九遇食。十年著一冠。辛苦無此比。常有好看顏。我欲觀其人。晨去越河關。青松夾路生。白雲宿簷端。知我故來意。取琴爲我彈。上絃驚別鶴。下絃操孤鸞。願留就君住。從今至歲寒。

【六】

蒼蒼谷中蘭。冬夏常如茲。年年見霜雪。誰謂不知時。厭聞世上語。結友到臨淄。稷下多談士。指彼決吾疑。裝束既有日。已與家人辭。行行停出門。還坐更自思。不怨道里長。但畏人我欺。萬一不合意。永爲世笑嗤。伊懷難具道。爲君作此詩。

【七】

日暮天無雲。春風扇微和。佳人美清夜。達曙酣且歌。歌竟長歎息。持此感人多。皎皎雲間月。灼灼葉中華。豈無一時好。不久當如何。

【八】

少時壯且厲。撫劍獨行遊。誰言行遊近。張掖至幽州。飢食首陽薇。渴飲易水流。不見相知人。唯見古時邱。路邊兩高墳。伯牙與莊周。此士難再得。吾行欲何求。

【九】

種桑長江邊。三年望當採。枝條始欲茂。忽值山河改。柯葉自摧折。根株浮滄海。春蠶既無食。寒衣欲誰待。本不植高原。今日復何悔。

雜詩十二首

人生無根蒂。飄如陌上塵。分散逐風轉。此已非常身。落地為兄弟。何必骨肉親。得權當作樂。斗酒聚比鄰。盛年不重來。一日難再晨。及時當勉勵。歲月不待人。

【二】

白日淪西河。素月出東嶺。遙遙萬里輝。蕩蕩空中景。風來入房戶。夜中枕席冷。氣變悟時易。不眠知夕永。欲言無子和。揮杯勸孤影。日月擲人去。有志不獲聘。念此懷悲悽。終曉不能靜。

【三】

榮華難久居。盛衰不可量。昔爲三春菓。今作秋蓬房。嚴霜結野艸。枯悴未遑央。日月有環周。我去不再陽。眷眷往昔時。憶此斷人腸。

【四】

丈夫志四海。我願不知老。親戚共一處。子孫還相保。觴絃肆朝日。樽中酒不燥。緩帶盡懽娛。起晚眠常早。孰若當世士。冰炭滿懷抱。百年歸邱壟。用此空名道。

【五】

憶我少壯時。無樂自欣豫。猛志逸四海。騫翮思遠翥。在苒歲月頽。此心稍已去。值懽無復娛。每每多憂慮。氣力漸衰損。轉覺日不如。壑舟無須臾。引我不得住。前途當幾許。未知止泊處。古人惜寸陰。念此使人懼。

【六】

昔聞長者言。掩耳每不喜。奈何五十年。忽已親此事。求我盛年懽。一毫無復意。去去轉欲遠。此生豈再值。傾家時作樂。竟此歲月駛。有子不留金。何用身身置。

【七】

日月不肯遲。四時相催迫。寒風拂枯條。落葉掩長陌。弱質與運頽。玄髮早已白。

素標插人頭。前途漸就窄。家爲逆旅舍。我如當去客。去去欲何之。南山有舊宅。

【八】代畊本非望。所業在田桑。躬親未曾替。寒餒常精糲。豈期過滿腹。但願飽粳糧。御冬足大布。蠶絲以應陽。正爾不能得。哀哉亦可傷。人皆盡獲宜。拙生失其方。理也可奈何。且爲陶一觴。

【九】遙遙從羈役。一心處兩端。掩淚汎東逝。順流追時遷。日沒星與昴。勢翳西山巔。蕭條隔天涯。惆悵念常餐。慷慨思南歸。路遐無由緣。關梁難虧替。絕音寄斯篇。

【十】閉居執蕩志。時駛不可稽。驅役無停息。軒裳逝東崖。沈陰擬薰腐。寒氣激我懷。歲月有常御。我來淹已彌。慷慨憶綢繆。此情久已離。荏苒經十載。暫爲人所羈。庭宇翳餘木。倏忽日月虧。

【十一】我行未云遠。回顧慘風涼。春燕應節起。高飛拂塵梁。邊雁悲無所。代謝歸北鄉。離鷓鳴清池。涉暑經秋霜。愁人難爲辭。遙遙春夜長。

【十二】

嫋嫋松標崖。婉孌柔童子。年始三五閒。喬柯何可倚。養色含精氣。粲然有心理。

詠貧士七首

萬族各有託。孤雲獨無依。曖曖空中滅。何時見餘暉。朝霞開宿霧。衆鳥相與飛。遲遲出林翮。未夕復來歸。量力守故轍。豈不寒與饑。知音苟不存。已矣何所悲。

【一】

淒厲歲云暮。擁褐曝前軒。南圃無遺秀。枯條盈北園。傾壺絕餘瀝。闕竈不見煙。詩書塞座外。日昃不遑研。閒居非陳阮。竊有愠見言。何以慰吾懷。賴古多此賢。

【二】

榮叟老帶索。欣然方彈琴。原生納決履。清歌暢商音。重華去我久。貧士世相尋。敝襟不掩肘。藜藿常乏斟。豈忘襲輕裘。苟得非所欽。賜也徒能辯。乃不見吾心。

【三】

安貧守賤者。自古有黔婁。好爵吾不榮。厚饋吾不酬。一旦壽命盡。敝服仍不周。豈不知其極。非道故無憂。從來將千載。未復見斯儔。朝與仁義生。夕死復何求。

【四】

袁安困積雪。邈然不可干。阮公見錢入。即日棄其官。芻蕘有常溫。探宮足朝飧。豈不實辛苦。所懼非飢寒。貧富常交戰。道勝無戚顏。至德冠邦國。清節映西關。

【六】

仲蔚愛窮居。逸宅生蒿蓬。駭然絕交游。賦詩頗能工。舉世無知者。止有一劉龔。此士胡獨然。寔由罕所同。介焉安其業。所樂非窮通。人事固以拙。聊得長相從。

【七】

昔有黃子廉。彈冠佐名州。一朝辭吏歸。清貧略難儔。年饑感仁妻。泣涕向我流。丈夫雖有志。固為兒女憂。惠孫一晤歎。臆贈竟莫酬。誰云固窮難。邈哉此前修。

詠二疏

大象轉四時。功成者自去。信問衰周來。幾人得其趣。游目漢廷中。二疏復此舉。高囑返舊居。長揖儲君傅。餞送傾皇朝。華軒盈道路。離別情所悲。餘榮何足顧。事勝感行人。賢哉豈常譽。脈脈閭里情。所營非近務。促席延故老。揮觴道平素。問金終寄心。清言曉未悟。放棄樂餘年。逸恤身後慮。誰云其人亡。久而道彌著。

詠三良

彈冠乘通津。但懼時我遺。服勤盡歲月。常恐功愈微。中情謬獲露。遂為君所私。

出則陪文輿。入必侍丹帷。箴規嚮已從。計議初無虧。一朝長逝後。願言同此歸。厚恩固難忘。君命安可違。臨穴罔惟疑。投義志攸希。荆棘籠高墳。黃鳥聲正悲。良人不可贖。泫然沾我衣。

詠荆軻

燕丹善養士。志在報強嬴。招集百夫良。歲暮得荆卿。君子死知己。提劍出燕京。素驥鳴廣陌。慷慨送我行。雄髮指危冠。猛氣衝長纓。飲饒易水上。四座列羣英。漸離擊悲筑。宋意唱高聲。蕭蕭哀風逝。澹澹寒波生。商音變流涕。羽奏壯士驚。心知去不歸。且有後世名。登車何時顧。飛蓋入秦庭。凌厲越萬里。逶迤過千城。圖窮事自至。豪主正怔營。惜哉劍術疎。奇功遂不成。其人雖已沒。千載有餘情。

讀山海經十三首

孟夏草木長。遶屋樹扶疎。衆鳥欣有託。吾亦愛吾廬。既暝亦已種。時還讀我書。窮巷隔深轍。頗迴故人車。權言酌春酒。摘我園中蔬。微雨從東來。好風與之俱。汎覽周王傳。流觀山海圖。俯仰終宇宙。不樂復何如。

【二】

玉臺凌霞秀。王母怡妙顏。天地共俱生。不知幾何年。靈化無窮已。館宇非一山。

高酣發新謠。寧效俗中言。

【三】

迢遞槐江嶺。是謂元圃邱。西南望崑墟。光氣難與儔。亭亭明玕照。落落清瑤流。恨不及周穆。託乘一來遊。

【四】

丹木生何許。迺在崑山陽。黃花復朱實。食之壽命長。白玉凝素液。瑾瑜發奇光。豈伊君子寶。見重我軒黃。

【五】

翩翩三青鳥。毛色奇可憐。朝爲王母使。暮歸三危山。我欲因此鳥。具向王母言。在世無所須。唯酒與長年。

【六】

逍遙蕪皋上。杳然望扶木。洪柯百萬尋。森散覆陽谷。靈人侍丹池。朝朝爲日浴。神景一登天。何幽不見燭。

【七】

粲粲三珠樹。寄生赤水陰。亭亭凌風桂。八幹共成林。靈鳳撫雲舞。神鸞調玉音。

雖非世上寶。愛得王母心。

【八】

自古皆有歿。何人得靈長。不死復不老。萬歲如平常。赤泉給我飲。員邱足我糧。方與三辰游。壽考豈渠央。

【九】

夸父誕宏志。乃與日競走。俱至虞淵下。似若無勝負。神力既殊妙。傾河焉足有。餘迹寄鄧林。功竟在身後。

【十】

精衛銜微木。將以填滄海。刑天舞干戚。猛志固常在。同物既無慮。化去不復悔。徒設在昔心。良晨詎可待。

【十一】

巨猾肆威暴。欽鴟違帝旨。竄竄強能變。祖江遂獨死。明明上天鑒。爲惡不可履。長枯固已劇。鸚鵡豈足恃。

【十二】

鵝鵝見城邑。其國有放士。念彼懷王世。當時數來止。青邱有奇鳥。自言獨見爾。

本爲迷者生，不以喻君子。

【十三】

巖巖顯朝市，帝者慎用才。何以廢其鯨，重華爲之來。仲文獻誠言，姜公乃見猜。臨沒告飢渴，當復何及哉。

挽歌詩

有生必有死，早終非命促。昨暮同爲人，今旦在鬼錄。魂氣散何之，枯形寄空木。嬌兒索父啼，良友撫我哭。得失不復知，是非安能覺。千秋萬歲後，誰知榮與辱。但恨在世時，飲酒不得足。在昔無酒飲，今但湛空觴。春醪生浮蟻，何時甕能嘗。殺案盈我前，親舊哭我傍。欲語口無音，欲視眼無光。昔在高堂寢，今宿荒艸鄉。相送出門去，歸來夜未央。荒艸何茫茫，白楊亦蕭蕭。嚴霜九月中，送我出遠郊。四面無人居，高墳正嵯嶮。馬爲仰天鳴，風爲自蕭條。幽室一已閉，千年不復朝。賢達將奈何，向來相送人。各自還其家，親戚或餘悲。他人亦已歌，死去何所道。託體同山阿。

聯句

鳴雁乘風飛，去去當何極。念彼窮居士，如何不歎息。雖欲騰九萬，扶搖竟何力。

遠招王子喬，雲駕庶可飭。顧之願侶正徘徊，離離翔天側。霜露豈不切，務從忘愛翼。
高柯濯條幹，遠眺同天色。思絕慶未看，徒使生迷惑。

陶淵明集卷五

感士不遇賦并序

昔董仲舒作士不遇賦，司馬子長又爲之，余嘗以三餘之日，講習之暇，讀其文，慨然惆悵，夫履信思順，生人之善行，抱朴守靜，君子之篤素，自真風告逝，大偽斯興，閭閻懈廉退之節，市朝驅易進之心，懷正志道之士，或潛玉於當年，潔已清操之人，或歿世以徒勤，故夷皓有安歸之歎，三閭發已矣之哀，悲夫寓形百年，而瞬息已盡，立行之難，而一城莫賞，此古人所以染翰慷慨，屢伸而不能已者也，夫導達意氣，其惟文乎，撫卷躊躇，遂感而賦之，咨大塊之受氣，何斯人之獨靈，稟神智以藏照，秉三五而垂名，或擊壤以自憊，或大濟於蒼生，靡潛躍之非分，常傲然以稱情，世流浪而遂徂，物羣分以相形，密網裁而魚駭，安羅制而鳥驚，彼達人之善覺，乃逃祿而歸畊，山巖巖而懷影，川汪汪而藏聲，望軒唐而永歎，甘貧賤以辭榮。

淳源汨以長分，美惡作以異途，原百行之攸貴，莫爲善之可娛，奉上天之成命，師聖人之遺

書發忠孝於君親。生信義於鄉閭。推誠心而獲顯。不矯然而祈譽。嗟乎雷同毀異。物惡其上。妙算者謂迷。直道者云妄。坦至公而無猜。卒蒙恥以受謗。雖憤瓊而握蘭。徒芳潔而誰亮。

哀哉士之不遇。已不在炎帝帝魁之世。獨祇修以自勤。豈三省之或廢。庶進德以及時。時既至而不怠。無爰生之晤言。念張季之終蔽。感馮叟於郎署。賴魏守以納計。雖僅然於必知。亦苦心而曠歲。審夫市之無虎。眩三夫之獻說。悼賈傅之秀朗。紆遠轡於促界。悲董相之淵致。屢乘危而幸濟。感哲人之無偶。淚淋浪以灑袂。

承前王之清誨。曰天道之無親。澄得一以作鑒。恆輔善而佑仁。夷投老以長飢。回旱天而又貧。傷請車以備柳。悲茹薇而殞身。雖好學與行義。何死生之苦辛。疑報德之若茲。懼斯言之虛陳。

何曠世之無才。罕無路之不澀。伊古人之慷慨。病奇名之不立。廣結髮以從政。不愧賞於萬邑。屈雄志於戚豎。竟尺土之莫及。留誠信於身後。動衆人之悲泣。商盡規以拯弊。言始順而忠入。奚良辰之易傾。胡害勝其乃急。

蒼旻遐緬。人事無已。有感有味。時測其理。寧固窮以濟意。不委曲而累己。既軒冕之非榮。豈縑袍之爲恥。誠謬會以取拙。且欣然而歸止。擁孤襟以畢歲。謝良價於朝市。

閑情賦并序

初張衡作定情賦。蔡邕作靜情賦。檢逸辭而宗澹泊。始則蕩以思慮。而終歸閑正。將以抑流宕之邪心。諒有助於諷諫。綴文之士。奕代繼作。竝固觸類廣其辭義。余園閭多暇。復染翰爲之。雖文妙不足。庶不謬作者之意乎。

夫何瓊逸之令姿。獨曠世以秀羣。表傾城之艷色。期有德於傳聞。佩鳴玉以比潔。齊幽蘭以爭芬。澹柔情於俗內。負雅志於高雲。悲晨曠之易夕。感人生之長勤。同一盡於百年。何慷慨而愁殷。寒朱幘而正坐。汎清瑟以自欣。送纖指之餘好。攘皓袖之繽紛。瞬美目以流眄。含笑而不分。

曲調將半。景落西軒。悲商叩林。白雲依山。仰睇天路。俯促鳴絃。神儀嫵媚。舉止詳妍。激清音以感余。願接膝以交言。欲自往以結誓。懼冒禮之爲營。待鳳鳥以致辭。恐他人之我先。意惶惑而靡寧。魂須臾而九遷。

願在衣而爲領。承華首之餘芳。悲羅襟之宵離。怨秋夜之未央。願在裳而爲帶。束窈窕之纖身。嗟溫涼之異氣。或脫故而服新。願在髮而爲澤。刷玄鬢於頰肩。悲佳人之屢沐。從白水以枯煎。願在眉而爲黛。隨瞻視以閒揚。悲脂粉之尙鮮。或取毀於華妝。

願在莞而爲席。安弱體於三秋。悲文茵之代御。方經年而見求。願在絲而爲履。附素足以周

旋悲行止之有節。空委棄於床前。願在畫而爲影。當依形而西東。悲高樹之多蔭。慨有時而不同。願在夜而爲燭。照玉容於兩楹。悲扶桑之舒光。奄滅景而藏明。願在竹而爲扇。含凄颯於柔握。悲白露之晨零。願襟袖以緬邈。

願在木而爲桐。作膝上之鳴琴。悲樂極以哀來。終推我而輟音。考所願而必違。徒契契以苦心。擁勞情而罔訴。步容與於南林。栖木蘭之遺露。翳青松之餘陰。儻行行之有覲。交欣懼於中襟。竟寂寞而無見。獨悵想以空尋。

斂輕裾以復路。瞻夕陽而流歎。步徙倚以忘趣。色慘悽而矜顏。葉變變以去條。氣淒淒而就寒。日負影以借沒。月媚景於雲端。鳥悽聲以孤歸。獸索偶而不還。悼當年之晚暮。悵茲歲之欲殫。思宵夢以從之。神飄飄而不安。若憑舟之失棹。譬緣崖而無攀。

于時畢昂盈軒。北風淒淒。炯炯不寐。衆念徘徊。起攝帶以伺晨。繁霜祭於素階。雞斂翅而未鳴。笛流遠以清哀。始妙密以閑和。終寥亮而藏摧。意夫人在茲。託行雲以送懷。行雲逝而無語。時奄冉而就過。徒動思以自悲。終阻山而帶河。迎清風以祛累。寄弱志於歸波。尤蔓艸之爲會。誦邵南之餘歌。坦萬慮以存誠。愍遙情於八遐。

歸去來兮辭并序

余家貧。疇植不足。以自給。幼稚盈室。餼無儲粟。生生所資。未見其術。親故多勸余爲長吏。

脫然有懷。求之靡途。會有四方之事。諸侯以惠愛爲德。家叔以余貧苦。遂見用于小邑。于時風波未靜。心憚遠役。彭澤去家百里。公田之利。足以爲酒。故僇求之。及少日。眷然有歸與之情。何則。質性自然。非矯厲所得。飢凍雖切。違己交病。嘗從人事。皆口腹自役。於是恨然慷慨。深媿平生之志。猶望一稔。當微裳宵逝。尋程氏妹。喪于武昌。情在駿奔。自免去職。仲秋至冬。在官八十餘日。因事順心。命篇曰歸去來兮。乙巳歲十一月也。

歸去來兮。田園將蕪。胡不歸。既自以心爲形役。奚惆悵而獨悲。悟已往之不諫。知來者之可追。實迷塗其未遠。覺今是而昨非。舟搖搖以輕颺。風飄飄而吹衣。問征夫以前路。恨晨光之熹微。

乃瞻衡宇。載欣載奔。僮僕攬迎。稚子候門。三迳就荒。松菊猶存。攜幼入室。有酒盈樽。引壺觴以自酌。眴庭柯以怡顏。倚南窗以寄傲。審容膝之易安。園日涉以成趣。門雖設而常關。策扶老以流憩。時矯首而游觀。雲無心以出岫。鳥倦飛而知還。景翳翳以將入。撫孤松而盤桓。歸去來兮。請息交以絕遊。世與我而相遺。復覯言兮。焉求悅親戚之情話。樂琴書以消憂。農人告余以春及。將有事于西疇。或命巾車。或棹孤舟。既窈窕以尋壑。亦崎嶇而經丘。木欣欣以向榮。泉涓涓而始流。善萬物之得時。感吾生之行休。已矣乎。寓形宇內。復幾時。曷不委心任去留。

胡爲乎遠遑欲何之。富貴非吾願。帝鄉不可期。懷良辰以孤往。或植杖而耘耔。登東皋以舒嘯。臨清流而賦詩。聊乘化以歸盡。樂夫天命復奚疑。

陶淵明集卷六

桃花源詩并記

晉太元中。武陵人捕魚爲業。緣溪行。忘路之遠近。忽逢桃花林。夾岸數百步。中無雜樹。芳艸鮮美。落英繽紛。漁人甚異之。復前行欲窮其林。林盡水源。便得一山。山有小口。髣髴若有光。便捨船從口入。初極狹。纔通人。復行數十步。豁然開朗。土地平曠。屋舍儼然。有良田。美池桑竹之屬。阡陌交通。雞犬相聞。其中往來種作。男女衣著。悉如外人。黃髮垂髫。並怡然自樂。見漁人。乃大驚。問所從來。具答之。便要還家。設酒殺雞作食。村中聞有此人。咸來問訊。自云。先世避秦時亂。率妻子邑人。來此絕境。不復出焉。遂與外人間隔。問今何世。乃不知有漢。無論魏晉。此人一一爲具言所聞。皆歎惋。餘人各復延至其家。皆出酒食。停數日辭去。此中人語云。不足爲外人道也。既出得其船。便扶向路。處處誌之。及郡下。詣太守。說如此。太守即遣人隨其往。尋向所誌。遂迷不復得路。南陽劉子驥。高尚士也。聞之。欣然親往。未果。尋病終。後遂無問津者。

羸氏亂天紀。賢者避其世。黃綺之商山。伊人亦云逝。往迹沒復漚。來運遂蕪廢。相命肆農畊。日入從所憩。桑竹垂餘蔭。菽稷隨時藝。春蠶收長絲。秋熟靡王稅。荒路曖交通。雞犬互鳴吠。俎豆猶古法。衣裳無新製。童孺縱行歌。斑白懽遊詣。草榮誠節和。木衰知風厲。雖無紀曆誌。四時自成歲。怡然有餘樂。於何勞智慧。奇蹤隱五百。一朝啟神界。淳薄既異源。旋復還幽蔽。借問游方士。焉測塵囂外。願言躡輕風。高舉尋吾契。

晉故西征大將軍長史孟府君傳

君諱嘉。字萬年。江夏鄂人也。曾祖父宗。以孝行稱。仕吳司馬。祖父揖。元康中。爲廬陵太守。宗葬武昌新陽縣。子孫家焉。遂爲縣人也。君少失父。奉母二弟居。娶大司馬長沙桓公陶侃第十女。閨門孝友。人無能間。鄉閭稱之。冲默有遠慮。弱冠儔類咸敬之。同郡郭遜。以清操知名。時在君右。常歎君溫雅平曠。自以爲不及。遜從弟立。亦有才志。與君同時齊譽。每推服焉。由是名冠州里。聲流京邑。太尉穎川庾亮。以帝舅民望。受分陝之重。鎮武昌。并領江州。辟君部廬陵從事。下郡還。亮引見。問風俗得失。對曰。嘉不知。還傳當問從吏。亮以麈尾掩口而笑。諸從事既去。喚弟翼。語之曰。孟嘉故是盛德人也。君既辭出外。自除吏名。僂步歸家。母在堂。兄弟共相懽樂。怡怡如也。旬有餘日。更版爲勸學從事。時亮崇脩學校。高選儒官。以君望實。故

應尙德之舉。大傅河南褚褒。簡穆有器識。時爲豫章太守。出朝宗亮。正旦大會州府人士。奉多時彥君在坐。次甚遠。褒問亮。江州有孟嘉。其人何在。亮云在坐。卿但自覓。褒歷觀。遂指君。謂亮曰。將無是耶。亮欣然而笑。喜褒之得君。奇君爲褒之所得。乃益器焉。舉秀才。又爲安西將軍。庾翼府功曹。爲江州別駕。巴丘令。征西大將軍。譙國桓溫參軍。君色和而正。溫甚重之。九月九日。溫游龍山。參佐畢集。四弟二甥咸在坐。時佐吏竝著戎服。有風吹君帽墮。溫目左右及賓客。勿言以觀其舉止。君初不自覺。良久如廁。溫命取以還之。廷尉太原孫盛爲諸議參軍。時在坐。溫命紙筆。令嘲之。文成示溫。溫以著坐處。君歸見嘲。笑而請筆作答。了不容思。文辭超卓。四座歎之。奉使京師。除尙書刪定郎。不拜。孝宗穆皇帝聞其名。賜見東堂。君辭以脚疾。不任拜起。詔使人扶入。君嘗爲刺史。謝永別駕。永會稽人。喪亡。君求赴義。路由永興。高陽許詢有雋才。辭榮不仕。每縱心獨往。客居縣界。嘗乘船近行。適逢君過。歎曰。都邑美士。吾盡識之。獨不識此人。唯聞中州有孟嘉者。將非是乎。然亦何由來。此使問君之從者。君謂其使曰。本心相過。今先赴義。尋還就君。及歸。遂止信宿。雅相知得。有若舊交。還至轉從事中郎。俄遷長史。在朝。隤然仗正。順而已。門無雜賓。嘗會神情。獨得。優超然。命駕還之。龍山。顧景。酣宴造夕。乃歸。溫從容謂君曰。人不可無勢。我乃能駕御卿。後以疾終於家。年五十一。始自總髮。至于知命。行不苟合。言無夸矜。未嘗有喜愠之容。好酣飲。逾多不亂。至於任懷得意。融

然遠寄。傍若無人。溫嘗問君酒有何好。而卿嗜之。君笑而答曰。明公但不得酒中趣。爾。又問聽妓。絲不如竹。竹不如肉。答曰。漸近自然。中散大夫桂陽羅含賦之曰。孟生善酣。不愆其意。光祿大夫南陽劉耽。昔與君同在溫府。淵明從父太常襲嘗問耽。君若在。當已作公。不答曰。此本是三司人。爲時所重如此。淵明先親君之第四女也。凱風寒泉之思。實鍾厥心。謹按採行事。撰爲此傳。懼或乖謬。有虧大雅君子之德。所以戰兢兢兢。若履深薄。云爾。贊曰。孔子稱進德脩業。以及時也。君清蹈衡門。則令聞孔昭。振纓公朝。則德音允集。道悠運促。不終遠業。惜哉。仁者必壽。豈斯言之謬乎。

五柳先生傳

先生不知何許人也。亦不詳其姓字。宅邊有五柳樹。因以爲號焉。閒靖少言。不慕榮利。好讀書。不求甚解。每有會意。便欣然忘食。性嗜酒。家貧不能常得。親舊知其如此。或置酒而招之。造飲輒盡。期在必醉。既醉而退。曾不吝情。去留環堵蕭然。不蔽風日。短褐穿結。箠瓢屢空。晏如也。常著文章自娛。頗示己志。忘懷得失。以此自終。贊曰。

黔婁有言。不成戚於貧賤。不汲汲於富貴。極其言。茲若人之儔乎。酣觴賦詩。以樂其志。無懷氏之民歟。葛天氏之民歟。

讀史述九章

余讀史記有所感而述之。

夷齊

二子讓國。相將海隅。天人革命。絕景窮居。采薇高歌。慨想黃虞。貞風浚俗。爰感懦夫。

箕子

去鄉之感。猶有遲遲。矧伊代謝。觸物皆非。哀哀箕子。云胡能夷。狡童之歌。悽矣其悲。

管鮑

知人未易。相知實難。澹美初交。利乖歲寒。管生稱心。鮑叔必安。奇情雙亮。令名俱全。

程杵

遺生良難。士為知己。望義如歸。允伊二子。程生揮劍。懼茲餘恥。令德令聞。百代見紀。

七十二弟子

恂恂舞雩。莫曰匪賢。俱映日月。共殮至言。慟由才難。感為情牽。回也早天。

賜獨長年。

屈賈

進德修業。將以及時。如彼稷契。孰不願之。嗟乎二賢。逢世多疑。候詹寫志。感鵬獻辭。

韓非

豐狐隱穴。以文自殘。君子失時。自首抱關。巧行居災。伎辯召患。哀矣韓生。竟死說難。

魯二儒

易代隨時。迷變則愚。介介若人。特為貞夫。德不百年。汗我詩書。逝然不顧。被褐幽居。

張長公

遠哉長公。蕭然何事。世路多端。皆為我異。斂耨竭來。獨養其志。寢跡窮年。誰知斯意。

陶淵明集卷七

扇上畫贊

荷蓀丈人 長沮桀溺 於陵仲子 張長公 丙曼容 鄭次都 薛孟嘗 周陽珪
 三五道邈 淳風日盡 九流參差 互相推隕 形逐物遷 心無常準 是以達人
 有時而隱 四體不動 五穀不分 超超丈人 日名在耘 遼遼沮溺 耦畊自欣
 入鳥不駭 雜獸斯羣 至矣於陵 養氣浩然 蔑彼結駟 甘此灌園 張生一仕
 曾以事還 顧我不能 高謝入閒 岩岩丙公 望崖輒歸 匪驕匪吝 前路威夷
 鄭叟不合 垂釣川涓 交酌林下 清言究微 孟嘗游學 天網時疎 眷言哲友
 振褐借徂 美哉周子 稱疾閒居 寄心清尚 悠然自娛 翳翳衡門 洋洋泌流
 曰琴曰書 顧眄有儔 飲河既足 自外皆休 緬懷千載 託契孤游

尚長禽慶贊
 尚子昔薄宦 妻孥共早晚 貧賤與富貴 讀易悟益損 禽生善周游 周游日已遠
 去矣尋名山 上反豈知反

五孝傳贊

天子孝傳贊

虞舜 夏禹 殷高宗 周文王

虞舜父頑母瞽事之於畎畝之間以孝蒸蒸是以堯聞而授之富有天下貴為天子以為不
 順於父母若窮而無歸惟順親可以得意苟違朝夕若嬰兒之思戀故稱舜五十而慕書曰
 夏擊鳴球搏拊琴瑟以詠祖考來格言思其來而訓之愛敬盡於事親是以德教加於百姓
 刑于四海夏禹有天下以奉宗廟然躬自菲薄以厚其孝孔子曰禹吾無閒然矣菲飲食而
 致孝乎鬼神惡衣服而致美乎黻冕禹之德於是稱聞聖人之德無以加於孝敬孝敬之道
 美莫大焉殷高宗諒陰三年不言百官總己而聽於冢宰三年而後言天下咸歡德教大行
 殷道以興詩曰一人有慶兆民賴之其此之謂乎周文王之為世子也朝於王季日三雞鳴
 至於寢門問於內豎內豎曰安文王乃喜不安則色憂行不能正履日中暮亦如之食上必
 視寒溫之節食下必問所膳而後退文王孝道光其化自近至遠刑于寡妻以御于家邦
 故得萬國之懽心以事其先王矣

贊曰

至哉后德聖敬自天陶漁致養菲薄享先親瘠色憂諒陰寢言一人有慶千載賴旃

諸侯孝傳贊

周公旦 魯孝公 河閒惠王

周公旦，武王之弟，成王幼少，周公攝政，制禮作樂，郊祀后稷以配天，宗祀文王於明堂以配上帝，是以四海之內各以其職來祭。詩曰：於穆清廟，肅雍顯相，言諸侯樂其位而敬其事也。仲尼曰：孝莫大於嚴父，嚴父莫大於配天，則周公其人也。貴而不驕，位高彌謙，自承文武之休烈，孝道通于神明，光被四海，武王封之於魯，備其禮樂，以奉宗廟焉。魯孝公之爲公子，周宣王問公子能道訓諸侯者，立之樊穆仲，稱其孝曰：肅恭明神而敬事者，老賦事行刑，必問於遺訓，吝於故實，不干所問，不犯所吝，王曰：然則能訓理其民矣，乃命之於夷宮，是爲孝公。夫宗廟致敬，不忘親也，有國不亦宜乎？漢河閒惠王，獻王之曾孫也，西京藩臣，多驕放之失，其名德者，唯獻王而惠王繼之。漢書稱其能修獻王之行，母薨，服喪盡禮，哀帝下詔書褒揚，以爲宗室儀表，增封萬戶。禮古之人皆然，至於末俗衰薄，固已賢矣，貴而率禮，又難，其見褒賞，不亦宜乎？

贊曰

貴駟殊途，不期而會，周公勞謙，乃成光大，二侯承魯，遵儉去泰，河閒率禮，漢宋是賴。

卿大夫孝傳贊

孔子 孟莊子 潁考叔

孔子魯人也，入則事父兄，出則事公卿，喪事不敢不勉，故稱曰：孝乎惟孝，友于兄弟，是亦爲政也。君賜腥，必熟而薦之，雖蔬食，而齊祭，如在。鄉人儺，朝服立於阼階，孝之至也。至德要道，莫大於孝，是以曾參受而書之，游夏之徒，常咨稟焉，許止不嘗藥，書以殺父，宰我暫言滅喪，責以不仁，言合訓典，行合世範，德義可尊，作事可法，遺文不朽，揚名千載，孟莊子魯人也，孔子稱其孝，其他可能也，其不改父之政，與父之臣，是難能也，夫孝子之事親也，事亡如事存，故當不義則爭之，存所不爭，則亡亦不敢改，三年無改父之道，猶謂之孝，況終身乎？潁考叔，鄭人也，莊公以叔段之故，與母誓曰：不及黃泉，無相見也，旣而悔之，考叔爲封人，聞之，有獻於公，公賜之食，而舍肉，公問之，對曰：小人有母，未嘗君之羹，請以遺之，公曰：汝有母遺，繫我獨無，考叔曰：何謂也？公語之故，且告之悔，考叔曰：若掘地及泉，隧而相見，其誰曰不然？公從之，遂爲母子如初，君子曰：潁考叔純孝也，愛其母而施及莊公，詩云：孝子不匱，永錫爾類，其是之謂乎？

贊曰

仁惟本梯，聖亦基孝，恂恂尼父，固天攸造，二子承親，式禮遵誥，永錫純懿，無改遺操。

士孝傳贊

陶淵明集卷七

高柴 樂正子春 孔奮 黃香

高柴衛人也。喪親泣血三年。未嘗見齒。所謂哭不偯。言不文也。爲武城宰。而化行。民有不服。其親者。改之行。喪如禮。君子之德風也。以身先之。而民不遺其親。樂正子春魯人也。下堂傷足。既瘳。數月不出。猶有憂色。曰。吾聞之。曾子。父母全而生之。已全而歸之。可謂孝矣。故君子一舉足。一出言。不敢忘父母。不敢毀傷。孝之始也。夫能敬慎若斯。而災患及者。未之有也。孔奮扶風人也。少以孝行著名州里。供養至謹。在官唯母極甘美。妻息菜食。歷位以清。夫人情莫不欲厚其親。然亦有分焉。奢則難繼。能致儉以全養者鮮矣。黃香江夏人也。九歲失母。思慕骨立。事父竭力。以致養。冬無被袴。而盡滋味。暑則扇床枕。寒則以身溫席。漢和帝嘉之。特加異賜。歷位恭勤。寵祿榮親。可謂夙興夜寐。無恭爾所生者也。

贊曰

顯允羣士。行殊名鈞。咸能夙夜。以義榮親。率彼城邑。用化厥民。忠以悟主。其孝乃純。

庶人孝傳贊

江革 廉範 汝郁 殷陶

江革齊人也。漢章帝時。避賊負母而逃。賊賢之不害。而告其生路。竭力備貨。以致甘暖。和顏悅色。以盡歡心。欲親之安。自挽車以行。鄉人稱之。號曰江巨孝。位至五官中郎將。天子嘉焉。

寵遇甚厚。告歸。詔書褒美。就家禮其終身。以顯異行。廉範京兆人也。少孤。十五入蜀。迎父喪。遇石船覆。範執骸而沒。船人救之。僅免於死。遂以喪歸。及仕郡。揆太守於危難。遂故盡節。章帝時爲郡守。百姓歌詠之。夫孝者人之本。教之所由生也。是以範之臨危也。勇。率民也。惠。能以義顯也。汝郁陳郡人也。五歲母病不食。郁亦不食。母憐之。強食。郁能察色。知病。輒復不食。族人號曰異童。年十五。著於鄉里。父母終。思慕致毀。推財與兄弟。隱於草澤。君子以爲難。況童亂孝於自然。可謂天性也。殷陶汝南人也。年十二。以孝稱。遭父憂。率情合禮。有長蛇帶。其門舉家奔走。陶以喪柩在焉。獨居廬。不動。親戚扶持。曉諭莫能移之。啼號益盛。由是顯名。屢辭辟命。夫智者不惑。勇者不懼。陶孝於其親。而智勇並彰。乎弱齡。斯又難矣。

贊曰

事親盡歡。其難在色。被養以祿。我養以力。義在愛敬。榮不假飾。嗟爾衆庶。鑒茲前式。

陶淵明集卷八

與子儼等疏

告儼俟份佚。天地賦命。生必有死。自古賢聖。誰能獨免。子夏有言。曰。死生有命。富貴在天。

四友之人親受音旨發斯談者將非窮達不可妄求壽夭永無外請故耶吾年過五十少而窮苦每以家敝東西游走性剛才拙與物多忤自量爲己必貽俗患備俛辭世使汝等幼而飢寒余嘗感孺仲賢妻之言敗絮自擁可慙兒子此既一事矣但恨鄰靡二仲室無萊婦抱茲苦心良獨內愧少學琴書偶愛閒靜開卷有得便欣然忘食見樹木交陰時鳥變聲亦復愜然有喜常言五六月中北窗下臥遇涼風暫至自謂是羲皇上人意淺識罕謂斯言可保日月遂往機巧好疎編求在昔眇然如何病患以來漸就衰損親舊不遺每以藥石見救自恐大分將有限也汝輩稚小家貧每役柴水之勞何時可免念之在心若何可言然汝等雖不同生當思四海皆兄弟之義鮑叔管仲分財無猜歸生伍舉班荆道舊遂能以敗爲成因喪立功他人尙爾況同父之人哉潁川韓元長漢末名士身處卿佐八十而終兄弟同居至于沒齒濟北汜稚春晉時操行人也七家世同財人無怨色詩曰高山仰止景行行止雖不能爾至心尙之汝其慎哉吾復何言

祭程氏妹文

維晉義熙三年五月甲辰程氏妹服制再周淵明以少牢之奠俛而酌之嗚乎哀哉寒往暑來日月寢疎梁塵委積庭艸荒蕪寥寥空室哀哀遺孤看鶻虛奠人逝焉如誰無兄弟人亦同生嗟我與爾特百常情慈妣早世時尙孺嬰我年二六爾纔九齡爰從靡誠撫碧相成咨爾令妹有德有操靖恭鮮言聞善則樂能正能和惟友惟孝行止中間可象可倣我聞爲善慶自己踏彼蒼何偏而不斯報昔在江陵重罹天罰兄弟索居乖隔楚越伊我與爾百哀是切黯黯高雲蕭蕭冬月白雲掩晨長風悲節感惟崩號興言泣血尋念平昔觸事未遠書疏猶存遺孤滿眼如何一往終天不返寂寂高堂何時復踐藐藐孤女曷依曷恃孳孳遊魂誰主誰祀奈何程妹於此永已死如有知相見蒿里嗚乎哀哉

祭從弟敬遠文

歲在辛亥月惟仲秋旬有九日從弟敬遠卜辰云芝永寧后土感平生之游處悲一往之不返情惻惻以摧心淚愍愍而盈眼乃以園果時醪祖其將行嗚乎哀哉於鑠吾弟有操有槩孝發幼齡友自天愛少思寡欲靡執靡介後己先人臨財思惠心遺得失情不依世其色能溫其言則屬樂勝朋高好是文藝遙遙帝鄉爰感奇心絕粒委務考槃山陰滄涼懸溜暖暖荒林晨探上藥夕閑素琴曰仁者壽竊獨信之如何斯言徒能見欺年甫過立奄與世辭長歸蒿里邈無還期惟我與爾匪但親友父則同生母則從母相及韶皦並罹偏咎期情實深斯愛實厚念被昔日同房之懽冬無緇褐夏渴瓢簞相將以道相開以顏豈不多乏忽忘饑寒余嘗學仕纏緜人事流浪無成懼負素志斂策歸來爾知我意常願攜手冀彼衆議每憶有秋我將其刈與汝偕行舫舟同濟三宿水濱樂飲川界靜月澄高溫風始逝撫杯而言物

久人脆。奈何吾弟。先我離世。事不可尋。思亦何極。日徂月流。寒暑代息。死生異方。存亡有域。候晨永歸。指塗載陟。呱呱遺稚。未能正言。哀髮人禮。儀孔閑庭。樹如故齋。宇廓然。孰云敬遠。何時復還。余惟人斯。味茲近情。著龜有吉。制我祖行。望旒翩翩。執筆涕盈。神其有知。昭余中誠。嗚乎哀哉。

自祭文

歲惟丁卯。律中無射。天寒夜長。風氣蕭索。陶子將辭。逆旅之館。永歸於本宅。故人凄其相悲。同祖行於今夕。羞以嘉蔬。薦以清酌。候顏已冥。聆音愈漠。嗚乎哀哉。茫茫大塊。悠悠高旻。是生萬物。余得爲人。自余爲人。逢運之貧。簞瓢屢罄。絺綌冬陳。含懼谷汲。行歌負薪。翳翳柴門。事我宵晨。春秋代謝。有務中園。載耘載耔。廼有廼繁。欣以素牘。和以七絃。冬曝其日。夏濯其泉。勤靡餘勞。心有常閒。樂天委分。以至百年。惟此百年。夫人愛之。懼彼無成。愒日惜時。存爲世珍。沒亦見思。嗟我獨邁。曾是異茲。寵非已榮。湜豈吾緇。掉兀窮廬。酣飲賦詩。識運知命。疇能固眷。余今斯化。可以無恨。壽涉百齡。身慕肥遁。從老得終。奚所復慕。寒暑逾邁。亡既異存。外姻晨來。良友宵奔。葬之中野。以安其魂。窅窅我行。蕭蕭墓門。奢恥宋臣。儉笑王孫。廓兮已滅。慨焉已遐。不封不樹。日月遂過。匪貴前譽。孰重後歌。人生寔難。死如之何。嗚乎哀哉。

陶淵明集終

玉臺新詠

玉臺新詠卷一

陳尚書左僕射太子少傅東海徐陵孝穆編

古詩八首

上山采蘼蕪。下山逢故夫。長跪問故夫。新人復何如。新人雖言好。未若故人姝。顏色類相似。手爪不相如。新人從門入。故入從閤去。新人工織縑。故人工織素。織縑日一匹。織素五丈餘。將縑來比素。新人不如故。

【一】

凜凜歲云暮。蟋蟀多鳴悲。涼風率已厲。遊子寒無衣。錦衾遺洛浦。同袍與我違。獨宿累長夜。寢想見容暉。良人惟古歡。枉駕惠前綏。願得長巧笑。攜手同車歸。既來不須臾。又不處重闈。諒無鷓鴣風翼。焉能凌風飛。眄睐以適意。引領遂相隨。徒倚懷感傷。垂涕霑雙扉。

【三】

冉冉孤生竹。結根泰山阿。與君爲新婚。菟絲附女蘿。菟絲生有時。夫婦會有宜。

千里遠結婚。悠悠隔山陂。思君令人老。軒車來何遲。傷彼蕙蘭花。含英揚光輝。過時而不采。將隨秋草萎。君亮執高節。賤妾亦何爲。

【四】

孟冬寒氣至。北風何慘慄。愁多知夜長。仰觀衆星列。三五明月滿。四五蟾兔缺。客從遠方來。遺我一書札。上言長相思。下言久離別。置書懷袖中。三歲字不滅。一心抱區區。懼君不誠察。

【五】

客從遠方來。遺我一端綺。相去萬餘里。故人心尙爾。文彩雙鴛鴦。裁爲合歡被。著以長相思。緣以結不解。以膠投漆中。誰能別離此。

【六】

四坐且莫誼。願聽歌一言。請說銅鑪器。崔嵬象南山。上枝以松柏。下根據銅盤。雕文各異類。離婁自相聯。誰能爲此器。公輸與魯班。朱火然其中。青煙颺其閒。從風入君懷。四坐莫不歎。香風難久居。空令蕙草殘。

【七】

悲與親友別。氣結不能言。贈子以自愛。道遠會見難。人生無幾時。顛沛在其閒。

念子棄我去。新心有所歡。結志青雲上。何時復來還。

【八】

穆穆清風至。吹我羅裳裾。青袍似春草。長條隨風舒。朝登津梁上。寥寥望所思。安得抱柱信。皎日以爲期。

古樂府詩六首

日出東南隅行

日出東南隅。照我秦氏樓。秦氏有好女。自言名羅敷。羅敷善蠶桑。采桑城南隅。青絲爲籠繩。桂枝爲籠鉤。頭上倭墮髻。耳中明月珠。綠綺爲下裾。紫綺爲上襦。行者見羅敷。下擔持髭鬚。少年見羅敷。脫巾著帽頭。耕者忘其耕。鋤者忘其鋤。來歸相喜怒。但坐觀羅敷。使君從南來。五馬立踟躕。使君遣吏往。問此誰家姝。秦氏有好女。自名爲羅敷。羅敷年幾何。二十尙未滿。十五頗有餘。使君謝羅敷。甯可共載不。羅敷前置辭。使君一何愚。使君自有婦。羅敷自有夫。東方千餘騎。夫婿居上頭。何以識夫婿。白馬從驪駒。青絲繫馬尾。黃金絡馬頭。腰閒鹿盧劍。可直千萬餘。十五府小吏。二十朝大夫。三十侍中郎。四十專城居。爲人潔白皙。髣髴頗有鬚。盈盈公府步。冉冉府中趨。坐中數千人。皆言夫婿殊。

相逢狹路閒

相逢狹路閒。道隘不容軍。如何兩少年。挾穀問君家。君家誠易知。易知誠難忘。
 黃金爲君門。白玉爲君堂。堂上置樽酒。使作邯鄲倡。中庭生桂樹。華燈何煌煌。
 兄弟兩三人。中子爲侍郎。五日一來歸。道上自生光。黃金絡馬頭。觀者滿路傍。
 入門時左顧。但見雙鴛鴦。鴛鴦七十二。羅列自成行。音聲何嘈囂。鶴鳴東西廂。
 大婦織羅綺。中婦織流黃。小婦無所作。挾瑟上高堂。丈人且安坐。調絲未遽央。

隴西行

天上何所有。歷歷種白榆。桂樹夾道生。青龍對道隅。鳳凰鳴啾啾。一母將九雛。
 顧視世間人。爲樂甚獨殊。好婦出迎客。顏色正敷愉。伸腰再拜跪。問客平安不。
 請客北堂上。坐客氍毹毹。清白各異樽。酒上正華疏。酌酒持與客。客言主人持。
 卻畧再拜跪。然後持一柸。談笑未及竟。左顧勅中厨。促令辦麴飯。慎莫使稽留。
 廣禮送客出。盈盈府中趨。送客亦不遠。足不過門樞。取婦得如此。齊姜亦不如。
 健婦持門戶。勝一大丈夫。

豔歌行

翩翩堂前鷺。冬藏夏來見。兄弟兩三人。流蕩在他縣。故衣誰當補。新衣誰當綻。

賴得賢主人。覽取爲吾綻。夫婿從門來。斜柯西北晒。語卿且勿晒。水清石自見。
 石見何崇崇。遠行不如歸。

皚如山上雪

皚如山上雪。皎若雲間月。聞君有兩意。故來相訣絕。今日斗酒會。明旦溝水頭。
 躑躅御溝上。溝水東西流。淒淒復淒淒。嫁娶不須啼。願得一人心。白頭不相離。
 竹竿何嫋嫋。魚尾何蕩蕩。男兒重意氣。何用錢刀爲。

雙白鶴

飛來雙白鶴。乃從西北來。十十將五五。羅列行不齊。忽然卒疲病。不能飛相隨。
 五里一反顧。六里一徘徊。吾欲銜汝去。口噤不能開。吾欲負汝去。羽毛日摧頹。
 樂哉新相知。憂來生別離。峙嶠願羣侶。淚落縱橫垂。今日樂相樂。延年萬歲期。

雜詩九首

枚乘

西北有高樓。上與浮雲齊。交疏結綺窓。阿閣三重階。上有弦歌聲。音響一何悲。
 誰能爲此曲。無乃杞梁妻。清商隨風發。中曲正徘徊。一彈再三歎。慷慨有餘哀。
 不惜歌者苦。但傷知音稀。願爲雙鴻鶴。奮翅起高飛。

【11】

東城高且長。逶迤自相屬。回風動地起。秋草萎已綠。四時更變化。歲暮一何速。鷓鴣懷苦心。蟋蟀傷局促。蕩滌放情志。何爲自結束。燕趙多佳人。美者顏如玉。被服羅裳衣。當戶理清曲。音響一何悲。絃急知柱促。馳情整中帶。沈吟聊躑躅。思爲雙飛燕。銜泥巢君屋。

【三】

行行重行行。與君生別離。相去萬餘里。各在天一涯。道路阻且長。會面安可知。胡馬嘶北風。越鳥巢南枝。相去日已遠。衣帶日已緩。浮雲蔽白日。遊子不顧反。思君令人老。歲月忽已晚。棄捐勿復道。努力加飧飯。

【四】

涉江採芙蓉。蘭澤多芳草。采之欲遺誰。所思在遠道。還願望舊鄉。長路漫浩浩。同心而離居。憂傷以終老。

【五】

青青河畔草。鬱鬱園中柳。盈盈樓上女。皎皎當窗牖。娥娥紅粉妝。織織出素手。昔爲倡家女。今爲蕩子婦。蕩子行不歸。空牀難獨守。

【六】

蘭若生春陽。涉冬猶盛滋。願言追昔愛。情款感四時。美人在雲端。天路隔無期。夜光照玄陰。長歎戀所思。誰謂我無憂。積念發狂癡。

【七】

庭前有奇樹。綠陰發華滋。攀條折其榮。將以遺所思。馨香盈懷袖。路遠莫致之。此物何足貴。但感別經時。

【八】

迢迢牽牛星。皎皎河漢女。織織擢素手。札札弄機杼。終日不成章。泣涕零如雨。河漢清且淺。相去復幾許。盈盈一水間。脉脉不得語。

【九】

明月何皎皎。照我羅牀幃。憂愁不能寐。攬衣起徘徊。行客雖云樂。不如早旋歸。出戶獨彷徨。愁思當告誰。引領還入房。淚下霑裳衣。

歌詩一首并序

李延年

李延年知音善歌舞。每爲漢武帝作新歌舞曲。聞者莫不感動。延年侍坐。上起舞。歌曰。北方有佳人。絕世而獨立。一顧傾人城。再顧傾人國。傾城復傾國。佳人難再得。

留別妻一首

蘇武

結髮爲夫婦。恩愛兩不疑。懽娛在今夕。媿婉及良時。征夫懷遠路。起視夜何其。參晨皆已沒。去去從此辭。行役在戰場。相見未有期。握手一長歎。淚爲別生滋。努力愛春華。莫忘懽樂時。生當復來歸。死當長相思。

羽林郎詩一首

辛延年

昔有霍家奴。姓馮名子都。依倚將軍勢。調笑酒家胡。胡姬年十五。春日獨當爐。長裾連理帶。廣袖合歡襦。頭上藍田玉。耳後大秦珠。兩鬢何窈窕。一世良所無。一鬢五百萬。兩鬢千萬餘。不意金吾子。娉婷過我廬。銀鞍何昱爚。翠蓋空崎嶇。就我求清酒。絲繩提玉壺。就我求珍肴。金盤脍鯉魚。貽我青銅鏡。結我紅羅裾。不惜紅羅裂。何論輕賤軀。男兒愛後婦。女子重前夫。人生有新故。貴賤不相踰。多謝金吾子。私愛徒區區。

怨詩一首并序

班婕妤

昔漢成帝班婕妤好失寵。供養于長信宮。乃作賦自傷。并爲怨詩一首。新裂齊紈素。鮮潔如霜雪。裁爲合歡扇。團圓似明月。出入君懷袖。動搖微風發。常恐秋節至。涼風奪炎熱。棄捐篋笥中。恩情中道絕。

董嬌嬈詩一首

宋子侯

洛陽城東路。桃李生路傍。花花自相對。葉葉自相當。春風東北起。花葉正低昂。不知誰家子。提籠行采桑。纖手折其枝。花落何飄颻。請謝彼姝子。何爲見損傷。高秋八九月。白露變爲霜。終年會飄墮。安得久馨香。秋時自零落。春月復芬芳。何時盛年去。懽愛永相忘。吾欲竟此曲。此曲愁人腸。歸來酌美酒。挾瑟上高堂。

童謠歌一首

(漢時)

城中好高髻。四方高一尺。城中好大眉。四方眉半額。城中好廣袖。四方用匹帛。

同聲歌一首

張衡

邂逅承際會。得充君後房。情好新交接。恐曝若探湯。不才勉自竭。賤妾職所當。綢繆主中饋。奉禮助蒸嘗。思爲苑蕝席。在下蔽匡牀。願爲羅衾轉。在上衛風霜。酒掃清枕席。鞶芬以秋香。重戶結金局。高下華證光。衣解巾紛御。列圖陳枕張。素女爲我師。儀態盈萬方。衆夫所希見。天老教軒皇。樂莫斯夜樂。沒齒焉可忘。

贈婦詩三首并序

秦嘉

秦嘉字士會。隴西人也。爲郡上掾。其妻徐淑。寢疾還家。不獲而別。贈詩云爾。人生譬朝露。居世多屯蹇。憂艱常早至。歡會常苦晚。念當奉時役。去爾日遙遠。遣車迎子還。空往復空返。省書情悽愴。臨食不能飯。獨坐空房中。誰與相勸勉。

長夜不能眠。伏枕獨展轉。憂來如尋環。匪席不可卷。

【二】

皇靈無私親。爲善荷天祿。傷我與爾身。少小羅楚獨。既得結大義。歡樂若不足。念當遠離別。思念敘款曲。河廣無舟梁。道近隔邱陸。臨路懷惆悵。中駕正踟躕。浮雲起高山。悲風激深谷。良馬不回鞍。輕車不轉轂。針藥可屢進。愁思難爲數。貞士篤終始。恩義不可屬。

【三】

肅肅僕夫征。鏘鏘揚和鈴。清晨當引邁。東帶待雞鳴。顧看空室中。髣髴想姿形。一別懷萬恨。起坐爲不甯。何用敘我心。遺思致款誠。寶釵可耀首。明鏡可鑒形。芳香去垢穢。素琴有清聲。詩人感木瓜。乃欲答瑤瓊。媿彼贈我厚。慙此往物輕。雖知未足報。貴用叙我情。

答詩一首

秦嘉妻徐淑

妾身兮不令。嬰疾兮來歸。沉滯兮家門。歷時兮不差。曠廢兮侍親。情敬兮有違。君今兮奉命。遠適兮京師。悠悠兮離別。無因兮叙懷。瞻望兮踴躍。佇立兮徘徊。思君兮感結。夢想兮容輝。君發兮引邁。去我兮日乖。恨無兮羽翼。高飛兮相追。

長吟兮永歎。淚下兮霑兮。

飲馬長城窟行一首

蔡邕

青青河邊草。絲絲思遠道。遠道不可思。宿昔夢見之。夢見在我旁。忽覺在他鄉。他鄉各異縣。展轉不相見。枯桑知天風。海水知天寒。入門各自媚。誰肯相爲言。客從遠方來。遺我雙鯉魚。呼兒烹鯉魚。中有尺素書。長跪讀素書。書中竟何如。上有加飧食。下有長相憶。

飲馬長城窟行一首

陳琳

飲馬長城窟。水寒傷馬骨。往謂長城吏。慎莫稽留太原卒。官作自有程。舉築諧汝聲。男兒甯當格鬪死。何能怫鬱築長城。長城何連連。連連三千里。邊城多健少。內含多寡婦。作書與內舍。便嫁莫留住。善事新姑章。時時念我故夫子。報書往邊地。君今出語一何鄙。身在禍難中。何爲稽留他家子。生男慎勿舉。生女哺用脯。君獨不見長城下。死人骸骨相撐拄。結髮行事君。慊慊心意關邊地。苦賤妾何能久自全。

室思一首

徐幹

沉陰結愁憂。愁憂爲誰興。念與君相別。各在天一方。良會未有期。中心摧且傷。

不聊憂_食。慊慊常饑空。端坐而無爲。髣髴君容光。峩峩高山首。悠悠萬里道。君去日已遠。鬱結令人老。人生一世閒。忽若暮春草。時不可再得。何爲自愁惱。每誦昔鴻恩。賤軀焉足保。浮雲何洋洋。願因通吾辭。飄飄不可寄。徒倚徒相思。人離皆復會。君獨無返期。自君之出矣。明鏡暗不治。思君如流水。何有窮已時。慘慘時節盡。蘭華凋復零。喟然長歎息。君期慰我情。展轉不能寐。長夜何緜緜。踟躕起出戶。仰觀三星連。自恨志不遂。泣涕如涌泉。思君見巾櫛。以益我勞動。安得鴻鸞羽。觀此心中人。誠心亮不遂。搔首立悁悁。何言一不見。復會無因緣。故如比目魚。今隔如參辰。人靡不有初。想君能終之。別來歷年歲。舊恩何可期。重新而忘故。君子所尤譏。寄身雖在遠。豈忘君須臾。既厚不爲薄。想君時見思。

情詩一首

高殿鬱崇崇。廣廈淒泠泠。微風起閨闈。落日照階庭。峙嶠雲屋下。嘯歌倚華楹。君行殊不返。我飾爲誰榮。蠹薰闔不用。鏡匣上塵生。綺羅失常色。金翠暗無精。嘉肴既忘御。旨酒亦常停。顧瞻空寂寂。惟聞燕雀聲。憂思連相囑。中心如宿醒。

定情詩一首

繁欽

我出東門遊。邂逅承清塵。思君卽幽房。侍寢執衣巾。時無桑中契。迫此路側人。

我卽媚君姿。君亦悅我顏。何以致拳拳。縮臂雙金環。何以致殷勤。約指一雙銀。何以致區區。耳中雙明珠。何以致叩叩。香囊繫肘後。何以致契闊。繞腕雙跳脫。何以結恩情。佩玉綴羅纓。何以結中心。素纓連雙針。何以結相於。金薄畫搔頭。何以慰別離。耳後瑤瑯釵。何以答歡悅。執素三條裙。何以結愁悲。白絹雙中衣。與我期何所。乃期東山隅。日旰兮不至。谷風吹我襦。遠望無所見。涕泣起峙嶠。與我期何所。乃期山南陽。日中兮不來。凱風吹我裳。逍遙莫誰覩。望君愁我腸。與我期何所。乃期西山側。日夕兮不來。躑躅長歎息。遠望涼風至。俯仰正衣服。與我期何所。乃期山北岑。日暮兮不來。淒風吹我衿。望君不能坐。悲苦愁我心。愛身以何爲。惜我華色時。中情既款款。然後剋密期。褰衣躡茂草。謂君不我欺。願此醜陋質。徒倚無所之。自傷失所欲。淚下如連絲。

古詩爲焦仲卿妻作

無名人

漢末建安中。廬江府小吏焦仲卿妻劉氏。爲仲卿母所遣。自誓不嫁。其家逼之。乃沒水而死。仲卿聞之。亦自縊于庭樹。時傷之。爲詩云爾。

孔雀東南飛。五里一徘徊。十三能織素。十四學裁衣。十五彈箏篋。十六誦詩書。十七爲君婦。心中常苦悲。君既爲府吏。守節情不移。賤妾留空房。相見常日稀。

雞鳴入機織。夜夜不得息。三日斷五疋。大人故嫌遲。非爲織作遲。君家婦難爲。妾不堪驅使。徒留無所施。便可白公姥。及時相遣歸。府吏得聞之。堂上啓阿母。兒已薄祿相。幸復得此婦。結髮同枕席。黃泉共爲友。共事二三年。始爾未爲久。女行無偏斜。何意致不厚。阿母謂府吏。何乃太區區。此婦無禮節。舉動自專由。吾意久懷忿。汝豈得自由。東家有賢女。自名秦羅敷。可憐體無比。阿母爲汝求。便可速遣之。遣之慎莫留。府吏長跪答。伏惟啓阿母。今若遣此婦。終老不復取。阿母得聞之。捶牀便大怒。小子無所畏。何敢助婦語。吾已失恩義。會不相從許。府吏默無聲。再拜還入戶。舉言謂新婦。哽咽不能語。我自不驅卿。逼迫有阿母。卿但暫還家。吾今且報府。還必相迎取。以此下心意。慎勿違吾語。新婦謂府吏。勿復重紛紜。往昔初陽歲。謝家來貴門。奉事循公姥。進止敢自專。晝夜勤作息。伶俜苦辛。謂言無罪過。供養卒大恩。仍更被驅遣。何言復來還。妾有繡腰襦。葳蕤自生光。紅羅複斗帳。四角垂香囊。箱簾六七十。綠碧青絲繩。物物各自異。種種在其中。人賤物亦鄙。不足迎後人。留待作遣施。於今無會因。時時爲安慰。久久莫相忘。雞鳴外欲曙。新婦起嚴妝。著我繡袂裙。事事四五通。足下躡絲履。頭上瑤瑠光。腰若流紈素。耳著明月璫。指如削葱根。口如含朱丹。

織織作細步。精妙世無雙。上堂拜阿母。母聽去不止。昔作女兒時。生小出野里。本自無教訓。兼媿貴家子。受母錢帛多。不堪母驅使。今日還家去。念母勞家裏。卻與小姑別。淚落連珠子。新婦初來時。小姑始扶牀。今日被驅遣。小姑如我長。勤心養公姥。好自相扶將。初七及下九。嬉戲莫相忘。出門登車去。涕落百餘行。府吏馬在前。新婦車在後。隱隱何甸甸。俱會大道口。下馬入車中。低頭共耳語。誓不相隔卿。且暫還家去。吾今且赴府。不久當還歸。誓天不相負。新婦謂府吏。感君區區懷。君既若見錄。不久望君來。君當作盤石。妾當作蒲葦。蒲葦切如絲。盤石無轉移。我有親父兄。性行暴如雷。恐不任我意。逆以煎我懷。舉手長勞勞。二情同依依。入門上家堂。進退無顏儀。阿母大拊掌。不圖子自歸。十三教汝織。十四能裁衣。十五彈箜篌。十六知禮儀。十七遣汝嫁。謂言無誓違。汝今無罪過。不迎而自歸。蘭芝愆阿母。兒實無罪過。阿母大悲摧。還家十餘日。縣令遣媒來。云有第三郎。窈窕世無雙。年始十八九。便言多令才。阿母謂阿女。汝可去應之。阿女含淚答。蘭芝初還時。府吏見丁甯。結誓不別離。今日違情義。恐此事非奇。自可斷來信。徐徐更謂之。阿母白媒人。貧賤有此女。始適還家門。不堪吏人婦。豈合令郎君。幸可廣問訊。不得便相許。媒人去數日。尋遣丞請還。說有蘭家女。

承籍有宦官。云有第五郎。嬌逸未成婚。遣丞為媒人。主簿通語言。直說太守家。有此令郎君。既欲結大義。故遣來貴門。阿母謝媒人。女子先有誓。老姥豈敢言。阿兄得聞之。恨然心中煩。舉言謂阿妹。作計何不量。先嫁得府吏。後嫁得郎君。否泰如天地。足以榮汝身。不嫁義即體。其住欲何云。蘭芝仰頭答。理實如兄言。謝家事夫壻。中道還兄門。處分適兄意。那得自任專。雖與府吏要。渠會永無緣。登即相許和。便可作婚姻。媒人下牀去。諾諾復爾爾。還部白府君。下官奉使命。言談大有緣。府君得聞之。心中大歡喜。視曆復開書。便利此月內。六合正相應。良吉三十日。今已二十七。卿可去成婚。交語速裝束。駱驛如浮雲。青雀白鵝舫。四角龍子幡。婀娜隨風轉。金車玉作輪。躑躅青驄馬。流蘇金鑲鞍。齋錢三百萬。皆用青絲穿。雜綵三百疋。交廣市鮭珍。從人四五百。鬱鬱登郡門。阿母謂阿女。適得府君書。明日來迎汝。何不作衣裳。莫令事不舉。阿女默無聲。手巾掩口啼。淚落便如瀉。移我琉璃瑁。出置葺窻下。左手持刀尺。右手執綾羅。朝成繡袂裙。晚成單羅衫。唵唵日欲暝。愁思出門啼。府吏聞此變。因求假暫歸。未至二三里。摧藏馬悲哀。新婦識馬聲。躑躅相逢迎。恨然遙相望。知是故人来。舉手拍馬鞍。嗟歎使心傷。自君別我後。人事不可量。果不如先願。又非君所詳。我有親父母。

逼迫兼弟兄。以我應他人。君還何所望。府吏謂新婦。賀卿得高遷。盤石方可厚。可以卒千年。蒲葦一時紉。便作旦夕閒。卿當日勝貴。吾獨向黃泉。新婦謂府吏。何意出此言。同是被逼迫。君爾妾亦然。黃泉不相見。勿違今日言。執手分道去。各各還家門。生人作死別。恨恨那可論。念與世間辭。千萬不復全。府吏還家去。上堂拜阿母。今日大風寒。寒風摧樹木。嚴霜結庭蘭。兒今日冥冥。令母在後單。故作不良計。勿復怨鬼神。命如南山石。四體康且直。阿母得聞之。零淚應聲落。汝是大家子。仕宦於臺閣。慎勿為婦死。貴賤情何薄。東家有賢女。窈窕黠城郭。阿母為汝求。便復在旦夕。府吏再拜還。長歎空房中。作計乃爾立。轉頭向戶裏。漸見愁煎迫。其日馬牛嘶。新婦入青廬。巷巷黃昏後。寂寂人定初。我命絕今日。魂去尸長留。攬裙脫絲履。舉身赴清池。府吏聞此事。心知長別離。徘徊庭樹下。自掛東南枝。兩家求合葬。合葬華山傍。東西植松柏。左右種梧桐。枝枝相覆蓋。葉葉相交通。中有雙飛鳥。自名為鴛鴦。仰頭相向鳴。夜夜達五更。行人駐足聽。寡婦起彷徨。多謝後世人。戒之慎勿忘。

玉臺新詠卷二

陳尚書左僕射太子少傅東海徐陵孝穆編

於清河見輓船士新婚與妻別一首

魏文帝

與君結新婚。宿昔當別離。涼風動秋草。蟋蟀鳴相隨。冽冽寒蟬吟。蟬吟抱枯枝。枯枝時飛揚。身體忽遷移。不悲身遷移。但惜歲月馳。歲月無窮極。會合安可知。願爲雙黃鶴。比翼戲清池。

又清河作一首

方舟戲長水。湛澹自浮沉。絃歌發中流。悲響有餘音。音聲入君懷。悽愴傷人心。心傷安所念。但願恩情深。願爲鷓鴣鳥。雙飛翔北林。

樂府塘上行一首

甄皇后

蒲生我池中。其葉何離離。傍能行仁義。莫若妾自知。衆口鑠黃金。使君生別離。念君去我時。獨愁常苦悲。想見君顏色。感結傷心脾。念君常苦悲。夜夜不能寐。莫以賢豪故。棄捐素所愛。莫以魚賤肉。棄捐葱與薤。莫以麻泉賤。棄捐菅與蒹。

出亦復苦愁。入亦復苦愁。邊地多悲風。樹木何脩脩。從君致獨樂。延年壽千秋。

雜詩二首

劉勳妻王宋

王宋者平虜將軍劉勳妻也。入門二十餘年後。勳悅山陽司馬氏女。以宋無子出之還。於道中作詩二首。

翩翩牀前帳。張以蔽光輝。昔將爾同去。今將爾共歸。絨藏篋笥裏。當復何時披。

【一】

誰言去婦薄。去婦情更重。千里不唾井。況乃昔所奉。遠望未爲遙。峙嶠不得往。

雜詩五首

曹植

明月照高樓。流光正徘徊。上有愁思婦。悲歎有餘哀。借問歎者誰。言是客子妻。君行踰十年。孤妾常獨棲。君若清路塵。妾若濁水泥。浮沉各異勢。會合何時諧。願爲西南風。長逝入君懷。君懷時不開。妾心當何依。

【二】

西北有織婦。綺縞何繽紛。明晨乘機杼。日昃不成文。太息終長夜。悲嘯入青雲。妾身守空房。良人行從軍。自期三年歸。今已歷九春。孤鳥繞樹翔。嗷嗷鳴索羣。願爲南流景。馳光見我君。

【三】
微陰翳陽景。清風飄我衣。遊魚潛綠水。翔鳥薄天飛。眇眇客行士。遙役不得歸。始出嚴霜結。今來白露晞。遊子歎黍離。處者歌式微。慷慨對嘉賓。悽愴內傷悲。

【四】

攬衣出中閨。逍遙步兩楹。閑房何寂寞。綠草被階庭。空室自生風。百鳥翔南征。春思安可忘。憂感與我并。佳人在遠道。妾身獨單甍。懽會難再遇。蘭芝不重榮。人皆棄舊愛。君豈若平生。寄松爲女蘿。依水如浮萍。東身奉衿帶。朝夕不墮傾。儻願終顧盼。永副我中情。

【五】

南國有佳人。榮華若桃李。朝遊江北岸。夕宿湘川沚。時俗薄朱顏。誰爲發皓齒。俛仰歲將暮。榮耀難久恃。

美女篇

美女妖且閑。采桑歧路閒。長條粉冉冉。落葉何翩翩。攘袖見素手。皓腕約金環。頭上金爵釵。腰珮翠琅玕。明珠交玉體。珊瑚閉木難。羅衣何飄飄。輕裾隨風還。顧盼遺光彩。長嘯氣若蘭。行徒用息駕。休者以忘餐。借問女安居。乃在城南端。

青樓臨大路。高門結重關。容華暉朝日。誰不希令顏。媒氏何所營。玉帛不自安。佳人慕高義。求賢良獨難。衆人徒嗷嗷。安知彼所歡。盛年處房室。中夜起長歎。

種葛篇

種葛南山下。葛蔓自成陰。與君初婚時。結髮恩義深。歡愛在枕席。宿昔同衣衾。竊慕棠棣篇。好樂和瑟琴。行年將晚暮。佳人懷異心。恩絕曠不接。我情遂抑沉。出門當何顧。徘徊步北林。下有交頸獸。仰見雙棲禽。攀枝長歎息。淚下霑羅衿。良鳥知我悲。延頸對我吟。昔爲同池魚。今若商與參。往古皆歡遇。我獨困於今。棄置委天命。愁愁安可任。

浮萍篇

浮萍寄清水。隨風東西流。結髮辭嚴親。來爲君子仇。恪勤在朝夕。無端獲罪尤。在昔蒙恩惠。和樂如瑟琴。何意今摧頽。曠若商與參。茱萸自有芳。不若桂與蘭。新人雖可愛。無若故人歡。行雲有返期。君恩儻中還。慊慊仰天歎。愁愁將何愬。日月不常處。人生忽若寓。悲風來入懷。淚下如垂露。發篋造袞衣。裁縫執與素。

棄婦詩一首

石榴植前庭。綠葉搖標青。丹華灼烈烈。帷彩有光榮。光好曄流離。可以戲淑靈。

有鳥飛來集。樹翼以悲鳴。悲鳴復何爲。丹華實不成。拊心長歎息。無子當歸甯。
 有子月經天。無子若流星。天月相終始。流星沒無精。棲遲失所宜。下與瓦石并。
 憂懷從中來。歎息通鷄鳴。反側不能寐。道遙於前庭。峙嶠還入房。肅肅帷幕聲。
 舉帷更攝帶。撫節彈素箏。慷慨有餘音。要妙悲且清。收淚長歎息。何以負神靈。
 招搖待霜露。何必春夏成。晚穫爲良實。願君且安甯。

樂府詩二首

魏明帝

昭昭素明月。輝光燭我牀。愛人不能寐。耿耿夜何長。微風衝閭闔。羅幃自飄颺。
 攬衣曳長帶。展履下高堂。東西安所之。徘徊以彷徨。春鳥向南飛。翩翩獨翱翔。
 悲聲命儔匹。哀鳴傷我腸。感物懷所思。泣涕忽霑裳。佇立吐高吟。舒憤訴穹蒼。

【二】

種瓜東井上。冉冉自踰垣。與君新爲婚。瓜葛相結連。寄託不肖軀。有如倚太山。
 菟絲無根株。蔓延自登緣。萍藻託清流。常恐身不全。被蒙邱山惠。賤妾執拳拳。
 天日照知之。想君亦俱然。

詠懷詩二首

阮籍

二妃遊江濱。逍遙從風翔。交甫解環珮。婉孌有芬芳。猗靡情歡愛。千歲不相忘。

傾城迷下蔡。容好結中腸。感激生憂思。萱草樹蘭房。膏沐爲誰施。其雨怨朝陽。
 如何金石交。一旦更離傷。

【二】

昔日繁華子。安陵與龍陽。天天桃李花。灼灼有輝光。悅懌若九春。磬折似秋霜。
 流眄發媚姿。言笑吐芬芳。攜手等歡愛。宿昔同衾裳。願爲雙飛鳥。比翼共翱翔。
 丹青著明誓。永世不相忘。

青青河邊草篇

傅元

青青河邊草。悠悠萬里道。草生在春時。遠道還有期。春至草不生。期盡歎無聲。
 感物懷思心。夢想發中情。夢君如鴛鴦。比翼雲間翔。既覺寂無見。曠如參與商。
 夢君結同心。比翼遊北林。既覺寂無見。曠如商與參。河洛自用固。不如中岳安。
 回流不及反。浮雲往自還。悲風動思心。悠悠誰知者。懸景無停居。忽如馳驅馬。
 傾耳懷音響。轉目淚雙墮。生存無會期。要君黃泉下。

苦相篇 豫章行

苦相身爲女。卑陋難再陳。男兒當門戶。墮地自生神。雄心志四海。萬里望風塵。
 女育無欣愛。不爲家所珍。長大避深室。藏頭羞見人。垂淚適他鄉。忽如雨絕雲。

低頭和顏色。素齒結朱唇。跪拜無復數。婢妾如嚴賓。情合同雲漢。葵藿仰陽春。心乖甚水火。百惡集其身。玉顏隨年變。丈夫多好新。昔為形與影。今為胡與秦。胡秦時相見。一絕踰參辰。

有女篇 豔歌行

有女懷芬芳。提提步東箱。蛾眉分翠羽。明目發清揚。丹脣鬢皓齒。秀色若珪璋。巧笑露權靨。衆媚不可詳。容儀希出世。無乃古毛嫱。頭安金步搖。耳繫明月璫。珠環約素腕。翠爵垂鮮光。文袍綴藻黼。玉體映羅裳。容華既以豔。志節擬秋霜。徵音貫青雲。聲響流四方。妙哉英媛德。宜配侯與王。靈應萬世合。日月時相望。媒氏陳東帛。羔雁鳴前堂。百兩盈中路。起若鸞鳳翔。凡夫徒踴躍。望絕殊參商。

朝時篇 怨歌行

昭昭朝時日。皎皎晨明月。十五入君門。一別終華髮。同心忽異離。曠如胡與越。胡越有會時。參辰遠且闊。形影無髮鬢。音聲寂無達。織絃感促柱。觸之哀聲發。情思如循環。憂來不可遏。陰山有餘恨。詩人詠採葛。蜻蛉吟牀下。回風起幽闕。春榮隨露落。芙蓉生木末。自傷命不遇。良辰永乖別。已余可奈何。譬如執素裂。孤雌翔故巢。星流光景絕。魂神馳萬里。甘心要同穴。

明月篇

皎皎明月光。灼灼朝日暉。昔為春繭絲。今為秋女衣。丹脣列素齒。翠彩發蛾眉。嬌子多好言。歡合易為姿。玉顏盛有時。秀色隨年衰。常恐新開舊。變故與細微。浮萍無根本。非水將何依。憂喜更相接。樂極還自悲。

秋蘭篇

秋蘭蔭玉池。池水清且芳。芙蓉隨風發。中有雙鴛鴦。雙魚自踴躍。兩鳥時迴翔。君期歷九秋。與妾同衣裳。

西長安行

所思兮何在。乃在西長安。何用存問妾。香橙雙珠環。何用重存問。羽爵翠琅玕。今我兮聞君。更有兮異心。香亦不可燒。環亦不可沉。香燒日有歇。環沉日自深。

和班氏詩一首

秋胡納令室。三日宦他鄉。皎皎潔婦姿。泠泠守空房。燕婉不終夕。別如參與商。憂來猶四海。易感難可防。人言生日短。愁者苦夜長。百草揚春華。攘腕採柔桑。素手尋繁枝。落葉不盈筐。羅衣鬢玉體。廻目流彩章。君子倦仕歸。車馬如龍驤。精誠馳萬里。既至兩相忘。行人悅令顏。請息此樹傍。誘以逢郎喻。遂下黃金裝。

烈烈貞女忿。言辭厲秋霜。長驅及居室。奉金升北堂。母立呼婦來。歡情樂未央。秋胡見此婦。惕然懷探湯。負心豈不慚。永誓非所望。清濁必異源。鳧鳳不並翔。引身赴長流。果哉潔婦腸。彼夫既不淑。此婦亦太剛。

情詩五首

張華

北方有佳人。端坐鼓鳴琴。終晨撫管弦。日夕不成音。爰來結不解。我思存所欽。君子尋時役。幽妾懷苦心。初爲三載別。於今久滯淫。昔邪生戶牖。庭內自成林。翔鳥鳴翠隅。草蟲相和吟。心悲易感激。俛仰淚流衿。願託晨風翼。東帶侍衣衾。

【二】

明月曜清景。臚光照元墀。幽人守靜夜。廻身入空帷。東帶俟將朝。廓落晨星稀。寐假交精爽。覲我佳人姿。巧笑媚權壓。聯媚眸與眉。寐言增長歎。悽然心獨悲。

【三】

清風動帷簾。晨月燭幽房。佳人處遐遠。蘭室無容光。衿懷擁虛景。輕衾覆空牀。居歡惜夜促。在覺怨宵長。撫枕獨吟歎。綿綿心內傷。

【四】

君居北海陽。妾在南江陰。懸邈脩途遠。山川阻且深。承歡注隆愛。結分投所欽。

銜思守篤義。萬里託微心。

【五】

游目四野外。逍遙獨延竚。蘭蕙綠清渠。繁華蔭綠渚。佳人不在茲。取此欲誰與。巢居覺風飄。穴處識陰雨。未曾遠別離。安知慕儔侶。

雜詩二首

逍遙遊春宮。容與綠池阿。白蘋開素葉。朱草茂丹花。微風搖菡若。層波動芰荷。榮彩曜中林。流馨入綺羅。王孫遊不歸。修路邈以遐。誰與翫遺芳。佇立獨咨嗟。

【二】

在苒日月運。寒暑忽流易。同好遊不存。茗茗遠離析。房櫺自來風。戶庭無行跡。蕪葭生牀下。蛛蝥網四壁。懷思豈不隆。感物重鬱積。游雁比翼翔。歸鴻知接翻。來哉彼君子。無愁徒自隔。

內顧詩二首

潘岳

靜居懷所歎。登城望四澤。春草鬱青青。桑柘何奕奕。芳林振朱榮。綠水激素石。初征水未泮。忽焉袵絺綌。漫漫三千里。茗茗遠行客。馳情戀朱顏。寸陰過盈尺。夜愁極清晨。朝悲終日夕。山川信悠永。願言良弗獲。引領訊歸雲。沉思不可釋。

【二】

獨悲安所慕。人生若朝露。綿邈寄絕域。眷戀想平素。爾情既來追。我心亦還顧。形體隔不達。精爽交中路。不見山上松。隆冬不易故。不見陵澗栢。歲寒守一度。無謂希是疎。在遠分彌固。

悼亡詩二首

在苒冬春謝。寒暑忽流易。之子歸窮泉。重壤永幽隔。私懷誰克從。淹留亦何益。儻仰恭朝命。迴心反初役。望廬思其人。入室想所歷。幃屏無髣髴。翰墨有餘迹。流芳未及歇。遺掛猶在壁。帳幔如或存。回遑忡驚惕。如彼翰林鳥。雙棲一朝隻。如彼游川魚。比目中路析。春風綠隙來。晨雷依簷滴。寢息何時忘。沉憂日盈積。庶幾有時衰。莊缶猶可擊。

【三】

皎皎窓中月。照我室南端。清商應秋至。溽暑隨節闌。涼涼涼風升。始覺夏衾單。豈曰無重纊。誰與同歲寒。歲寒無與同。朗月何飄颻。展轉眄枕席。長簟竟牀空。牀空委清塵。室虛來悲風。獨無李氏靈。彷彿視爾容。撫衿長歎息。不覺涕霑胸。霑胸安能已。悲懷從中起。寢興目存形。遺音猶在耳。上慙東門吳。下媿蒙莊子。

賦詩欲言志。零落難具紀。命也可奈何。長戚自令鄙。

王昭君辭一首

石崇

王明君者本為王昭君以觸文帝諱故改何奴盛請婚於漢元帝詔以後宮良家女子明君配焉昔公主嫁烏孫令琵琶馬上作樂以慰其道路之思其送明君亦必爾也其新造之曲多哀聲故叙之於紙云爾

我本漢家子。將適單于庭。辭決未及終。前驅已抗旌。僕御涕流離。轅馬為悲鳴。哀鬱傷五內。泣淚霑珠纓。行行日已遠。乃造匈奴城。延我於穹廬。加我閼氏名。殊類非所安。雖貴非所榮。父子見凌辱。對之慙且驚。殺身良未易。默默以苟生。苟生亦何聊。積思常憤盈。願假飛鴻翼。乘之以遐征。飛鴻不我顧。佇立以屏營。昔為匣中玉。今為糞土英。朝華不足歡。甘為秋草并。傳語後世人。遠嫁難為情。

嬌女詩一首

左思

吾家有嬌女。皎皎頗白皙。小字為執素。口齒自清歷。鬢髮覆廣額。雙耳似連璧。明朝弄梳臺。黛眉類掃跡。濃朱衍丹唇。黃吻瀾漫赤。嬌語若連瑣。忿速乃明憤。握筆利彤管。篆刻未期益。執書愛綈素。誦習矜所獲。其姊字惠芳。面目皎如畫。輕妝喜樓邊。臨鏡忘紡績。舉觴擬京兆。立的成復易。玩弄眉頰閒。劇兼機杼役。

從容好趙舞。延袖像飛翮。上下弦柱際。文史輒卷裝。顧眄屏風畫。如見已指摘。丹青日塵闇。明義為隱蹟。馳驚翔園林。菓下皆生摘。紅葩掇紫蒂。萍實驟抵擲。貪華風雨中。倏忽數百適。務躡霜雪戲。重綦常累積。并心注肴饌。端坐理盤榻。翰墨戢閑按。相與數離迷。動為鱸鉅屈。屢履任之適。止為茶菽據。吹噓對鼎鑊。脂膩漫白袖。烟熏染阿錫。衣被皆重地。難與沉水碧。任其孺子意。羞受長者責。警聞當與杖。掩淚俱向壁。

玉臺新詠卷三

陳尚書左僕射太子少傅東海徐陵孝穆編

擬古七首

陸機

擬西北有高樓

高樓一何峻。茗茗峻而安。綺窗出塵冥。飛階躡雲端。佳人撫琴瑟。織手清且閑。芳草隨風結。哀響覆若蘭。玉容誰能顧。傾城在一彈。佇立望日昃。躑躅再三歎。不怨佇立久。但願歌者歡。思駕歸鴻羽。比翼雙飛翰。

擬東城一何高

西山何其峻。層曲鬱崔嵬。零露彌天墜。蕙葉憑林衰。寒暑相因襲。時逝忽如遺。三閭結飛轡。大壘悲落暉。曷為牽世務。中心恨有違。京洛多妖麗。玉顏倖瓊葦。閑夜撫鳴琴。惠音清且悲。長歌赴促節。哀響逐高徽。一唱萬夫歡。再唱梁塵飛。思為河曲鳥。雙遊豐水湄。

擬蘭若生春陽

嘉樹生朝陽。凝霜封其條。執心守時信。歲寒不敢彫。美人何其曠。灼灼在雲霄。隆想彌年時。長嘯入風飄。引領望天末。譬彼向陽翹。

擬茗茗牽牛星

昭昭天漢暉。粲粲光天步。牽牛西北向。織女東南顧。華容一何冶。揮手如振素。怨彼河無梁。悲此年歲暮。跋彼無良緣。院焉不得度。引領望大川。雙涕如露露。

擬青青河畔草

靡靡江蘼草。熠熠生河側。皎皎彼姝女。阿那當軒織。粲粲妖容姿。灼灼華美色。良人遊不歸。偏棲獨隻翼。空房來悲風。中夜起歎息。

擬庭中有奇樹

歡友蘭時往。迢迢匿音徽。虞淵引絕景。四節遊若飛。芳草久已茂。佳人竟不歸。躑躅遊林渚。惠風入我懷。感物戀所歡。采此欲貽誰。

擬涉江采芙蓉

上山采瓊藥。穹谷饒芳蘭。采采不盈掬。悠悠懷所歡。故鄉一何曠。山川阻且難。沈思鍾萬里。躑躅獨吟歎。

爲顧彥先贈婦二首

辭家遠行遊。悠悠三千里。京洛多風塵。素衣化爲淄。修身悼憂苦。感念同懷子。隆思亂心曲。沈歎滯不起。歡沈難克興。心亂誰爲理。願假歸鴻翼。翻飛浙江汜。

【三】

東南有思婦。長歎充幽閨。借問歎何爲。佳人眇天末。遊宦久不歸。山川修且濶。形影參商乖。音息曠不達。離合非有常。譬彼弦與筥。願保金石志。慰妾長飢渴。

爲周夫人贈車騎一首

碎碎織細練。爲君作構襦。君行豈有願。憶君是妾夫。昔者得君書。聞君在高平。今時得君書。聞君在京城。京城華麗所。瓊瑤多異端。男兒多遠志。豈知妾念君。昔者與君別。歲聿薄將暮。日月一何速。素秋墜湛露。湛露何冉冉。思君隨歲晚。

對食不能殮。臨觴不能飯。

樂府三首

豔歌行

扶桑升朝暉。照此高臺端。高臺多妖麗。洞房出清顏。淑貌曜皎日。惠心清且閑。美目揚玉澤。蛾眉象翠翰。鮮膚一何潤。彩色若可餐。窈窕多容貌。婉媚巧笑言。暮春春服成。粲粲綺與紈。金雀垂藻翹。瓊珮結瑤璫。方駕揚清塵。濯足洛水澗。藹藹風雲會。佳人一何繁。南崖充羅幕。北渚盈軒軒。清川含藻景。高岸被華丹。馥馥芳袖揮。泠泠纖指彈。悲歌吐清音。雅舞播幽蘭。丹唇含九秋。妍迹凌七盤。赴曲迅鷺鴻。蹈節如集鸞。綺態隨顏變。澄姿無定源。俯仰紛阿那。顧步咸可歡。遺芳結飛颺。浮景映清湍。冶容不足詠。春游良可歎。

前緩聲歌

遊仙聚靈族。高會層城阿。長風萬里舉。慶雲鬱嵯峨。宓妃興洛浦。王韓起秦華。北徵瑤臺女。南要湘川娥。肅肅霄駕動。翩翩翠蓋羅。羽旗棲瑣鸞。玉衡吐鳴和。太容揮高絃。洪崖發清歌。獻酬既已周。輕軒垂紫霞。總轡扶桑枝。濯足鳴谷波。清暉溢天門。垂慶惠皇家。

塘上行

江離生幽渚。微芳不足宜。被蒙風雨會。移君華池邊。發藻玉臺下。垂影滄浪淵。沾潤既已渥。結根奧且堅。四節遊不處。繁華難久鮮。淑氣與時殞。餘芳隨風捐。天道有遷易。人理無常全。男權智傾愚。女愛衰避妍。不惜微軀退。但懼蒼蠅前。願君廣末光。照妾薄暮年。

爲顧彥先贈婦往返四首

陸雲

我在三川陽。子居五湖陰。山海一何曠。譬彼飛與沈。目想清惠姿。耳存淑媚音。獨寐多遠念。寤言撫空衿。彼美同懷子。非爾誰爲心。

【二】

悠悠君行邁。覺覺妾獨止。山河安可踰。永隔路萬里。京室多妖冶。粲粲都人子。雅步嫋纖腰。巧笑發皓齒。佳麗良可羨。衰賤焉足紀。遠蒙眷顧言。銜恩非望始。

【三】

翩翩飛蓬征。郁郁寒木榮。遊止固殊性。浮沈豈一情。隆愛結在昔。信誓貫三靈。乘心金石固。豈從時俗傾。美目逝不顧。纖腰徒盈盈。何用結中款。仰指北辰星。

【四】

浮海難爲水。游林難爲觀。容色貴及時。朝華忌日晏。皎皎彼姝子。灼灼懷春粲。西城善雅舞。總章饒清彈。鳴簧發丹脣。朱絃繞素腕。輕裾猶電揮。雙袂如霞散。華容溢藻幄。哀響入雲漢。知音世所希。非君誰能讚。棄置北辰星。問此元龍煥。時暮勿復言。華落理必賤。

雜詩一首

張協

秋夜涼風起。清氣薄暄濁。蜻蛉吟階下。飛蛾拂明燭。君子從遠役。佳人守竟獨。離居幾何時。鑽燧忽改木。房櫺無行迹。庭草萎已綠。青箔依空牆。蜘蛛網四屋。感物多所懷。沈憂結心曲。

合歡詩五首

楊方

虎嘯谷風起。龍躍景雲浮。同聲好相應。同氣自相求。我情與子親。譬如影追軀。食共並根穗。飲共連理杯。衣用雙絲絹。寢共無縫綈。居願接膝坐。行願攜手趨。子靜我不動。子遊我無留。齊彼同心鳥。譬此比目魚。情至斷金石。膠漆未爲牢。但願長無別。合形作一軀。生爲併身物。死爲同棺灰。秦氏自言至。我情不可儔。

【一】

磁石招長鍼。陽燧下炎烟。宮商聲相和。心同自相親。我情與子合。亦如影追身。

寢共織成被。絮用同功綿。暑搖比翼扇。寒坐並肩氈。子笑我必哂。子感我無懼。來與子共迹。去與子同塵。齊彼蚤蚤獸。舉動不相捐。惟願長無別。合形作一身。生有同室好。死成併棺民。徐氏自言至。我情不可陳。

【三】

獨坐空室中。愁有數千端。悲響答愁歎。哀涕應苦言。彷徨四顧望。白日入西山。不覩佳人來。但見飛鳥還。飛鳥亦何樂。夕宿自作羣。

【四】

飛黃銜長轡。翼翼回輕輪。俯涉綠水澗。仰過九層山。修途曲且險。秋草生兩邊。黃華如杏金。白花如散銀。青敷羅翠彩。絳葩象赤雲。爰有承露枝。紫榮合素芬。扶疎垂清藻。布翹芳且鮮。目爲豔彩迴。心爲奇色旋。撫心悼孤客。俯仰還自憐。峙嶂向壁歎。攬筆作此文。

【五】

南鄰有奇樹。承春挺素華。豐翹被長條。綠葉蔽朱柯。因風吐微音。芳氣入紫霞。我心羨此木。願徙著余家。夕得遊其下。朝得弄其葩。爾根深且堅。余宅淺且洿。移植良無期。歎息將如何。

七夕觀織女一首

王鑒

牽牛悲殊館。織女悼離家。一稔期一霄。此期良可嘉。赫奕元門開。飛閣鬱嵯峨。隱隱驅千乘。闔闔越星河。六龍奮瑤轡。文螭負瓊車。火丹乘瑰燭。素女執瓊華。絳旗若吐電。朱蓋如振霞。雲韶何嘈嗽。靈鼓鳴相和。亭軒紆高盼。眷余在岌峩。澤因芳露霑。恩附蘭風加。明發相從遊。翩翩鸞鷲羅。同遊不同觀。念子憂怨多。敬因三祝末。以爾屬皇娥。

嘲友人一首

李充

同好齊歡愛。纏綿一何深。子既識我情。我亦知子心。媿婉歷年歲。和樂如瑟琴。良辰不我俱。中澗似商參。爾隔北山陽。我分南川陰。嘉會罔克從。積思安可任。目想妍麗姿。耳存清媚音。修畫與永念。遙夜獨悲吟。逝將尋行役。言別涕霑襟。願爾降玉趾。一顧重千金。

夜聽搗衣一首

曹昆

寒興御執素。佳人理衣檢。冬夜清且永。皓月照堂陰。織手疊輕素。朗杵叩鳴砧。清風流繁節。迴颺灑微吟。嗟此往運速。悼彼幽滯心。二物感余懷。豈但聲與音。

擬古詩一首

陶潛

日暮天無雲，春風扇微和。佳人美清夜，遠曙酣且歌。歌竟長歎息，持此感人多。明明雲開月，灼灼葉中華。豈無一時好，不久當如何。

擬相逢狹路閒

荀昶

朝發邯鄲邑，暮宿井陘閒。井陘一何狹，車馬不得旋。邂逅相逢值，崎嶇交一言。一言不容多，伏軾問君家。君家誠難知，艱知復易博。南面平原居，北趣相如閣。飛樓臨名都，通門枕華郭。入門無所見，但見雙棲鶴。棲鶴數十雙，鴛鴦羣相追。大兄珥金璫，中兄振纓綬。伏臘一來歸，鄰里生光輝。小弟無所作，聞雞東陌遠。大婦織紈綺，中婦縫羅衣。小婦無所作，挾瑟弄音徽。大人且卻坐，梁塵將欲飛。

擬青青河邊草

熒熒山上火，茗茗隔隴左。隴左不可至，精爽通寤寐。寤寐衾幃同，忽覺在他邦。他邦各異邑，相逐不相及。迷墟在望煙，木落知冰堅。升朝各自進，誰肯相攀牽。客從北方來，遺我端弋綈。命僕開弋綈，中有隱起珪。長跪讀隱珪，辭苦聲亦悽。上言各努力，下言長相懷。

雜詩二首

王微

桑妾獨何懷，傾筐未盈把。自言悲苦多，排卻不肯捨。妾悲叵陳訴，填憂不銷冶。

寒雁歸所從，半途失憑假。壯情忤軀馳，猛氣捍朝社。常懷雪漢慙，常欲復周雅。重名好銘勅，輕軀願圖寫。萬里度沙漠，懸師蹈朔野。傳聞兵失利，不見來歸者。奚處理殄磨，何處喪車馬。拊心悼恭人，零淚覆而下。徒謂久別離，不見長孤寡。寂寂掄高門，寥寥空廣廈。待君竟不歸，收顏今就檟。

【二】

思婦臨高臺，長想憑華軒。弄弦不成曲，哀歌若送言。帶帶留江介，良人處雁門。詎憶無衣苦，但知狐白溫。日暗牛羊下，野雀滿空園。孟冬寒風起，東壁正中昏。朱火獨照人，抱景自愁怨。誰知心曲亂，所思不可論。

七月七日詠牛女

謝惠連

落日隱欄楹，升月照房櫺。團團滿葉露，析析振條風。躒足循廣塗，瞬目曜層穹。雲漢有靈匹，彌年闊相從。遐川阻暉愛，修渚曠清容。弄杼不成彩，聳轡驚前蹤。昔離秋已兩，今聚夕無雙。傾河易迴幹，款顏難久怱。沃若靈駕旋，寂寥雲幄空。留情願華寢，遙心逐奔龍。沈吟爲爾感，情深意彌重。

擣衣

衡紀無淹度，晷運倏如摧。白露滋園菊，秋風落庭槐。肅肅莎雞羽，烈烈寒蠶啼。

夕陰結空幕。霽月皓中閨。美人戒裳服。端飭相招攜。簪玉出北房。鳴金步南階。欄高砧響發。櫺長杵聲哀。微芳起兩袖。輕汗染雙題。執素既已成。君子行不歸。裁用筒中刀。縫爲萬里衣。盈篋自予手。幽絨俟君開。腰帶准疇昔。不知今是非。

代古

客從遠方來。贈我鶴文綾。貯以相思篋。絨以同心繩。裁爲親身服。著以俱寢興。別來經年歲。歡心不可凌。瀉酒置井中。誰能辨斗升。合如栝中水。誰能判淄澠。

代行行重行行

劉鑠

眇眇凌羨道。遙遙行遠之。迴車背京里。揮手於此辭。堂上流塵生。庭中綠草滋。寒蠶翔水曲。秋兔依山基。芳年有華月。佳人無還期。日夕涼風起。對酒長相思。悲發江南調。憂委子衿詩。臥看明鏡晦。坐見輕紈縞。淚容曠不飭。幽鏡難復治。願垂薄暮景。照妾桑榆時。

代明月何皎皎

落宿半遙城。浮雲滿層闕。玉宇來清風。羅帳延秋月。結思想伊人。沈憂懷明發。誰謂行客遊。屢見流芳歇。河廣川無梁。山高路難越。

代孟冬寒氣至

白露秋風始。秋風明月初。明月照高樓。白露皎元除。迨及涼雲起。行見寒林疎。客從遠方至。贈我千里書。先敘懷舊愛。末陳久離居。一章意不盡。三復情有餘。願逐平生眷。無使甘言虛。

代青青河畔草

淒淒含露臺。肅肅迎風館。思女御樞軒。哀心徹雲漢。端撫悲弦泣。獨對明鏡歎。良人久徭役。耿介終昏旦。楚楚秋水歌。依依採菱彈。

詠牛女

秋動清氛扇。火移炎氣歇。廣欄含夜陰。高軒通夕月。安步巡芳林。傾望極雲闕。組幕縈漢陳。龍駕凌霄發。誰云長河遙。願覺促筵越。沈情未申寫。飛光已飄忽。來對眇難期。今歡自茲沒。

擬行行重行行

陸機

悠悠行邁遠。戚戚憂思深。此思亦何思。思君微與音。音微日夜離。緜邈若飛沈。王鮪懷河軸。晨風悲北林。遊子眇天末。還期不可尋。驚飈蹙反信。歸雲難寄音。佇立想萬里。沈憂萃我心。攬衣有餘帶。循形不盈襟。去去遺情累。安處撫清琴。擬明月何皎皎。

安寢北堂上。明月入我牖。照之有餘輝。攬之不盈手。涼風繞曲房。寒蟬鳴高柳。踟躕感節物。我行永已久。遊宦會無成。離思難獨守。

玉臺新詠卷四

陳尚書左僕射太子少傅東海徐陵孝穆編

七夕月下一首

王僧達

遠山斂_二雰_一。廣庭揚_二月波_一。氣往風集隙。秋還露_二法柯_一。節期既已屆。中霄振_二綺羅_一。來歡詎終夕。收淚泣_二分河_一。

爲織女贈牽牛

顏延之

婺女儼_二經星_一。嫦娥棲_二飛月_一。慙無_二二媛靈_一。託身侍_二天闕_一。閭闔殊未暉。咸池豈沐髮。淡陰不久張。長河爲誰越。雖有促_二讎期_一。方須涼風發。虛計_二雙曜周_一。空遲_二三星沒_一。非怨_二杼軸勞_一。但念_二芳菲歇_一。

秋胡詩一首

倚梧傾高鳳。寒谷待鳴律。影響豈不懷。自遠每相匹。婉彼幽閑女。作嬪君子室。

峻節貫_二秋霜_一。明豔俾_二朝日_一。嘉運既我從。欣願自此畢。燕居未及好。良人顧有違。脫巾千里外。結綬登_二王畿_一。戒徒在_二昧旦_一。左右來相依。驅車出_二郊郭_一。行路正威遲。存爲久離別。沒爲長不歸。嗟余怨_二行役_一。三陟窮_二晨暮_一。嚴駕越_二風寒_一。解鞍犯_二霜露_一。原隰多_二悲涼_一。迴颺卷_二高樹_一。離獸起_二荒蹊_一。驚鳥縱_二橫去_一。悲哉遊_二宦子_一。勞此山川路。迢遙行人遠。婉轉年運徂。良時爲_二此別_一。日月方_二向除_一。孰知寒_二暑積_一。僂俛見_二榮枯_一。歲暮臨_二空房_一。涼風起_二座隅_一。寢興日_二已寒_一。白露生_二庭蕪_一。勤役從_二歸顧_一。反路遵_二山河_一。昔辭秋未素。今也歲載_二華_一。蠶月觀_二時暇_一。桑野多_二經過_一。佳人從_二所務_一。窈窕援_二高柯_一。傾城誰不顧。弭節停_二中阿_一。年往誠_二思勞_一。事遠濶_二音形_一。雖爲_二五載別_一。相與昧_二平生_一。捨車遵_二往路_一。鳧藻馳_二目成_一。南金豈_二不重_一。聊自意_二所輕_一。義心多_二苦調_一。密比_二金玉聲_一。高節難_二久淹_一。竭來空_二復辭_一。遲遲前_二途盡_一。依依造_二門基_一。上堂拜_二嘉慶_一。入室問_二何之_一。日暮行_二采歸_一。物色桑_二榆時_一。美人望_二昏至_一。慙歎前_二相持_一。有懷誰_二能已_一。聊用申_二苦難_一。離居殊_二年載_一。一別阻_二河關_一。春來無_二時豫_一。秋至應_二早寒_一。明發動_二愁心_一。聞中起_二長歎_一。慘悽歲_二方晏_一。日落遊_二子顏_一。高張生_二絕弦_一。聲急由_二調起_一。自昔枉_二光塵_一。結言固_二終始_一。如何久_二爲別_一。百行愆_二諸已_一。君子失_二明義_一。誰與借_二沒齒_一。媿彼行_二露詩_一。甘之長_二川汜_一。

甌月城西門

鮑照

始見西南樓。織織如玉鉤。末映東北墀。娟娟似蛾眉。蛾眉蔽珠籠。玉鉤隔綺窗。
 三五二八時。千里與君同。夜移衡漢落。徘徊帷幌中。歸華先委露。別葉早辭風。
 客遊厭辛苦。仕子倦飄塵。休澣自公日。晏慰及私晨。蜀琴抽白雪。郢曲繞陽春。
 看乾浮未缺。金壺啓夕輪。迴軒駐輕蓋。留酌待情人。

代京洛篇

鳳樓十二重。四戶八綺窗。肅栢金蓮華。桂柱玉盤龍。珠簾無隔露。羅幌不勝風。
 寶帳三千萬。爲爾一朝容。揚芬紫烟上。垂綵綠雲中。春吹迴白日。霜歌落塞鴻。
 但懼秋塵起。盛愛逐衰蓬。坐視青落滿。臥對錦筵空。琴筑縱橫散。舞衣不復縫。
 古來皆歇薄。君意豈獨濃。惟見雙黃鶴。千里一相從。

擬樂府白頭吟

直如朱絲繩。清如玉壺冰。何慙宿昔意。猜恨坐相仍。人情賤恩舊。世義逐衰興。
 毫髮一爲瑕。邱山不可勝。食苗實碩鼠。黠白信蒼蠅。身鶴遠成美。薪芻前見凌。
 申黜褒女進。班去趙姬升。周王日淪惑。漢帝益嗟稱。心賞猶難恃。貌恭豈易憑。
 古來共如此。非君獨撫膺。

採桑詩

季春梅始落。女工事蠶作。採桑淇水閒。還戲上宮閣。早蒲時結陰。晚篁初解箨。
 萋萋霧滿闈。融融景盈幕。乳燕逐草蟲。巢蜂拾花萼。是節最暄妍。佳服又新爍。
 歛歎對回塗。揚歌弄場藿。抽琴試杼思。薦瓠果成託。承君郢中美。服義久心諾。
 衡風古愉豔。鄉俗舊浮薄。虛願悲渡湘。空賦笑灑洛。盛明難重來。淵意爲誰涸。
 君其且調絃。桂酒妾行酌。

夢還詩

銜淚出郭門。撫劍無人送。沙風聞塞起。離心眷鄉畿。夜分就孤枕。夢想暫言歸。
 嬌婦當戶笑。纈絲復鳴機。慷慨論久別。相將還綺帷。靡靡蒼下涼。臙臙窗裏輝。
 刈蘭爭芬芳。採菊競葳蕤。閒奩集香蕪。探袖解纓微。寐中長路近。覺後大江違。
 驚起空歎息。恍惚神魂飛。白水漫浩浩。高山壯巍巍。波潮異往復。風霜改榮衰。
 此土非吾土。慷慨當訴誰。

擬古

河畔草未黃。胡雁已嬌翼。秋蛩扶戶吟。寒婦晨夜織。去歲征人還。流傳舊相識。
 聞君上隴時。東望久歎息。宿昔衣帶改。且暮異容色。念此憂如何。夜長憂向多。
 明鏡塵匣中。寶瑟生網羅。

詠雙燕

雙燕戲雲崖。羽翮始差池。出入南閨裏。經過北堂墀。意欲巢君幕。層楹不可窺。沈吟方歲晚。徘徊韶景移。悲歌辭舊愛。銜泥覓新知。

贈故人二首

寒灰滅更燃。夕華晨更鮮。春水雖暫解。冬水復還堅。佳人捨我去。賞愛長絕緣。歡至不留時。每感輒傷年。

【二】

雙劍將別離。先在匣中鳴。煙雨交將夕。從此遂分形。雌沈吳江水。雄飛入楚城。吳江深無底。楚城有崇扃。一爲天地別。豈直阻幽明。神物終不隔。千祀儻還并。

學阮步兵體

王素

沈情發遐慮。紆鬱懷所思。髣髴聞簫管。嗚鳳接羸姬。連縣共雲翼。嫵婉相攜持。寄言芳華士。寵利不常期。涇渭分清濁。視彼谷風詩。

擬樂府四首

吳邁遠

飛來雙白鶴

可憐雙白鶴。雙雙絕塵氛。連翩弄光景。交頸遊青雲。逢羅復逢繳。雌雄一旦分。

哀聲流海曲。孤叫出江濱。豈不慕前侶。爲爾不及羣。步步一零淚。千里猶待君。樂哉新相知。悲來生別離。恃此百年命。共逐寸陰移。譬如空山草。零落心自知。

陽春曲

百里望咸陽。知是帝京城。綠樹搖雲光。春城起風色。佳人愛景華。流靡園塘側。妍姿豔月映。羅衣飄蟬翼。宋玉歌陽春。巴人長歎息。雅鄭不同賞。那令君愴惻。生平重愛惠。私自憐何極。

長別離

生離不可聞。况復長相思。如何與君別。當我盛年時。蕙華每搖蕩。妾心空自持。榮乏草木歡。瘁極霜露悲。富貴身難老。貧賤年易衰。持此斷君腸。君亦宜自疑。淮陰有逸將。折翮謝翻飛。楚亦扛鼎士。出門不得歸。正爲隆準公。仗劍入紫微。君才定何如。白日下爭暉。

長相思

晨有行路客。依依造門端。人馬風塵色。知從河塞還。時我有同棲。結宦遊邯鄲。將不異客子。分飢復共寒。頰君尺帛書。寸心從此殫。遣妾長憔悴。豈復歌笑顏。簷隱千霜樹。庭枯十載蘭。經春不舉袖。秋落寧復看。一見願道意。君門已九關。

虞卿棄相印。擔簦爲同歡。聞陰欲早霜。何事空盤桓。

擬青青河畔草

鮑令暉

裊裊臨窗竹。萋萋垂門桐。灼灼青軒女。泠泠高臺中。明志逸秋霜。玉顏豔春紅。人生誰不別。恨君早從戎。鳴弦愜夜月。紺黛羞春風。

擬客從遠方來

客從遠方來。贈我漆鳴琴。木有相思文。弦有別離音。終身執此調。歲寒不改心。願作陽春曲。宮商長相尋。

題書後寄行人

自君之出矣。臨軒不解顏。砧杵夜不發。高門晝常關。帳中流熠燿。庭前華紫蘭。物枯識節異。鴻來知客寒。遊用暮冬盡。除春待君還。

古意贈今人

寒鄉無異服。衣罷代文練。月月望君歸。年年不解綫。荆揚春早和。幽冀猶霜霰。北寒妾已知。南心君不見。誰爲道辛苦。寄情雙飛燕。形迫杼煎絲。顏落風催電。容華一朝盡。惟餘心不變。

代葛沙門妻郭小玉詩二首

明月何皎皎。垂橫照羅茵。若共相思夜。知同憂怨晨。芳華豈於貌。霜露不憐人。君非青雲逝。飄迹事咸秦。妾持一生淚。經秋復度春。君子將遙役。遺我雙題錦。臨當欲去時。復留相思枕。題用常著心。枕以憶同寢。行行日已遠。轉覺心彌甚。

詠七寶扇

邱巨源

紗縞貴東夏。巧媛出吳闔。裁狀白玉璧。縫似明月輪。表裏鑲七寶。中銜駭雞珍。畫作景山樹。圖爲河洛神。來延揮握翫。入與靈劍親。生風長袖際。晞華紅粉津。拂阿迎嬌意。隱映含歌人。時移務忘故。節改競存新。卷情隨象箆。舒心謝錦茵。厭歇何足道。敬哉先後晨。

聽隣妓

披衽乏遊術。憑軾寡文才。蓬門長自寂。虛席視生埃。貴里臨妝館。東鄰鼓吹臺。雲間嬌響徹。風末豔聲來。飛華瑤翠幄。揚芬金碧杯。久絕中州美。從念尸鄉灰。遺情悲近世。中山安在哉。

古意二首

王融

遊禽暮知反。行人獨不歸。坐銷芳草氣。空度明月輝。嘔容入朝鏡。思淚點春衣。

巫山彩雲沒。淇上綠條稀。待君竟不至。秋雁雙雙飛。

【一】

霜氣下孟津。秋風度函谷。念君淒已寒。當軒卷羅縠。織手廢裁縫。曲鬢罷膏沐。千里不相聞。寸心鬱氛氳。况復飛螢夜。木葉亂紛紛。

詠琵琶

抱月如可明。懷風殊復清。絲中傳意緒。花裏寄春情。掩抑有奇態。悽愴多好聲。芳袖幸時拂。龍門空自生。

詠幔

幸得與珠綴。罽屨君之楫。月映不辭卷。風來輒自輕。每聚金鑪氣。時駐玉琴聲。俱願致尊酒。蘭缸當夜明。

巫山高

想象巫山高。薄暮陽臺曲。煙霞乍舒卷。蘅芳時斷續。彼美如可期。寤言紛在屬。憮然坐相思。秋風下庭綠。

贈王主簿二首

謝朓

日落窗中坐。紅妝好顏色。舞衣裝未縫。流黃覆不織。蜻蛉草際飛。遊蜂花上食。

一遇長相思。願寄連翩翼。

【二】

清吹要碧玉。調弦命綠珠。輕歌急綺帶。含笑解羅襦。餘曲詎幾許。高駕且躊躇。徘徊韶景暮。惟有洛城隅。

同王主簿怨情

掖庭聘絕國。長門失儲護。相逢詠靡蕪。辭寵悲團扇。花叢亂數蝶。風簾入雙燕。徒使春帶賒。坐惜紅顏變。平生一顧重。夙昔千金賤。故人心尚永。故心人不見。

聽妓二首

瓊閨鈿響聞。瑤席芳塵滿。要取洛陽人。共命江南管。情多舞態遲。意傾歌弄緩。知君密見親。寸心傳玉腕。

【三】

上客光四座。佳麗直千金。掛釵報纓絕。墮珥答琴心。蛾眉已共笑。清香復入衿。歡樂夜方靜。翠帳垂沈沈。

詠邯鄲故才人嫁為厮養卒婦

生平宮闈裏。出入侍丹墀。開筵方羅縠。窺鏡比蛾眉。初別意未解。去久日生悲。

顛顛不自識。嬌羞餘故姿。夢中忽髣髴。猶言承讎私。

秋夜

秋夜促織鳴。南鄰搗衣急。思君隔九重。夜夜空佇立。北窗輕幔垂。西戶月光入。何知白露下。坐視前階濕。誰能長分居。秋盡冬復及。

雜詠五首

鏡

發翠斜漢裏。蓄寶宕山峯。抽莖類仙掌。銜光似燭龍。飛蛾再三繞。輕花四五重。孤對相思夕。空照舞衣縫。

燭

杏梁寶未散。桂宮明欲沈。暖色輕幃裏。低光照寶琴。徘徊雲鬢影。灼爍綺疏金。恨君秋夜月。遺我洞房陰。

席

本生朝夕池。落景照參差。汀洲蔽杜若。幽渚奪江蘼。遇君時採楝。玉座奉金卮。但願羅衣拂。無使素塵彌。

鏡臺

玲瓏類丹檻。茗亭似元闕。對鳳懸清冰。垂龍掛明月。照粉拂紅妝。插花埋雲髮。玉顏徒自見。常畏君情歇。

落梅

新葉初冉冉。初葉新霏霏。逢君後園讌。相隨巧笑歸。親勞君玉指。摘以贈南威。用持插雲鬢。翡翠比光輝。日暮長零落。君恩不可追。

中山王孺子妾歌

陸厥

如姬寢臥內。班妾坐同車。洪波陪飲帳。林光宴秦餘。歲暮寒飈及。秋水落芙蓉。子瑕矯後駕。安陵泣前魚。賤妾終已矣。君子定焉如。

雜詩

施榮泰

趙女脩麗姿。燕姬正容飾。妝成桃毀紅。黛起草慙色。羅幃數十重。猶輕一蟬翼。不言穀袖輕。專歎風多力。鏘珮玉池邊。弄笑銀臺側。折柳貽目成。插蒲贈心識。來時嬌未盡。還去媚何極。

朗月行

鮑照

朗月出東山。照我綺窗前。窗中多佳人。被服妖且妍。靚妝坐帷裏。當戶弄清弦。鬢鬢衛女迅。體絕飛燕先。為君歌一曲。當作朗月篇。酒至顏自解。聲和心亦宣。

千金何足重。所存意氣閒。

東門行

傷禽惡弦驚。倦客惡離聲。離聲斷客情。賓御皆涕零。涕零心斷絕。將去復還訣。一息不相知。何況異鄉別。遙遙征駕遠。杳杳白日晚。居人掩閨臥。行子夜中飯。野風吹草木。行子心腸斷。食梅常苦酸。衣葛常苦寒。絲竹徒滿座。憂人不解顏。長歌欲自慰。彌起長恨端。

芳樹

王融

相思早春日。煙華雜如霧。復此佳麗人。含情結芳樹。綺羅已自憐。萱風多有趣。去來徘徊者。佳人不可遇。

迴文詩

枝大柳塞北。葉闊榆關東。垂條逐絮轉。落蕊散花叢。池蓮照曉月。幔錦披朝風。低吹雜綸羽。薄粉點粧紅。離情隔遠道。歎結深閨中。蕭諮議西上夜禁。徘徊將所愛。惜別在河梁。衿袖三春隔。江山千里長。寸心無遠近。邊地有風霜。勉哉勤歲暮。敬矣慎容光。山中殊未憚。杜若空自芳。

銅雀臺妓

謝朓

總韓飄井幹。樽酒若平生。鬱鬱西陵樹。詎聞鼓吹聲。芳襟染淚迹。嬋娟空復情。玉座猶寂寞。况迺妾身輕。

贈故人

芳洲有杜若。可以慰佳期。望望忽超遠。何由見所思。我行未千里。山川已閉之。離居方歲月。佳人不在茲。清風動簾夜。孤月照窗時。安得同攜手。酌酒賦新詩。

別江水曹

山中上芳月。故人清樽賞。遠山翠百重。廻流映千丈。花枝聚如雪。垂藤散似網。別後能相思。何嗟異風壤。

離夜詩

玉繩隱高樹。斜漢映層臺。離堂華燭盡。別幌清琴哀。翻潮尚知恨。客思眇難裁。山川不可盡。况乃故人栢。

詠竹火籠

庭雪亂如花。井水粲成玉。因炎入貂袖。懷溫奉芳縵。體密用宜通。文斜性非曲。暫承君王旨。請謝陽春旭。

楊柳亂如絲。綺羅不自持。春草青復綠。客心傷此時。翠箔已結浦。碧水復盈淇。

詠桃

日華照趙瑟。風色動燕姬。檢中萬行淚。故是一相思。風來吹葉動。風去畏花傷。紅英已照灼。况復含日光。歌童暗理曲。游女夜縫裳。詎減當春淚。能斷思人腸。

詠月

月華臨靜夜。夜靜滅氛埃。方暉竟戶入。圓影隙中來。高樓切思婦。西園遊上才。網軒映珠綴。應門照綠苔。洞房殊未曉。清光信悠哉。

詠柳

輕陰拂建章。夾道連未央。因風結復解。霑露柔且長。楚妃思欲絕。班女淚成行。遊人未應去。爲此歸故鄉。

詠篋

江南簫管地。妙響發孫枝。慙慙寄玉指。含情舉復垂。彫梁再三遶。輕塵四五移。曲中有深意。丹誠君詎知。

六憶詩四首

班婕妤

綾扇如團月。出自機中素。畫作秦王女。乘鸞向煙霧。彩色世所重。雖新不代故。竊悲涼風至。吹我玉階樹。君子恩未畢。零落在中路。

張司空離情

秋月映簾櫳。懸光入丹墀。佳人撫鳴琴。清夜守空帷。蘭徑少行迹。玉臺生網絲。夜樹發紅彩。聞草含碧滋。羅綺爲君整。萬里贈所思。願垂湛露惠。信我皎日期。

休上人怨別

西北秋風至。楚客心悠哉。日暮碧雲合。佳人殊未來。露彩方泛豔。月華始徘徊。寶書爲君掩。瑤琴詎能開。相思巫山渚。悵望雲陽臺。金鑪絕沈燎。綺席徧浮埃。桂水日千里。因之平生懷。

敬酬柳僕射征怨

敬酬柳僕射征怨。清歌自言妍。雅舞空僊僊。耳中解明月。頭上落金鈿。雀飛且近遠。暮入綺窗前。魚戲雖南北。終還荷葉邊。惟見君行久。新年非故年。

答徐侍中爲人贈婦

丈夫吐然諾。受命本遺家。糟糠且棄置。蓬首亂如麻。側聞洛陽客。金蓋翼高車。

謁帝時來下。光景不可奢。幽房一洞啓。二八盡芳華。羅裾有長短。翠鬢無低斜。長眉橫玉臉。皓腕卷輕紗。俱看依井蝶。共取落簷花。何言征戍苦。抱膝空咨嗟。

登高望春

沈約

登高眺京洛。街巷紛漠漠。迴首望長安。城闕鬱盤桓。日出照銅雀。風過動羅幃。齊僮躡朱履。趙女揚翠翰。春風搖雜樹。葳蕤綠且丹。寶瑟玫瑰柱。金羈瑋瑁鞍。淹留宿下蔡。置酒過上蘭。解眉還復歛。方知巧笑難。佳期空靡靡。含睇未成懽。嘉客不可見。因君寄長歎。

昭君辭

朝發披香殿。夕濟汾陰河。於茲懷九逝。自此歛雙蛾。沾妝凝湛露。遠颺狀流波。日見奔沙起。稍覺轉蓬多。胡風犯肌骨。非直傷綺羅。銜涕試南望。關山鬱嵯峨。始作陽春曲。終成苦寒歌。惟有三五夜。明月暫經過。

少年新婚爲之詠

山陰柳家女。莫言出田墅。丰容好姿顏。便辟工言語。腰肢既軟弱。衣服亦華楚。紅輪映早寒。畫扇迎初暑。錦履並花紋。繡帶同心苴。羅襦金薄厠。雲鬢花釵舉。我情已鬱紆。何用表崎嶇。託意眉間黛。申心口上朱。莫爭三春價。坐喪千金軀。

盈尺青銅鏡。徑寸合浦珠。無因遠往意。欲寄雙飛鳥。裾開見玉趾。衫薄映凝膚。羞言趙飛燕。笑殺秦羅敷。自顧雖悴薄。冠蓋曜城隅。高門列駟駕。廣路從驪駒。何慙鹿盧劍。詎減府中趨。還家問鄉里。詎堪持作夫。

雜曲三首

攜手曲

拾轡下彫輅。更衣奉玉牀。斜簪映秋水。開鏡比春妝。所畏紅顏促。君恩不可長。

鷓冠且容裔。豈吝桂枝亡。

有所思

西征登隴首。東望不見家。關樹抽紫葉。塞草發青芽。昆明當欲滿。葡萄應作花。

流淚對漢使。因書寄狹斜。

夜夜曲

河漢縱且橫。北斗橫復直。星漢空如此。寧知心有憶。孤鏡曖不明。寒機曉猶織。

零淚向誰道。雞鳴徒歎息。

雜詠五首

春詠

邯鄲行

陸厥

趙女擷鳴琴。邯鄲紛躡步。長袖曳三街。兼金輕一顧。有美獨臨風。佳人在遐路。相思欲褰袵。叢臺日已暮。

自君之出矣

虞羲

自君之出矣。楊柳正依依。君出無消息。惟見黃鶴飛。關山多險阻。士馬少光輝。流年無止極。君去何時歸。

玉臺新詠卷五

陳尚書左僕射太子少傅東海徐陵孝穆編

古體四首

江淹

古離別

遠與君別者。乃至雁門關。黃雲蔽千里。遊子何時還。送君如昨日。簷前露已闌。不惜蕙草晚。所悲道里寒。君子在天涯。妾心久別離。願一見顏色。不異瓊樹枝。兔絲及水萍。所寄終不移。

憶來時。的的上塔堦。動動聚離別。慊慊道相思。相看常不足。相見乃忘飢。憶坐時。點點羅帳前。或歌四五曲。或弄兩三弦。笑時應無比。嗔時更可憐。憶食時。臨盤動容色。欲坐復羞坐。欲食復羞食。含哺如不飢。擊甌似無力。憶眠時。人眠強未眠。解羅不待勸。就枕更須牽。復恐傍人見。嬌羞在燭前。

十詠二首

領邊繡

織手製新奇。刺作可憐儀。縈絲飛鳳子。結縷坐花兒。不聲如動吹。無風自移枝。麗色儻未歇。聊承雲鬢垂。

脚下履

丹墀上颯沓。玉殿下趨鏘。逆轉珠珮響。先表繡桂香。裾開臨舞席。袖拂繞歌堂。所歎忘懷妾。見委入羅牀。

擬青青河邊草

漠漠牀上塵。中心憶故人。故人不可憶。中夜長歎息。歎息想容儀。不欲長別離。別離稍已久。空牀寄枯酒。

擬三婦

大婦掃玉墀。中婦結羅帷。小婦獨無事。對鏡畫蛾眉。良人且安臥。夜長方自私。

古意

挾瑟叢臺下。徒倚愛容光。佇立日已暮。戚戚苦人腸。露葵已堪摘。淇水未霑裳。錦衾無獨暖。羅衣空自香。明月雖外照。寧知心內傷。

夢見美人

夜聞長歎息。知君心有憶。果自闐闐閉。魂交視容色。既薦巫山枕。又奉齊眉食。立望復橫陳。忽覺非在側。那知神傷者。潺湲淚霑臆。

效古

可憐桂樹枝。單雄憶故雌。歲暮異棲宿。春至猶別離。山河隔長路。路遠絕容儀。豈云無我匹。寸心終不移。

初春

扶道覓陽春。佳人共攜手。草色猶自菲。林中都未有。無事逐梅花。空中信楊柳。且復歸去來。含情寄杯酒。

悼往

去秋三五月。今秋還照房。今春蘭蕙草。來春復吐芳。悲哉人道異。一謝永銷亡。

屏筵空有設。帷席更施張。遊塵掩虛座。孤帳覆空牀。萬事無不盡。徒令存者傷。

擣衣詩一首

柳惲

孤衾引思緒。獨枕愴憂端。深庭秋草綠。高門白露寒。思君起清夜。促柱奏幽蘭。不怨飛蓬苦。徒傷蕙草殘。一行役滯風波。遊人淹不歸。亭皋木葉下。隴首秋雲飛。寒園夕鳥集。思固草蟲悲。嗟兮當春服。安見禦冬衣。鶴鳴勞永歎。採菘傷時暮。念君方遠徭。望妾理絜素。秋風吹綠潭。明月懸高樹。佳人飾淨容。招攜從所務。步欄杳不極。離家肅已屆。軒高夕杵散。氣爽夜砧鳴。瑤華隨步響。幽蘭逐袂生。時曙理金翠。容與納宵清。泛豔迴煙彩。淵旋龜鶴文。淒淒合歡袖。冉冉蘭麝芬。不怨杵軸苦。所悲千里分。垂泣送行李。傾首遲歸雲。

鼓吹曲

獨不見

別鳥望風臺。天淵臨水殿。芳草生未積。春花落如霰。出從張公子。還過趙飛燕。奉帚長信宮。誰知獨不見。

度關山

少長倡家女。出入燕南陲。惟持德自美。本以容見知。舊聞關山遠。何事總金羈。

妾心日已亂。秋風鳴細枝。

雜詩

雲輕色轉暖。草綠晨芳歸。山墟罷寒晦。園澤潤朝暉。春心多感動。睹物情復悲。

自君之出矣。蘭堂罷鳴機。徒知遊宦是。不念別離非。

長門怨

玉壺夜惜惜。應門重且深。秋風動桂樹。流月搖輕陰。綺簷清露滴。網戶思蟲吟。

歎息下蘭閣。含愁奏雅琴。何由鳴曉珮。復得抱宵衾。無復金屋念。豈照長門心。

江南曲

汀洲採白蘋。日落江南春。洞庭有歸客。瀟湘逢故人。故人何不返。春華復應晚。

不道新知樂。且言行路遠。

起夜來

城南斷車騎。閣道覆清埃。露華光翠網。月影入蘭臺。洞房且暮掩。應門或復開。

颯颯秋桂響。悲君起夜來。

七夕穿針

代馬秋不歸。緇紈無復緒。迎寒理夜縫。映月抽織縷。的皪愁睇光。連娟思眉聚。

清露下羅衣。秋風吹玉柱。流陰稍已多。餘光欲難取。

詠席

照日汀洲際。搖風綠潭側。雖無獨繭輕。幸有青袍色。羅袖少輕塵。象牀多麗飾。

願君蘭夜飲。佳人時宴息。

詠歌姬

寶鐏開珠花。分明靚妝點。薄鬢約微黃。輕紅澹鉛臉。發言芳已馳。復加蘭蕙染。

浮聲易傷歎。沈唱安而險。孤轉忽徘徊。雙蛾乍舒斂。不持全示人。半用輕紗掩。

詠舞女

腰纖蔑楚媛。體輕非趙姬。映袷關寶粟。綠肘挂珠絲。發袖已成態。動足復含姿。

斜精若不眴。當轉復遲疑。何慙雲鶴起。詎減鳳鸞時。

詠紅箋

雜彩何足奇。惟紅偏作可。灼爍類渠開。輕明似霞破。鏤質卷芳脂。裁花承百和。

且傳別離心。復是相思裏。不值情幸人。豈識風流座。

詠薔薇

當戶種薔薇。枝葉太葳蕤。不搖香已亂。無風花自飛。春閨不能靜。開匣對明妃。

曲池浮采采。斜岸列依依。或聞好音度。時見銜泥歸。且對清觴湛。其餘任是非。

高爽

初上鳳皇塢。此鏡照蛾眉。言照常相守。不照常相思。虛心會不采。貞明空自欺。

鮑子卿

詠畫扇

細絲不自輕。弱彩何足眇。直爲發紅顏。謾成握中扇。乍奉長門泣。時承柏梁宴。

詠玉階

玉階已夸麗。復得臨紫微。北戶接翠幄。南路低金扉。重疊通日影。參差藏月輝。

學謝體

何子朗

桂臺清露拂。銅陛落花沾。美人紅粧罷。攀鉤捲細簾。思君擊促柱。玉指何纖纖。

和虞記室騫古意

美人弄白日。灼灼當春牖。清鏡對蛾眉。新花映玉手。燕下拾池泥。風來吹細柳。

君子何時歸。與我酌尊酒。

和繆郎視月

清夜未云疲。細簾聊可發。泠泠玉潭水。映見蛾眉月。靡靡露方垂。輝輝光稍沒。佳人復千里。餘影徒揮忽。

詠步搖花

范靖婦

珠華縈翡翠。寶葉閒金瓊。剪荷不似製。爲花如自生。低枝拂繡領。微步動瑤瑛。但令雲鬢插。蛾眉本易成。

戲蕭孌

明珠翠羽帳。金薄綠綃帷。因風時暫舉。想像見芳姿。清晨插步搖。向晚解羅衣。託意風流子。佳情詎肯私。

詠五彩竹火籠

可憐潤霜質。織削復毫分。織作迴風苴。製爲縈綺文。含芳出珠被。曠彩接細幡。徒嗟今麗飾。豈念昔凌雲。

詠燈

綺筵日已暮。羅幃月未歸。開花散鶴彩。含光出九微。風軒動丹焰。冰宇澹清暉。

不吝輕蛾繞。惟恐曉蠅飛。

日夕望江贈魚司馬

何遜

溢城帶溢水。溢水紫如帶。日夕望高城。耿耿青雲外。城中多宴賞。絲竹常繁會。管聲已流悅。弦聲復悽切。歌黛慘如愁。舞腰疑欲絕。仲秋黃葉下。長風正騷屑。早雁出雲歸。故燕辭檐別。晝悲在異縣。夜夢還洛汭。洛汭何悠悠。起望登西樓。的的帆向浦。團團日隱州。誰能一羽化。輕舉逐飛浮。

輕薄篇

城東美少年。重身輕萬億。柘彈隨珠丸。白馬黃金勒。長安九達上。青槐陰道植。穀擊晨已喧。肩排暗不息。走狗通西望。牽牛互南直。相期百戲傍。去來三市側。象牀香繡被。玉盤傳綺食。娼女掩扇歌。小婦扇簾織。相看獨隱笑。見人還歛色。黃鶴悲故羣。山枝詠初識。鳥飛過客盡。雀聚行龍匿。酌羽前厭厭。此時歡未極。

詠照鏡

珠簾且初捲。綺羅朝未織。玉匣開鑿形。寶臺臨淨飾。對影獨含笑。看花空轉側。聊爲出繭眉。試染天桃色。羽釵如可閒。金鈿長相逼。蕩子行未歸。啼妝坐沾臆。

閨怨

曉河沒高棟。斜月半空庭。窗中度落葉。簾外隔飛螢。含情下翠帳。掩涕閉金屏。昔期今未反。春草寒復青。思君無轉易。何異北辰星。

詠七夕

仙車駐七襄。鳳駕出天潢。月映九微火。風吹百和香。來歡暫巧笑。還淚已啼牀。依稀猶洛汭。倏忽似高唐。別離不得語。河漢漸湯湯。

詠舞妓

管清羅薦合。弦驚雪袖遲。逐唱廻纖手。聽曲動蛾眉。凝情眴墮珥。微睇託含辭。日暮留嘉客。相看愛此時。

看新婦

霧夕蓮出水。霞期日照梁。何如花燭夜。輕扇掩紅妝。良人復灼灼。席上自生光。所悲高駕動。掩袖出長廊。

詠倡家

皎皎高樓暮。華燭帳前明。羅帷雀釵影。寶瑟風雛聲。夜花枝上發。新月霧中生。誰念當窗牖。相望獨盈盈。

詠白鷗嘲別者

可憐雙白鷗。朝夕水上遊。何言異棲息。雌往雄不留。孤飛出嶼浦。獨宿下滄洲。

學青青河邊草

春園日應好。折花望遠道。秋夜苦復長。抱枕向空牀。吹樓下促節。不言於此別。歌筵掩團扇。何時一相見。弦絕猶依軫。落葉裁下枝。卽此雖云別。方我未成離。

嘲劉諮議孝綽

房櫺滅夜火。窗戶映朝光。妖女寒帷出。蹀躞初下牀。雀釵橫曉鬢。蛾眉豔宿妝。稍聞玉釧遠。猶憐翠被香。寧知早朝客。差池已雁行。

古意應蕭信武教

王 樞

朝取飢蠶食。夜縫千里衣。復聞南陌上。日暮采蓮歸。青箔覆寒井。紅藥開青薇。人生樂自極。良時徒見違。何由及新燕。雙雙還共飛。

至烏林村見采桑者聊以贈之

遙見提筐下。翩妍實端妙。將去復迴身。欲語先爲笑。閨中初別離。不許覓新知。空結茱萸帶。敢報木蘭枝。

徐尚書座賦得可憐

紅蓮披早露。玉貌映朝霞。飛燕啼妝罷。願插步搖花。渣市金釧滿。參差繡領斜。暮還垂瑤帳。香燼照九華。

秋閨有望

庾 丹

耿耿橫天漢。飄飄出岫雲。月斜樹倒影。風至水迴文。已泣機中婦。復悲堂上君。羅襦曉長裝。翠被夜待薰。空汲銀牀井。誰縫金縷裙。所思竟不至。空持清夜分。

夜夢還家

歸飛夢所憶。共子汲寒漿。銅瓶素絲綆。綺井白銀牀。雀出未茸樹。蟲飛瑤瑁梁。離人不相見。難忍對春光。

巫山高

范 雲

巫山高不極。白日隱光輝。靄靄朝雲去。冥冥暮雨歸。巖懸獸無跡。林暗鳥疑飛。枕席竟誰薦。相望徒依依。

望織女

盈盈一水邊。夜夜空自憐。不辭精衛苦。河流未可填。寸情百重結。一心萬處懸。願作雙青鳥。共舒明鏡前。

思歸

春草醉春煙。春閨人獨眠。積恨顏將老。相思心欲然。幾回明月夜。飛夢到郎邊。

送別
東風柳線長。送郎上河梁。未盡樽前酒。妾淚已千行。不愁書難寄。但恐鬢將霜。

征怨
蕩子從征久。鳳樓簫管閑。獨枕凋雲鬢。孤鏡損玉顏。何日邊塵靜。庭前征馬還。

詠美人春遊
江南二月春。東風轉綠蘋。不知誰家子。看花桃李津。白雪凝瓊貌。問珠點絳脣。

西洲曲
憶梅下西洲。折梅寄江北。單衫杏子紅。雙鬢鴉鶻色。西洲在何處。兩漿橋頭渡。

日暮伯勞飛。風吹烏柏樹。樹下即門前。門中露翠鈿。開門郎不至。出門採紅蓮。

採蓮南塘秋。蓮花過人頭。低頭弄蓮子。蓮子清如水。置蓮懷袖中。蓮心徹底紅。

憶郎郎不至。仰首望飛鴻。鴻飛滿西洲。望郎上青樓。樓高望不見。盡日欄杆頭。

欄杆十二曲。垂手明如玉。卷簾天自高。海水搖空綠。海水夢悠悠。君愁我亦愁。

南風知我意。吹夢到西洲。

潘黃門述哀

青春速天機。素秋馳白日。美人歸重泉。悽愴無終畢。殯宮已肅清。松柏轉蕭瑟。

俯仰未能弭。尋念非但一。拊衿悼寂寞。悅然若有失。明月入綺窗。勞髣想蕙質。

銷憂非萱草。永懷寄夢寐。夢寐復冥冥。何由覩爾形。我慙北海術。爾無帝女靈。

駕言出遠山。徘徊泣松銘。雨絕無還雲。花落豈留英。日月方代序。寢與何時平。

塘上行
澤蘭被荒徑。孤芳豈自通。幸逢瑤池曠。得與金芝叢。朝承紫臺露。夕潤淥池風。

既美修嫫女。復悅繁華童。夙昔玉霜滿。旦暮翠條空。葉飄儲胥右。芳歇露寒東。

紀化尚盈尺。俗志信頽隆。財殫交易絕。華落愛難終。所惜改歡晤。豈恨逐征蓬。

願回朝陽景。持照長門宮。
秋夜
月落宵向分。紫煙鬱氛氳。噎噎螢入霧。離離雁度雲。巴童暗理瑟。漢女夜縫裙。

新知樂如是。久要詎相聞。
詠鶴
玉臺新詠卷五

閉園有孤鶴。摧藏信可憐。寧望春皋下。刷羽翫花鉞。何時秋海上。照影弄長川。曉鳴動遙怨。夕唳感嬌眠。哀咽芳林右。惘默華池邊。猶冀凌霄志。萬里共翩翩。

玉臺新詠卷六

陳尚書左僕射太子少傅東海徐陵孝穆編

和蕭洗馬子顯古意六首

吳均

賤妾思不堪。採桑渭城南。帶減連枝繡。髮亂鳳凰簪。花舞衣裳薄。蛾飛愛綠潭。無由報君德。流涕向春蠶。其一妾本倡家女。出入魏王宮。既得承瑤輦。亦在更衣中。蓮花銜青雀。寶粟銜金蟲。猶言不得意。流涕憶遼東。其二春草搆可結。妾心正斷絕。綠鬢愁中改。紅顏啼裏滅。非獨淚成珠。亦見珠成血。願爲飛鵲鏡。翻翻照離別。其三何處報君書。隴右五岐路。淚研兔枝墨。筆染鵝毛素。碧浮孟渚水。香下洞庭路。應歸遂不歸。芳草空擲度。其四妾家橫塘北。發豔小長干。花釵玉腕轉。珠繩金絡丸。零塵懸青鳳。透迤搖白團。誰堪久見此。含恨不相看。其五匈奴數欲盡。僕在玉門關。蓮花穿劍鏑。秋月掩刀環。春機鳴窈窕。夏鳥思錦蠻。中

人坐相望。狂夫終未還。其六

與柳惲相贈答六首

黃鸝飛上苑。綠芷出汀洲。日映昆明水。春生鷓鴣樓。飄颻白花舞。瀾漫紫萍流。書織迴文錦。無因寄隴頭。思君甚瓊樹。不見方離憂。其一鳴鞭適大阿。聯翩渡漳河。燕姬及趙女。挾瑟夜經過。織腰曳廣袖。半額畫長蛾。客本倦游者。箕帚在江沱。故人不可棄。新知空復何。其二離君苦無樂。向暮心悽悽。要途訪趙使。聞君仕執珪。杜蘅色已發。菖蒲葉未齊。零塵蠶餌繭。差池燕吐泥。願逐春風去。飄蕩至遼西。其三白日隱城樓。勁風掃寒木。離析隔東西。執手異涼煥。相思咽不言。洞房清且肅。歲去甚流煙。年來如轉軸。別鶴千里飛。孤雌夜未宿。其四閨房宿已靜。落泪有餘輝。寒蟲隱壁思。秋蛾透燭飛。絕雲斷更合。離禽去復歸。佳人今何在。迢遞江之沂。一爲別鶴弄。千里淚霑衣。其五秋雲靜晚天。寒夜方綿綿。聞君吹急管。相思雜採蓮。別離未幾日。高月三成弦。蹀躞黃河浪。嘶鳴隴頭蟬。寄君靡燕葉。插著叢臺邊。其六

擬古四首

陌上桑

玉臺新詠卷六

嫋嫋陌上桑。 蔭陌復垂塘。 長條映白日。 細葉隱鸚黃。 蠶飢妾復思。 拭淚且提筐。 故人寧知此。 離恨煎人腸。

秦王卷衣

咸陽春草芳。 秦帝卷衣裳。 玉檢荼萸匣。 金泥蘇合香。 初芳薰復帳。 餘輝曜玉牀。 當須晏朝罷。 持此贈華陽。

採蓮

錦帶雜花銅。 羅衣垂綠川。 問子今何去。 出採江南蓮。 遼西三千里。 欲寄無因緣。 願君早旋反。 及此荷花鮮。

攜手

豔裔陽之春。 攜手清洛濱。 雞鳴上林苑。 薄暮小平津。 長裾藻白日。 廣袖帶芳塵。 故交一如此。 新知詎憶人。

贈杜容成一首

一燕海上來。 一燕高堂息。 一朝所逢遇。 依然舊所識。 問我來何遲。 關山幾迂直。 答言海路長。 風多飛無力。 昔別縫羅衣。 春風初入帷。 今來夏欲晚。 桑蛾薄樹飛。

春詠

春從何處來。 拂衣復驚梅。 雲障青瑣闥。 風吹承露臺。 美人隔千里。 羅幃閉不開。 無由得共語。 空對相思杯。

去妾贈前夫

棄妾在河橋。 相思復相遼。 鳳凰簪落鬢。 蓮華帶緩腰。 腸從別處斷。 貌在淚中銷。 願君憶疇昔。 片言時見饒。

詠少年

董生惟巧笑。 子都信美目。 百萬市一言。 千金買相逐。 不道參差菜。 誰論窈窕淑。 願君奉繡被。 來就越人宿。

春怨

王僧孺

四時如湍水。 飛奔競迴復。 夜鳥響嚶嚶。 朝光照煜煜。 厭見花成子。 多看筍爲竹。 萬里斷音書。 十載異棲宿。 積愁落芳鬢。 長啼壞美目。 君去在榆關。 妾留住函谷。 惟對昔邪房。 如見蜘蛛屋。 獨與響相酬。 還將影自逐。 象牀易檀簟。 羅衣變單複。 幾過度風霜。 猶能保莞獨。

月夜詠陳南康新有所納

二八人如花。 三五月如鏡。 開簾一種色。 當戶兩相映。 重價出秦韓。 高名入燕鄭。

十城屢請易。千金幾爭聘。君意自能專。妾心本無競。
見貴者初迎盛姬聊爲之詠
久想專房麗。未見傾城者。千金訪繁華。一朝遇容冶。家本薊門外。來戲叢臺下。
長卿幸未匹。文君復新寡。

與司馬治書同聞鄰婦夜織

洞房風已激。長廊月復清。藹藹夜庭廣。飄飄曉帳輕。襟開百蟲思。偏傷一息聲。
鳥聲長不息。妾心復何極。猶恐君無衣。夜夜當窗織。

夜愁

欄露滴爲珠。池水合成壁。萬行朝淚瀉。千里夜愁極。孤恨閉不開。寒膏盡復益。
誰知心眼亂。看朱忽成碧。

春閨有怨

愁來不理鬢。春至更攢眉。悲看蛺蝶粉。泣望蜘蛛絲。月映寒蛩擣。風吹翡翠帷。
飛鱗難託意。駛翼不銜辭。

擣衣

足傷金管處。多信綵光促。露團池上紫。風飄庭裏綠。下機驚西眺。鳴砧遶東旭。

芳汗似蘭湯。彫金辟龍燭。散度廣陵音。慘寫漁陽曲。別鶴悲不已。離鸞斷更續。
尺素在魚腸。寸心憑雁足。

爲人述夢

工知想成夢。未信夢如此。皎皎無片非。的的一皆是。以親芙蓉擣。方開合歡被。
雅步極嬌妍。含辭恣委靡。如言非倏忽。不意成俄爾。及寤盡空無。方知悉虛詭。

爲人傷近而不見

羸女鳳凰樓。漢姬柏梁殿。詎勝仙將死。音容猶可見。我有一心人。同鄉不異縣。
異縣不成隔。同鄉更脉脉。脉脉如牛女。無妨年一語。

爲何庫部舊姬擬蘇燕之句

出戶望蘭薰。褰簾正逢君。欽容纔一訪。新知詎可聞。新人含笑近。故人含淚隱。
妾意在寒松。君心逐朝槿。

在王晉安酒席數韻

窈窕宋容華。但歌有清曲。轉盼非無以。斜扇還相囑。詎減許飛瓊。多勝劉碧玉。
何因送款款。伴飲杯中醪。

爲人有贈

碧玉與綠珠。張盧復雙女。曼聲古難匹。長袂世無侶。似出鳳凰樓。言發瀟湘渚。幸有襄裳便。含情寄一語。

何生姬人有怨

寒樹棲羈雌。月映風復吹。逐臣與棄妾。零落心可知。寶琴徒七弦。蘭鏡空百枝。鑿容不足效。啼妝拭復垂。同衾成楚越。異國非此離。

鼓瑟曲有所思

夜風吹熠燿。朝光照昔邪。幾銷靡蕪葉。空落蒲荷花。不堪長織素。誰能獨浣紗。光陰復何極。望促反成賒。知君自蕩子。奈妾亦倡家。

為人寵妾有怨

可憐獨立樹。枝輕根易搖。已為露所泥。復為風所飄。錦衾裝不臥。端坐夜及朝。是妾愁成瘦。非君重細腰。

為姬人自傷

自知心裏恨。還向影中羞。廻持昔慊慊。變作今悠悠。還君與妾耳。歸妾奉君裘。弦斷猶可續。心去最難留。

秋閨怨

斜光隱西壁。暮雀上南枝。風來秋扇屏。月出夜鏡吹。深心起百際。遙淚非一垂。徒勞妾辛苦。終言君不知。

相逢行

張率

相逢夕陰街。獨趨尙冠里。高門既如一。甲第復相似。憑軾日欲昏。何處訪公子。公子之所在。所在良易知。青樓出上路。漸臺臨曲池。堂上撫流徽。雷樽朝夕施。橘柚芬華食。朱火燎金枝。兄弟兩三人。裾珮紛陸離。朝從禁中出。車騎並驅馳。金鞍瑪瑙勒。衆觀路傍兒。入門一顧望。鳧鶴有雄雌。雄雌各數千。相鳴戲羽儀。並在東西立。羣次何離離。大婦刺方領。中婦抱嬰兒。小婦尙嬌稚。端坐吹參差。丈人無遽起。神風且來儀。

對酒

對酒誠可樂。此酒復能醇。如華良可貴。如乳更非珍。何以留上客。為寄掌中人。金尊清復滿。玉椀亟來親。誰能共遲暮。對酒及芳辰。君歌當來罷。卻坐避梁塵。

遠期

遠期終不歸。節物坐將變。白露愴單棲。秋風息團扇。誰能久離別。他鄉且異縣。浮雲蔽重山。相望何時見。寄言遠行者。空閨淚如霰。

贈內

日暮想青陽。躡履出椒房。網虫生錦薦。遊塵掩玉牀。不見可憐影。空餘繡帳香。彼美情多樂。挾瑟坐高堂。豈忘離憂者。向隅心獨傷。聊因一書札。以代九迴腸。

對房前桃樹詠佳期贈內

相思上北閣。徙倚望東家。忽有當軒樹。兼含映日花。方鮮類紅粉。比素若鉛華。更使增心意。彌令想狹邪。無如一路阻。脉脉似雲霞。嚴城不可越。言折代疎麻。

華觀省中夜聞城外擣衣

費昶

閨闔下重關。丹墀吐明月。秋氣城中冷。秋砧城外發。浮聲透雀臺。飄響度龍闕。婉轉何藏摧。當從上路來。藏摧意未已。定自乘軒裏。乘軒盡世家。佳麗似朝霞。圓瑤耳上照。方繡領閒斜。衣薰百和屑。鬢搖九枝花。昨暮庭槐落。今朝羅綺薄。拂席捲鴛鴦。開綬舒龜鶴。金波正容與。玉步依砧杵。紅袖往還繁。素腕參差舉。徒聞不得見。獨夜空愁佇。其一獨夜何窮極。懷之在心側。階垂玉衡露。庭舞相風翼。瀝滴流星輝。燦爛長河色。三冬誠足用。五日無糧食。楊雲已寂寥。今君復弦直。其二

和蕭記室春旦有所思

芳樹發春暉。蔡子望青衣。水逐桃花去。春隨楊柳歸。楊柳何時歸。裊裊復依依。

已映章臺陌。復掃長門扉。獨知離心者。坐惜春光違。洛陽遠如日。何由見宓妃。

春郊望美人

芳郊拾翠人。廻袖掩芳春。金輝起步搖。紅彩發吹綸。湯湯蓋頂日。飄飄馬足塵。薄暮高樓下。當知妾姓秦。

詠照鏡

晨暉照杏梁。飛燕起朝妝。留心散廣黛。輕手約花黃。正釵時念影。拂絮且憐香。方嫌翠色故。乍道玉無光。城中皆半額。非妾畫眉長。

和蕭洗馬畫屏風二首

陽春發和氣

日淨班姬門。風輕董賢館。卷耳綠階出。反舌登牆喚。蠶女桂枝鉤。遊童蘇合彈。拂袖當留客。相逢莫相難。

秋夜涼風起

佳人在河內。征夫鎮馬邑。零露一朝圓。中夜兩垂泣。氣爽牀帳冷。天寒針縷澀。紅顏本暫時。君還詎相及。

采菱

妾家五湖口。采菱五湖側。玉面不關妝。雙眉本翠色。日斜天欲暮。風生浪未息。宛在水中央。空作兩相憶。

長門后怨

向夕千愁起。自悔何嗟及。愁思且歸牀。羅襦方掩泣。絳樹搖風軟。黃鳥弄聲急。金屋貯嬌時。不言君不入。

鼓吹曲二首

巫山高

巫山光欲晚。陽臺色依依。彼美巖之曲。寧知心是非。朝雲觸石起。暮雨潤羅衣。願解千金珮。請逐大王歸。

有所思

上林烏欲棲。長安日行暮。所思鬱不見。空想丹墀步。簾動憶君來。雷聲似車度。北方佳麗子。窈窕能廻顧。夫君自迷惑。非爲妾妬媚。

同郭侍郎采桑一首

姚翻

雁還高柳北。春歸洛水南。日照茱萸領。風搖翡翠簷。桑閒視欲暮。閨裏遞飢蠶。相思君助取。相望妾那堪。

奉和湘東王教班婕妤一首

孔翁歸

長門與長信。日暮九重空。雷聲聽隱隱。車響絕瓊瓊。思光隨妙舞。團扇逐秋風。鉛華誰不慕。人意自難終。

答外詩二首

徐俳妻劉令嫺

花庭麗景斜。蘭牖輕風度。落日更新妝。開簾對春樹。鳴鶉葉中響。戲蝶花間驚。調瑟本要權。心愁不成趣。良會誠非遠。佳期今不遇。欲知幽怨多。春閨深且暮。

【二】

東家挺奇麗。南國擅容輝。夜月方神女。朝霞喻洛妃。還看鏡中色。比豔自知非。擒辭徒妙好。連類頓乖違。智夫雖已麗。傾城未敢希。

奉和湘東王教班婕妤

何思澄

寂寂長信晚。雀聲哦洞房。蜘蛛網高閣。駭蕪被長廊。虛殿籠帷靜。閑階花蕊香。悠悠視日暮。還復拂空牀。

擬古

故交不可忘。猶如蘭桂芳。新知雖可悅。不異茱萸香。妾有鳳雛曲。非爲陌上桑。薦君君不御。抱瑟自悲涼。

南苑逢美人

洛浦疑迴雪。巫山似旦雲。傾城今始見。傾國昔曾聞。媚眼隨嬌合。丹脣逐笑分。風捲葡萄帶。日照石榴裙。自有狂夫在。空持勞使君。

徐排妻劉氏

答唐孀七夕所穿針

倡人助漢女。靚妝臨月華。連針學並蒂。縈縷作開花。嬌閨絕綺羅。攬贈自傷嗟。雖言未相識。聞道出良家。曾停霍君騎。經過柳惠車。無由一共語。暫看日升霞。

吳均

梅花落

隆冬十二月。寒風西北吹。獨有梅花落。飄蕩不依枝。流連逐霜彩。散漫下水澌。何當與君日。共映芙蓉池。

聞怨

胡笳屢悽斷。征蓬未肯還。妾坐江之介。君戍小長安。相去三千里。參商書信難。四時無人見。誰復重羅紈。

妾安所居

賤妾先有寵。蛾眉進不遲。一從西北麗。無復城南期。何因暫豔逸。豈爲乏妍姿。徒有黃昏望。寧遇青樓時。惟惜應門掩。方餘永巷悲。匡牀終不共。何由橫自私。

三婦豔

大婦弦初切。中婦管方吹。少婦多姿態。含笑逼清卮。佳人勿餘及。慙慙妾自知。

王僧孺

詠歌姬

及君高堂還。值妾妍妝罷。曲房褰錦帳。迴廊步珠屣。玉釵時可挂。羅襦詎難解。再顧傾城易。一笑千金易。

徐排妻劉氏

聽百舌

庭樹且新晴。臨鏡出雕楹。風吹桃李氣。過傳春鳥聲。靜寫山陽笛。全作洛濱笙。注意懼留聽。誤令牀不成。

費昶

芳樹

幸被夕風吹。屢得朝光照。枝低疑欲舞。花開似含笑。長夜踏悠悠。所思不可召。行人早旋返。賤妾猶年少。

徐勉

採菱曲

相攜及嘉月。採菱渡北渚。微風吹櫂歌。日暮相容與。采采不能歸。望望方延佇。倘逢道瓊人。預以心相許。

楊儼

詠舞

紅顏自燕趙。妙伎適陽阿。就行齊逐唱。赴節閣相和。折腰送餘曲。斂袖待新歌。顰容生翠羽。曼睇出橫波。雖稱趙飛燕。比此詎成多。

玉臺新詠卷七

陳尚書左僕射太子少傅東海徐陵孝穆編

擣衣

梁武帝

駕言易水北。送別河之陽。沈思慘行鱗。結夢在空牀。既寤丹綠謬。始知紈素傷。中州木葉下。邊城應早霜。陰蟲日慘烈。庭草復云黃。金風但清夜。明月懸洞房。嫋嫋同宮女。助我理衣裳。參差夕杵引。哀怨秋砧揚。輕羅飛玉腕。弱翠低紅妝。朱顏色已興。眴睇目增光。擣以一匪石。文成雙鴛鴦。制握斷金刀。薰用如蘭芳。佳期久不歸。持此寄寒鄉。妾身誰為容。思君苦人腸。

擬長安有狹邪十韻

洛陽有曲陌。陌曲不通驛。忽逢二少童。扶轡問君宅。君宅邯鄲右。易憶復可知。大息組細纒。中息珮陸離。小息尚青綺。總舛遊南皮。三息俱入門。家臣拜門垂。

三息俱升堂。旨酒盈千卮。三息俱入戶。戶內有光儀。大婦理金翠。中婦事玉釵。小婦獨閑暇。調笙遊曲池。丈人少徘徊。鳳吹方參差。

擬明月照高樓

圓魄當虛闥。清光流思筵。筵思照孤影。悽怨還自憐。臺鏡早生塵。匣琴又無弦。悲慕屢傷節。離憂亟華年。君如東博景。妾似西柳烟。相去既路迥。明晦亦殊懸。願爲銅鐵誓。以感長樂前。

擬青青河邊草

幕幕繡戶絲。悠悠懷昔期。昔期久不歸。鄉國曠音微。音微空結遲。半寢覺如至。既寤了無形。與君隔平生。月以雲掩光。葉以霜催老。當途競自容。莫肯爲妾道。

代蘇屬國婦

良人與我期。不謂過當時。秋風忽送節。白露凝前基。愴愴獨涼枕。搔搔孤月帷。或聽西北雁。似從寒海湄。果銜萬里書。中有生離辭。惟言長別矣。不復道相思。胡羊久剽奪。漢節故支持。帛上看未終。臉下淚如絲。空懷之死誓。遠勞同穴詩。

古意二首

飛鳥起離離。驚散忽差池。啾嘈繞樹上。翩翩集寒枝。既悲征役久。偏傷墻上兒。

寄言閨中愛，此心詎能知。不見松上蘿，葉落根不移。

【二】

當春有一草，綠花復重枝。云是忘憂物，生在北堂墀。飛飛雙蛺蝶，低低兩差池。差池低復起，此芳性不移。飛蝶雙復隻，此心人莫知。

芳樹

綠樹始搖芳，芳生非一葉。一葉度春風，芳芳自相接。色雜亂參差，衆花粉重疊。重疊不可思，思此誰能愜。

臨高臺

高臺半行雲，望望高不極。草樹無參差，山河同一色。髣髴洛陽道，路遠難別識。玉墀故情人，情來共相憶。

有所思

誰言生離久，適意與君別。衣上芳猶在，握裏書未滅。腰中雙綺帶，夢爲同心結。常恐所思露，瑤華未忍折。

紫蘭始萌

種蘭玉臺下，氣暖蘭始萌。芬芳與時發，婉轉迎節生。獨使金翠嬌，偏動紅綺情。

二遊何足壞，一顧非傾城。羞將苓芝侶，豈畏鷓鴣鳴。

織婦

送別出南軒，離思沈幽室。調梭輟寒夜，鳴機罷秋日。良人在萬里，誰與共成匹。願得一回光，照此憂與疾。君情倘未忘，妾心長自畢。

七夕

白露月下圓，秋風枝上鮮。瑤臺生碧霧，瓊幕含紫烟。妙會非綺節，佳期乃良年。玉壺承夜急，蘭膏依曉煎。昔時悲難越，今傷何易旋。怨咽雙念斷，悽草兩情懸。

戲作

宓妃生洛浦，游女出漢陽。妖閑逾下蔡，神妙絕高唐。蘇駒且變俗，王豹復移鄉。况茲集靈異，豈得無方將。長袂必留客，清哇咸繞梁。燕趙羞容止，西姬慙芬芳。徒聞殊可弄，定自乏明璫。

聖製樂府三首

皇太子

豔歌篇十八韻

凌晨光景麗，倡女鳳樓中。前瞻削成小，傍望卷旌空。分妝開淺鬢，繞臉傅斜紅。張琴未調軫，歌吹不全終。自知心所愛，出入仕秦宮。誰言連尹屈，更是莫敖通。

輕輅綴皂蓋。飛轡轢雲馳。金鞍隨繫尾。銜環映纏鬃。戈鏤荆山玉。劍傷丹陽銅。
 左把蘇合彈。傍持大屈弓。控弦因鵠血。挽強用牛螭。弋獵多登隴。酣歌每入壘。
 暉暉隱落日。冉冉還房隴。鏡生陽燧火。塵散鯉魚風。流蘇時下帳。象簾復藉筒。
 霧暗窗前柳。寒疎井上桐。女蘿託松際。甘瓜蔓井東。拳拳恃君寵。歲暮望無窮。

蜀國弦歌篇十韻

銅梁指斜谷。劍道望中區。通星上分野。作固爲下都。雅歌因良守。妙舞自巴渝。
 陽城嬉樂所。劍騎鬱相趨。五婦行難至。百兩好遊娛。牲祈望帝祀。酒酌蜀侯誅。
 江妃納重聘。卓女受將雛。停弦時繫爪。息吹更治朱。春衫前錦浪。迴扇避陽烏。
 聞君握節反。賤妾下城隅。

妾薄命篇十韻

名都多麗質。本自恃容姿。蕩子行未至。秋胡無定期。玉貌歇紅臉。長翠串翠眉。
 箴鏡迷朝色。縫針脆故絲。本異搖舟各。何關竊席疑。生離誰拊背。溘死詎成遲。
 王嬙貌本絕。踉蹌入氈帷。盧姬嫁日晚。非復好年時。傳山猶可逐。烏白望難期。
 妾心徒自苦。傍人會見嗤。

代樂府三首

新成安樂宮

遙看雲霧中。刻桷映丹紅。珠簾通曉日。金華拂夜風。欲知聲管處。來過安樂宮。

雙桐生空井

季月雙桐井。新枝雜舊株。晚葉藏棲鳳。朝花拂曙烏。還看西子照。銀牀牽轆轤。

楚妃歎

聞閑漏永永。漏長宵寂寂。草螢飛夜戶。絲蟲遶秋壁。薄笑未爲欣。微歎還成戚。

金簪鬢下垂。玉筋衣前滴。

和湘東王橫吹曲三首

洛陽道

洛陽佳麗所。大道滿春光。游童初挾彈。蠶妾始提筐。金鞍照龍馬。羅袂拂春桑。

玉車爭晚入。潘果溢高箱。

折楊柳

楊柳亂成絲。攀折上春時。葉密鳥飛礙。風輕花落遲。城高短簫發。林空畫角悲。

曲中無別意。并爲久相思。

紫驪馬

賤妾朝下機。正值良人歸。青絲懸玉鏡。朱汗染香衣。驟急珍珂響。踣多塵亂飛。雕胡幸可薦。故心君莫違。

雍州十曲抄三首

南湖

南湖荇葉浮。復有佳期遊。銀綸翡翠鉤。玉軸芙蓉舟。荷香亂衣麝。橈聲隨急流。

北渚

岸陰垂柳葉。平江含粉堞。好值城旁人。多逢蕩舟妾。綠水漲長袖。浮苔染輕楫。

大堤

宜城斷中道。行旅亟流連。出妻工織素。妖姬慣數錢。炊雕留上客。貰酒逐神仙。

同庾肩吾四詠二首

蓮舟買荷度

採蓮前岸隈。舟子屢徘徊。披衣可識風。風疎香不來。欲知船度處。當看荷葉開。

照流看落釵

相隨照綠水。意欲重涼風。流搖妝影壞。釵落鬢華空。佳期在何許。徒傷心不同。

和湘東王三韻二首

春宵

花樹含春叢。羅帷夜長空。風聲隨篠韻。月色與池同。彩牋徒自裝。無信往雲中。

冬曉

冬朝日照梁。含怨下前牀。帳裏竹葉帶。鏡轉菱花光。會是無人見。何用早紅妝。

戲作謝惠連體十三韻

雜蕊映南庭。庭中光影媚。可憐枝上花。早得春風意。春風復有情。拂幔且開極。開極開碧烟。拂幔拂垂蓮。偏使紅花散。飄颺落眼前。眼亦多無況。參差鬱可望。珠繩翡翠帷。綺幕芙蓉帳。香烟出窗裏。落日斜階上。日影去遲遲。節華成在茲。桃花紅若點。柳葉亂如絲。絲條轉暮光。影落暮陰長。春燕雙雙舞。春心處處揚。酒滿心聊足。萱枝愁不忘。

倡婦怨情十二韻

綺窗臨畫閣。飛閣遠長廊。風散同心草。月送可憐光。髣髴簾中出。妖麗特非常。恥學秦羅髻。羞爲樓上妝。散誕披紅帳。生情新約黃。斜燈入錦帳。微烟出玉牀。六安雙玳瑁。八幅兩鴛鴦。猶是別時許。留致解心傷。含涕坐度日。俄頃變炎涼。玉關驅夜雪。金氣落嚴霜。飛狐驛使斷。交河川路長。蕩子無消息。朱唇徒自香。

和徐錄事見內人作臥具

密房寒日晚。落照度窗邊。紅簾遙不隔。輕帷半捲懸。方知織手製。詎減縫裳妍。
龍刀橫膝上。畫尺墮衣前。熨斗金塗色。管管白牙纒。衣裁合歡褙。文作鴛鴦連。
縫用雙針縷。絮是八蠶絲。香和麗邱蜜。麝吐中臺烟。已入琉璃帳。兼雜太華氈。
具共雕鏤煖。非同團扇捐。更恐從軍別。空牀徒自憐。

戲贈麗人

麗姬與妖嬈。共拂可憐妝。同安鬢裏撥。異作額間黃。羅裙宜細簡。畫屐重高牆。
含羞未上砌。微笑出長廊。取花爭問鑷。攀枝念蕊香。但歌聊一曲。鳴弦未息張。
自矜心所愛。三十侍中郎。

秋閨夜思

非關長信別。詎是良人征。九重忽不見。萬恨滿心生。夕門掩魚鑰。宵牀悲畫屏。
廻月臨窗度。吟蟲遶砌鳴。初霜隕細葉。秋風驅亂螢。故妝猶累日。新衣裝未成。
欲知妾不寐。城外擣衣聲。

和湘東王名士悅傾城

美人稱絕世。麗色譬花叢。雖居李城北。住在宋家東。教歌公主第。學舞漢成宮。

多遊洪水上。好在鳳樓中。履高疑上砌。裾開持畏風。衫輕見跳脫。珠槩雜青蟲。

垂絲遶帷幔。落日度房櫺。妝窗隔柳色。井水照桃紅。非憐江浦珮。羞使春閨空。

從頌覽還城

漢渚水初綠。江南草復黃。日照蒲心暖。風吹梅蕊香。征艫艤湯暫。歸騎息金陵。
舞觀衣常襲。歌臺弦未張。持此橫行去。誰念守空牀。

詠人棄妾

昔時嬌玉步。含羞花燭邊。豈言心愛斷。銜啼私自憐。常見歎成怨。非關醜易妍。
獨鶴罷中路。孤鸞死鏡前。

執筆戲書

舞女及燕姬。倡樓復蕩婦。參差大戾發。搖曳小垂手。釣竿蜀國彈。新城折楊柳。
玉案西王桃。蠶柘石榴酒。甲乙羅帳異。辛壬房戶暉。夜夜有明月。時時憐更衣。

豔歌曲

雲楣桂成戶。飛棟杏爲梁。斜窗通蕊氣。細隙引塵光。裁衣魏后尺。汲水淮南牀。
青驪暮當返。預使羅裾香。

怨詩

秋風與白團。本自不相安。新人及故愛。意氣豈能寬。黃金肘後鈴。白玉案前盤。誰堪空對此。還成無歲寒。

擬沈隱侯夜夜曲

藹藹夜中霜。何關向曉光。枕帶常帶粉。身眠不著牀。蘭膏盡更益。薰鑪滅復香。但問愁多少。便知夜短長。

七夕

秋期此時決。長夜徙河靈。紫烟凌鳳羽。奔光隨玉駟。洛陽疑劍氣。成都恠客星。天梭織來久。方逢今夜停。

同劉諮議詠春雪

晚霰飛銀礫。浮雲暗未開。入池消不積。因風墮復來。思婦流黃素。溫姬玉鏡臺。看花言可插。定自非春梅。

晚景出行

細樹含殘影。春閨散晚香。輕花鬢邊墮。微汗粉中光。飛鳥初罷曲。啼鳥忽度行。羞令白日暮。車馬鬱相望。

賦樂府得大垂手

垂手忽茗茗。飛燕掌中嬌。羅衣恣風引。輕帶任情搖。詎似長沙地。促舞不迴腰。

賦樂器名得篳篥

擬遲初挑吹。弄急時催舞。鈞響逐弦鳴。私迴半障柱。欲知心不平。君看黛眉聚。

詠舞

可憐初二八。逐節似飛鴻。懸勝河陽妓。聞與淮南同。入行看履進。轉面望鬢空。腕動茗華玉。袖隨如意風。上客何須起。啼鳥曲未終。

春閨情

楊柳葉纖纖。佳人懶織纈。正衣還向鏡。迎春試舉簾。摘梅多遶樹。覓燕好窺簷。只言逐花草。計校應非嫌。

詠晚閨

珠簾向暮下。妖姿不可追。花風暗裏覺。蘭燭帳中飛。何時玉窗裏。夜夜更縫衣。

率爾成詠

借問仙將畫。詎有此佳人。傾城且傾國。如雨復如神。漢后憐名燕。周王重姓申。挾瑟曾遊趙。吹簫屢入秦。玉階偏望樹。長廊每逐春。約黃出意巧。纏弦用法新。迎風時引袖。避日暫披巾。疎花映鬢插。細珮繞衫身。誰知日欲暮。含羞不自陳。

美人晨妝

北窗向朝鏡。錦帳復斜綰。嬌羞不肯出。猶言妝未成。散黛隨眉廣。燕脂逐臉生。試將持出衆。定得可憐名。

賦得當墟

十五正團圓。流光滿上蘭。當墟設夜酒。宿客解金鞍。迎來挾瑟易。送別但歌難。詎知心恨急。翻令衣帶寬。

林下妓

炎光向夕斂。促宴臨前池。泉深影相得。花與面相宜。篋聲如鳥哢。舞袂寫風枝。歡樂不知醉。千秋長若斯。

擬落日窗中坐

杏梁斜日照。餘暉映美人。開函脫寶劍。向鏡理紈巾。游魚動池葉。舞鶴散階塵。空嗟千歲久。願得及陽春。

詠美人觀畫

殿上圖神女。宮裏出佳人。可憐俱是畫。誰能辨僞真。分明淨眉眼。一種細腰身。所可持爲異。長有好精神。

變童

變童嬌麗質。踐董復超瑕。羽帳晨香滿。珠簾夕漏賒。翠被含鴛色。雕牀鏤象牙。妙年同小史。姝貌比朝霞。袖裁連璧錦。屐織細種花。攬袴輕紅出。迴頭雙鬢斜。媚眼時含笑。玉手乍攀花。懷猜非後釣。密愛似前車。足使燕姬妬。彌令鄭女嗟。

代秋胡婦聞怨

蕩子從遊宦。思妾守房櫺。塵鏡朝朝掩。寒牀夜夜空。若非新有悅。何事久西東。知人相憶否。淚盡夢啼中。

車中見美人

關情出眉眼。軟媚著腰肢。語笑能嬌媠。行武絕逶迤。空中自迷惑。渠傍會不知。懸念猶如此。得時應若爲。

代舊姬有怨

寧爲萬里別。乍此死生離。那堪眼前見。故愛逐新移。未展春光落。遽被秋風吹。怨黛舒還斂。啼妝拭更垂。誰能巧爲賦。黃金妾自貲。

登顏園故閣

高樓三五夜。流夜入丹墀。先時留上客。夫婿美容姿。妝成理蟬鬢。笑罷斂蛾眉。

湘東王繹

衣香知步近。 釧動覺行遲。 如何舞館樂。 翻見歌梁悲。 猶懸北窗櫺。 未捲南軒帷。 寂寂空郊暮。 非復少年時。

戲作豔詩

入堂值小婦。 出門逢故夫。 含辭未及吐。 絞袖且躊躇。 搖茲扇似月。 掩此淚如珠。 今懷固無已。 故情今有餘。

夜游栢齋

燭暗行人靜。 簾開雲影入。 風細雨聲遲。 夜短更籌急。 能下班姬淚。 復使倡樓泣。 況此客遊人。 中宵空佇立。

和劉上黃

新鶯隱葉囀。 新燕向窗飛。 柳絮時依酒。 梅花乍入衣。 玉珂逐風度。 金鞍映日暉。 無令春色晚。 獨望行人歸。

詠晚棲鳥

日暮連翩翼。 俱向上林棲。 風多前鳥駛。 雲暗後羣迷。 路遠聲難徹。 飛斜行未齊。 應從故鄉返。 幾過入蘭闈。 借問倡樓妾。 何如蕩子妻。

寒宵三韻

烏鵲夜南飛。 良人行未歸。 池水浮明月。 寒風送擣衣。 願織迴文錦。 因君寄武威。

詠秋夜

秋夜九重空。 蕩子怨房櫺。 螢光入綺帷。 簾影進屏風。 金徽調玉軫。 茲夜撫離鴻。

同蕭長史看妓

武陵王紀

燕姬奏妙舞。 鄭女發清歌。 廻羞出慢臉。 送態入嚙蛾。 寧殊值行雨。 詎減見凌波。 想君愁日暮。 應羨魯陽戈。

和湘東王夜夢應令

昨夜夢君歸。 賤妾下鳴機。 懸知君意薄。 不著去時衣。 故言如夢裏。 賴得雁書飛。

曉思

晨禽爭學囀。 朝花亂欲開。 爐烟入斗帳。 屏風隱鏡臺。 紅妝隨淚盡。 蕩子何時廻。

閨妾寄征人

斂色金星聚。 縈悲玉筍流。 願君看海氣。 憶妾上高樓。

長相思

昭明太子

相思無終極。 長夜起歎息。 徒見貌嬋娟。 寧知心有憶。 寸心無以因。 願附歸飛翼。

美女篇

簡文帝

佳麗盡關情。風流最有名。約黃能效月。裁金巧作星。粉光勝玉靚。衫薄擬蟬輕。密態隨羞臉。嬌歌逐軟聲。朱顏半已醉。微笑隱香屏。

怨歌行

十五頗有餘。日照杏梁初。蛾眉本多嫉。掩鼻特成虛。持此傾城貌。翻為不肖軀。秋風吹海水。寒霜依玉除。月光臨戶駛。荷花依浪舒。望簷悲雙翼。窺沼泣王餘。落生履處沒。草合行人疎。裂執傷不盡。歸骨恨難祛。早知長信別。不避後園輿。

獨處怨

獨處恒多怨。開幕試臨風。彈棋鏡奩上。傅粉高樓中。自君征馬去。音信不曾通。只恐金屏掩。明年已復空。

傷美人

昔聞倡女別。蕩子無歸期。今似陳王歎。流風難重思。翠帶留餘結。苔階沒故基。圖形更非是。夢見反成疑。薰爐含好氣。庭樹吐華滋。香燒日有歇。花落無還時。

雞鳴高樹顛

碧玉好名倡。夫婿侍中郎。桃花全覆井。金門半隱堂。時欣一來下。復比雙鴛鴦。雞鳴天尚早。東烏定未光。

春日

年還樂應滿。春歸思復生。桃含可憐紫。柳發斷腸青。落花隨燕入。遊絲帶蝶驚。邯鄲歌管地。見許欲留情。

秋夜

高秋度幽谷。墜露下芳枝。綠潭倒雲氣。青山銜月眉。花心風上轉。葉影樹中移。外遊獨千里。夕歎誰共知。

和湘東王陽雲臺簷柳

曖曖陽雲臺。春柳發新梅。柳枝無極輓。春風隨意來。潭池青帷閉。玲瓏朱扇開。佳人所望。車聲非是雷。

聽夜妓

合歡獨忿葉。萱草忘憂條。何如明月夜。流風拂舞腰。朱唇隨吹動。玉劍逐弦搖。留賓惜殘弄。負態動餘嬌。

詠內人晝眠

北窗聊就枕。南簷日未斜。攀鉤落綺障。插板舉琵琶。夢笑開嬌靨。眠鬢壓落花。簾文生玉腕。香汗浸紅紗。夫婿恒相伴。莫誤是倡家。

詠中婦織流黃

翻花滿階砌。愁人獨上機。浮雲西北起。孔雀東南飛。調絲時遠腕。易鐮乍牽衣。鳴梭逐動劍。紅妝映落暉。

權歌行

妾家住湘川。菱歌本自便。風生解刺浪。水深能捉船。葉亂由牽荇。絲飄爲折蓮。澱妝疑薄汗。霑衣似故漣。浣紗流暫濁。汰錦色還鮮。參同趙飛燕。借問李延年。從來入弦管。誰在權歌前。

和人以妾換馬

功名幸多種。何事苦生離。誰言似白玉。定是媿青驪。必取匣中劍。廻作飾金羈。真成恨不已。願得路旁兒。

詠舞

戚里多妖麗。重聘茂燕餘。逐節工新舞。嬌態似凌虛。納花承福概。垂翠逐瑤舒。扇開衫影亂。巾度履行疎。徒勞交甫憶。自有專城居。

探蓮

晚日照空磯。探蓮承晚暉。風起湖難渡。蓮多摘未稀。櫂動芙蓉落。船移白鷺飛。

荷絲傍遠腕。菱角遠牽衣。常聞葉可愛。採擷欲爲裙。葉滑不留艇。心忙無假薰。千春誰與樂。惟有妾隨君。

採桑

春色映空來。先發院邊梅。細萍重疊長。新花歷亂開。連珂往淇上。接幘至叢臺。叢臺可憐妾。當窗望飛蝶。忌跌行衫領。髮斗成褰攝。下牀著珠珮。捉鏡安花鏡。薄晚畏蠶飢。競採春柔葉。寄語採桑伴。訝今春日短。枝高攀不及。葉細籠難滿。年年將使君。歷亂遣相聞。欲知琴裏意。還贈錦中文。何當照梁日。還作入山雲。重門皆已閉。方知客留袂。可憐黃金絡。復以青絲繫。必也爲人時。誰令畏夫婿。

半路溪

相逢半路溪。隔溪獨不渡。望望判知是。翩翩識行步。摘贈蘭澤芳。欲表同心句。

少垂手

舞女出西秦。躡影舞陽春。且復小垂手。廣袖拂紅塵。折腰應兩笛。頓足轉雙巾。

蛾眉與慢臉。見此空愁人。

傷別離

朝望青波道。夜上白登臺。月中含桂樹。流影自徘徊。寒沙逐風起。春花犯雪開。夜長無與悟。衣單爲誰裁。

春夜看妓

蛾眉漸成光。燕姬戲小堂。朝舞開春閣。鈴盤出步廊。起龍調節奏。卻鳳點笙簧。樹交臨舞席。荷生夾妓航。竹密無分影。花疎有異香。舉柝聊轉笑。歡茲樂未央。

詠風

樓上起朝妝。風花下砌傍。入鏡先飄粉。翻衫好染香。度舞飛長袖。傳歌共繞梁。欲因吹少女。還將拂大王。

看摘薔薇

倡女倦春閨。迎風戲玉除。近叢看影密。隔樹望釵疎。橫枝斜縮袖。嫩葉下牽裾。臨高舉不及。花新摘未舒。莫疑插髻少。分人猶有餘。

洛陽道

洛陽開大道。城北達城西。青槐隨幔拂。綠柳逐風低。玉珂鳴戰馬。金爪鬪場雞。桑萎日行暮。多逢秦氏妻。

折楊柳

山高巫峽長。垂柳復垂楊。同心且同折。故人懷故鄉。山似蓮花豔。流如明月光。寒夜猿聲徹。遊子淚霑裳。

金樂歌

啼鳥怨別偶。曙鳥憶離家。石闕題書字。金鏡飄落花。東方曉星沒。西山晚日斜。穀衫迴廣袖。團扇掩輕紗。暫借青驄馬。來送黃牛車。

古意

妾在成都縣。願作高唐雲。樽中石榴酒。機上葡萄裙。停梭還斂色。何時勸使君。

春日

春還春節美。春日春風過。春心日日異。春情處處多。處處春芳動。日日春禽變。春意春已繁。春人春不見。不見懷春人。徒望春光新。春愁春自結。春結誰能申。欲道春園趣。復憶春時人。春人竟何在。空爽上春期。獨念春花落。還似昔春時。

見姬人

春來不復賒。入苑駐行車。比來妝點異。今世撥鬢斜。卻扇承枝影。舒衫受落花。狂夫不妬妾。隨意晚還家。

邵陵王

玉臺新詠卷八

陳尚書左僕射太子少傅東海徐陵孝穆編

樂府二首

蕭子顯

日出東南隅行

大明上蒼蒼。陽城射凌霄。光照窗中婦。絕世同阿嬌。明鏡盤龍刻。管羽鳳凰雕。
 逶迤梁家髻。冉弱楚宮腰。輕執雜重錦。薄縠閒飛綃。三六前年暮。四五今年朝。
 蠶園拾芳蘭。桑陌采柔條。出入東城里。上下洛西橋。忽逢車馬客。飛蓋動轡輶。
 單衣鼠毛織。寶劍羊頭銷。丈夫疲應對。御者轍銜鑿。柱閒徒脉脉。垣上幾翹翹。
 女本西家宿。君自上宮要。漢馬三萬匹。夫婿仕嫖姚。擊囊虎頭綬。左珥鳧盧貂。
 橫吹龍鍾管。奏鼓象牙簫。十五張內侍。十八賈登朝。皆笑顏郎老。盡訝董公超。

代美女篇

邯鄲覺輟舞。巴姬請罷弦。佳人洪消上。豔趙復傾燕。繁穠既爲李。照水亦成蓮。
 朝沾成都酒。暝數河閒錢。餘光幸未借。蘭膏空自煎。

和吳主簿六首

王筠

春月二首

日照鴛鴦池。萍生雁鴦池。遊塵隨影入。弱柳帶風垂。青骹逐黃口。獨鶴慘羈雌。
 同衾遠遊說。結愛久生離。於今方溘死。甯須萱草枝。甯須萱草枝。野雉呼雌雉。庭禽挾子棲。
 菴蔬心未發。藤蕪葉欲齊。春蠶方曳緒。新燕正銜泥。野雉呼雌雉。庭禽挾子棲。
 從君客梁後。方畫掩春閨。山川隔道里。芳草徒萋萋。

秋夜二首

九重依夜館。四壁慘無暉。招搖顧西落。烏鵲向東飛。流螢漸收火。絡緯欲催機。
 爾時思錦字。持製行人衣。所望丹心達。嘉客倘能歸。
 露華初泥泥。桂枝行棟棟。殺氣下重軒。輕陰滿四屋。別寵增修夜。遠征悲獨宿。
 愁縈翠羽眉。淚滿橫波目。長門絕往來。含情空杼軸。

遊望二首

落日照紅妝。挾瑟當臆臚。甯復歇藤蕪。惟聞歎楊柳。結好在同心。離別由衆口。
 徒設露葵羹。誰酌蘭英酒。會日杳無期。薜華安得久。
 相思不安席。聊至狹邪東。愁眉做戚里。高髻學城中。雙眉偏照日。獨蕊好禁風。

自陳心所想。獻賦甘泉宮。傳聞方鼎食。詎憶春閨中。

遙見鄰舟主人投一物。衆姬爭之有客請余爲詠。

劉孝綽

河流既浼浼。河鳥復關關。落花浮浦出。飛雉渡洲還。此日倡家女。競嬌桃李顏。良人惜美耳。欲以代芳菅。新羅疑故素。盛趙蔑衰班。曳綃事掩綬。搖珮奪鳴環。客心空振蕩。高枝不可攀。

洪上戲蕩子婦示行事一首

桑中始奕奕。洪上未湯湯。美人要雜珮。上客誘明璫。日間人聲靜。微步出蘭房。露葵不待勸。鳴琴無暇張。翠釵挂已落。羅衣拂更香。如何嫁蕩子。春夜守空牀。不見青絲騎。徒勞紅粉妝。

賦得照基燭刻五分成

南皮弦吹罷。終奕且留賓。日下房櫺間。華燭命佳人。側光全照局。迴花半隱身。不辭織手卷。羞令夜向晨。

夜聽妓賦得烏夜啼

鸚弦且輟弄。鶴操暫停徽。別有啼烏曲。東西相背飛。倡人怨獨守。蕩子遊未歸。若逢生離曲。長夜泣羅衣。

賦得遺所思

遺簪雕瑋珥。贈綺織鴛鴦。未若華滋樹。交枝蕩子房。別前秋已落。別後春更芳。所思不可寄。惟憐盈袖香。

繁華應令

劉遵

可憐周小童。微笑摘蘭叢。鮮膚勝粉白。慢臉若桃紅。挾彈雕陵下。垂釣蓮葉東。腕動飄香麝。衣輕任好風。幸承拂枕選。得奉畫堂中。金屏障翠被。藍靶覆薰籠。本欲傷輕薄。含辭羞自通。剪袖思雖重。殘桃愛未終。蛾眉詎須嫉。新妝遞入宮。

從還頓城應令

漢水深難渡。深潭見底清。錦竿繫鳧舸。珠竿懸翠旌。鳴笳芳樹曲。流唱采蓮聲。神遊不停駕。日暮反連營。寧願空房裏。階上綠落生。

奉和率爾有詠

王訓

殿內多仙女。從來難比方。別有當窗豔。復是可憐妝。學舞勝飛燕。染粉薄南陽。散黃分黛色。薰衣雜棗香。簡釵新帳雙。試履逆填牆。一朝恃容色。非復守空房。君恩若可恃。願作雙鴛鴦。

詠得有所思

庾肩吾

佳期竟不歸。春物坐芳菲。拂匣看離扇。開箱見別衣。井桐生未合。宮槐卷復稀。不及銜泥燕。從來相逐飛。

詠美人自看畫應令

欲知畫能巧。喚取真來映。並出似分身。相看如照鏡。安釵等疏密。著領俱周正。不解平城圍。誰與丹青競。

賦得橫吹曲長安道

桂宮連複道。黃山開廣路。遠聽平陵鐘。遙識新豐樹。合殿生光彩。離宮起烟霧。日落歌吹還。塵飛車馬度。

南苑看人還

春花競玉顏。俱折復俱攀。細腰宜窄衣。長釵巧挾鬋。洛橋初度燭。青門欲上關。中人應有望。上客莫前還。

送別於建興苑相逢

相逢小苑北。停車問苑中。梅新雜柳故。粉白映綸紅。去影背斜日。香衣臨上風。雲流階漸黑。冰開池半通。去馬船難駐。啼鳥曲未終。眷然從此別。車西馬復東。

和湘東王二首

應令春宵

征人別未久。年芳復臨牖。燭下夜縫衣。春寒偏著手。願及歸飛雁。因書寄高柳。

應令冬曉

隣雞聲已傳。愁人竟不眠。月光侵曙後。霜明落曉前。綦鬢起照鏡。誰忍插花鈿。

侍宴賦得龍沙宵月明

劉孝威

鵲飛空繞樹。月輪殊未圓。嫦娥望不出。桂枝猶隱殘。落照移樓影。浮光動壑瀾。

攬馬悲羌吹。城烏啼塞寒。傳聞機杼妾。愁余衣服單。當秋終已脆。銜啼織復難。

斂眉雖不樂。舞劍強為歡。請謝函關吏。行當泥一丸。

奉和湘東王應令冬曉

妾家邊洛城。慣識曉鐘聲。鐘聲猶未盡。漢使報應行。天寒砒水凍。心悲書不成。

郡縣遇見人織率爾寄婦

妖姬含怨情。織素起秋聲。度梭環玉動。踏躡珮珠鳴。經稀疑杼澁。緯斷恨絲輕。蒲萄始欲罷。鴛鴦猶未成。雲棟共徘徊。紗窗相向開。窗疏眉語度。紗輕眼笑來。矚矚隔淺紗。的的見妝華。鑲玉同心滿。列寶連枝花。紅衫向後結。金管臨鬢斜。機頂掛流蘇。機旁垂結珠。青絲引伏兔。黃金繞鹿盧。豔彩裾邊出。芳脂口上渝。

百城交問道。五馬共峙嶠。直爲閨中人。守故不要新。夢啼漬花枕。覺淚濕羅巾。獨眠真自難。重衾猶覺寒。愈憶凝脂暖。彌想橫陳權。行驅金絡騎。歸就城南端。城南稍有期。想子亦勞思。羅襦久應罷。花釵堪更治。新妝莫點黛。余還自畫眉。

共內人夜坐守歲

徐君倩

歡多情未極。賞至莫停杯。酒中挑喜子。粽裏覓楊梅。簾開風入帳。燭盡炭成灰。勿疑鬢釵重。爲待曉光來。

初春攜內人行戲

梳飾多今世。衣著一時新。草短猶通屣。梅香漸著人。樹斜牽錦帔。風橫入紅綸。滿酌蘭英酒。對此得娛神。

南苑看遊者

鮑泉

洛陽小苑地。車馬盛經過。綠溝駐行幘。榜柳轉鳴珂。履高含響珮。襪輕半隱羅。浮雲無處所。何用轉橫波。

落日看還

妖姬競早春。上苑逐名辰。落輕變水色。霞濃掩日輪。雕甍斜落影。畫扇拂遊塵。衣香遙已度。衫紅遠更新。誰家蕩舟妾。何處織縑人。

敬酬劉長史詠名士悅傾城

劉綬

不信巫山女。不信洛川神。何關別有物。還是傾城人。經共陳王戲。曾與宋家隣。未嫁先名玉。來時本姓秦。粉光猶似面。朱色不勝脣。遙見疑花發。聞香知異春。釵長逐鬢髮。袂小稱腰身。夜夜言嬌盡。日日態還新。工傾苟奉倩。能迷石季倫。上客徒留目。不見正橫陳。

雜詠和湘東王三首

寒閨

別後春池異。荷盡欲生水。箱中剪尺冷。臺上面脂凝。纖腰轉無力。寒衣恐不勝。

秋夜

樓上起秋風。絕望秋閨中。燭溜花行滿。香燃燄欲空。徒交兩行淚。俱浮妝上紅。

冬宵

不堪寒夜久。夜夜守空牀。衣裾逐坐攝。釵影近燈長。無憐四幅錦。何須辟惡香。

和陰梁州雜怨

鄧鏗

別離雖未久。遂如長別離。叢桂頻銷葉。庭樹幾攀枝。君言妾貌改。妾畏君心移。終須一相見。併得兩相知。

奉和夜聽妓聲

燭華似明月。鬢影勝飛橋。妓兒齊鄭舞。爭妍學楚腰。新歌自作曲。舊瑟不須調。衆中俱不笑。座上莫相撩。

奉和世子春情一首

甄固

昨晚寒簾望。初逢雙燕歸。今朝見桃李。不管數花飛。已愁春欲度。無復寄芳菲。

奉和詠舞

庾信

洞房花燭明。燕餘雙舞輕。頓履隨疎節。低鬟逐上聲。半轉行初進。衫飄曲未成。鸞迴鏡欲滿。鵲顧市應傾。已曾天上學。詎似世中生。

七夕

牽牛遙映水。織女正登車。星橋通漢使。機石逐仙槎。隔河相望近。經秋離別賒。愁將今夕恨。復著明年花。

仰和何僕射還宅懷故

紫閣旦朝罷。中臺文奏稀。無復千金笑。徒勞五日歸。步檐朝未掃。蘭房晝掩扉。浩生理曲處。網積廻文機。故瑟餘絃斷。歌梁秋燕飛。朝雲雖可望。夜帳定難依。願憑甘露入。方假慧燈輝。寧知洛城晚。還淚獨霑衣。

萬山見采桑人

劉遵

倡妾不勝愁。結束下青樓。逐伴西蠶路。相攜東陌頭。葉盡時移樹。枝高乍易鉤。絲繩挂且脫。金籠寫復收。蠶飢日已暮。詎爲使君留。

見人織聊爲之詠

織織運玉指。脉脉正蛾眉。振蹻開交縷。停梭續斷絲。檐花照初月。洞戶未垂帷。弄機行掩淚。翻令織素遲。

秋聞

螢飛綺窗外。妾思霍將軍。燈前量獸錦。簷下織花紋。墜露如輕雨。長河似薄雲。秋還百種事。依成未暇薰。

鼓吹曲折楊柳

高樓十載別。楊柳擢絲枝。摘葉驚開駛。攀條恨久離。年年阻音信。月月減容儀。春來誰不望。相思君自知。

建興苑

紀少瑜

丹陵抱天邑。紫淵更上林。銀臺懸百仞。玉樹起千尋。水流冠蓋影。風揚歌吹音。詩囑憐拾翠。願武惜遺簪。日落庭花轉。方幘屢移陰。終言樂未極。不道愛黃金。

擬吳均體應教

庭樹發春暉。遊人競下機。卻匣擊歌扇。開箱擇舞衣。桑萎不復惜。看光遽將夕。自有專城居。空持迷上客。

春日

愁人試出牖。春色定無窮。參差依網日。澹蕩入簾風。落花還繞樹。輕飛去隱空。徒令玉筯迹。雙垂明鏡中。

春日

聞人情

高臺動春色。清池照日華。綠葵向光轉。翠柳逐風斜。林有驚心鳥。園多奪目花。相與咸知節。款子獨離家。行人今不返。何勞空折麻。

走筆戲書應令

徐孝穆

此日乍殷勤。相嫌不如春。今宵花燭淚。非是夜迎人。舞席秋來卷。歌筵無數塵。曾經新代故。那惡故迎新。片月窺花簾。輕寒入帳巾。秋來應瘦盡。偏自著腰身。

奉和詠舞

十五屬平陽。因來入建章。主家能教舞。城中巧且妝。低鬟向綺席。舉袖拂花黃。

燭送窗邊影。衫傳鈴裏香。當關好留客。故作舞衣長。

和王舍人送客未還閨中有望

倡人歌吹罷。對鏡覽紅顏。拭粉留花稱。除釵作小鬟。綺燈停不滅。高飛掩未關。良人在何處。惟見月光還。

爲羊兗州家人答餉鏡

信來贈寶鏡。亭亭似圓月。鏡久自踰明。人久情踰歇。取鏡掛空臺。於今莫復開。不見孤鸞鳥。亡魂何處來。

春閨怨

吳孜

玉關信使斷。借問不相諳。春光太無意。窺窗來見參。久與光音絕。忽值日東南。柳枝皆鬪燕。桑葉復催蠶。物色頓如此。嬌居自不堪。

詠溧井得金釵

湯僧濟

昔日倡家女。摘花露井邊。摘花還自插。照井還自憐。窺窺終不罷。笑笑自成妍。寶釵於此落。從來不憶年。翠羽成泥去。金色尙如先。此人今不在。此物今空傳。

和婕妤怨

徐悱妻劉氏

日落應門閉。愁思百端生。況復昭陽近。風傳歌吹聲。寵移終不恨。讒枉太無情。

只言爭分理。非妬舞腰輕。

和昭君怨

王叔英妻劉氏

一生竟何定。萬事良難保。丹青失舊圖。玉匣成秋草。相接辭關淚。至今猶未燥。

春思

蕭子雲

春風蕩羅帳。餘落落鏡奩。池荷正捲葉。庭柳復垂簷。竹栢君自改。團扇妾方嫌。

春宵

蕭子暉

夜夜妾偏棲。百花含露低。蟲聲遶春岸。月色思空閨。傳語長安驛。辛苦寄遼西。

春望古意

蕭子範

光景斜漢宮。橫橋照彩虹。春情寄柳色。鳥語出梅中。氛氳闔裏思。逶迤水上風。

秋思

蕭愨

清波收潦日。華林鳴籟初。芙蓉露下落。楊柳月中疎。燕韓湘綺被。趙帶流黃裾。相思阻音信。結夢感離居。

閨情二首

王筠

北斗行欲沒。東方稍已稀。晨雞初振羽。曉露方霑衣。錦衾徒有設。蘭約果相違。誰忍開朝鏡。羞恨掩空扉。

【二】

月出宵將半。星流曉未央。空閨易成響。虛室自生光。嬌羞悅入夢。猶言君在傍。有所思

丹墀生細草。紫殿納輕陰。曖曖巫山遠。悠悠湘水深。徒歌鹿盧劍。空貽瑋瑁簪。

望君終不見。屑淚且長吟。

三婦豔

大婦留芳褥。中婦對華燭。小婦獨無事。當軒理清曲。丈人且安臥。豔歌方斷續。

詠燈擎

百華耀九枝。鳴鶴映冰池。末光本內照。丹花復外垂。流輝悅嘉客。翻影泣生離。

自銷良不悔。明白願君知。

贈美人

劉孝綽

巫山薦枕日。洛浦獻珠時。一遇便如此。寧關先有期。幸非使君問。莫作秦羅辭。

夜長眠復坐。誰知闔斂眉。欲寄同花燭。為照遙相思。

古意

燕趙多佳麗。白日照紅妝。蕩子十年別。羅衣雙帶長。春樓怨難守。玉階空自傷。對此歸飛燕。銜泥遠曲房。差池入綺幕。上下傍雕梁。故居尤可念。故人安可忘。相思昏望絕。宿昔夢容光。魂交忽在御。轉側定他鄉。徒然居枕席。誰與同衣裳。空使蘭膏夜。炯炯對繁霜。

春宵

春宵猶自長。春心非一傷。月帶園樓影。風飄花樹香。誰能對雙燕。瞑暝守空牀。

冬曉

冬曉風正寒。偏念客衣單。臨妝罷鉛黛。含淚剪綾紈。寄語龍城下。詎知書信難。

三婦豔

大婦縫羅裙。中婦料繡文。惟餘最小婦。窈窕舞昭君。丈人慎勿去。聽我駐浮雲。

閨怨

劉孝儀

本無金屋寵。長作玉階悲。一乖西北麗。甯復城南期。永巷愁無盡。應門閉有時。空勞織素巧。徒為團扇辭。匡牀終不共。何由橫自私。

奉和逐涼詩

劉孝威

鐘鳴夜未央。避暑起徬徨。長河似曳素。明星若散璫。倚巖欣石冷。臨池愛水涼。月纖張敞畫。荷妖韓壽香。對此遊清夜。何勞娛洞房。

塘上行 苦辛篇

蒲生伊何陳。曲中多苦辛。黃金坐銷鑠。白玉遂淄磷。裂衣工毀嫡。掩袖切讒新。嫌成跡易已。愛去理難申。秦雲猶變色。魯日尚迴輪。妾歌已腸斷。君心終未親。

怨

退寵辭金屋。見譴斥甘泉。枕席秋風起。房櫳明月懸。獨避窗中影。香迴爐上烟。丹庭斜草徑。素壁點苔錢。歌起蒲生曲。樂奏下山弦。新聲昔廣宴。餘杯今自傳。王嬙向絕漠。宗女入祁連。雁書猶未返。角馬無歸年。昭臺省媵御。曾坂無棄捐。後薪隨復積。前魚誰復憐。

應令詠舞

劉遵

倡女多豔色。入選盡華年。學腕嫌衫重。迴腰覺態妍。情繞陽春吹。影逐相思弦。履度開裾褻。鬟轉匝花鈿。所愁餘曲罷。為欲在君前。

應令詠舞

王訓

新妝本絕世。妙舞亦如仙。傾腰逐韻管。斂衽聽張弦。袖輕風易入。釵重步難前。笑態千金重。衣香十里傳。時時比飛燕。定當誰可憐。

有所思行

庾肩吾

佳人遠于隔。乃在天一方。望望江山阻。悠悠道路長。別前秋葉落。別後春花芳。雷歎一聲響。雨淚忽成行。恨望情無極。傾心還自傷。

隴西行

借問隴西行。何當驅馬征。草合前迷路。雲濃後闌城。寄語幽閨妾。羅袖勿空縈。

和徐主簿望月

樓上徘徊月。窗中愁思人。照雪光偏冷。臨花色轉春。星流時入暈。桂長欲侵輪。願以重光曲。承君歌扇塵。

愛妾換馬

渥水出騰駒。湘川實應圖。來從西北道。去逐東南隅。琴聲悲玉匣。山路泣離燕。似鹿將含笑。千金會不俱。

詠美人

絳樹及西施。俱是好容儀。非關能結束。本自細腰肢。鏡前難並照。相將映綠池。

看妝畏水動。斂袖避風吹。轉手齊裾亂。橫管歷鬢垂。曲中人未取。誰堪白日移。不分他相識。惟聽使君知。

七夕

玉匣卷懸衣。高樓開夜扉。嫦娥隨月落。織女逐星移。離前忿促夜。別後對空機。情語雕陵鶴。填河未可飛。

遠期篇

庾成師

憶別春花飛。已見秋葉稀。淚粉羞明鏡。愁帶減寬衣。得書言未反。夢見道應歸。坐使紅顏歇。獨掩青樓扉。

和湘東王春日

鮑泉

新燕始新歸。新蝶復新飛。新花滿新樹。新月麗新暉。新光新氣早。新望新盈抱。新水新綠浮。新禽新音好。新景自新還。新葉復新攀。新枝雖可結。新愁誰解顏。新思獨氛氳。新知不可聞。新扇如新月。新蓋學新雲。新落連珠淚。新點石榴裙。

詠薔薇

經植宜春館。霞靡上蘭宮。片舒猶帶紫。半卷未全紅。葉疎難蔽日。花密易傷風。佳麗新妝罷。含笑折芳叢。

寒閨詩

行人消息斷。空閨靜復寒。風急朝機燥。鏡闌晚妝難。從來腰自小。衣帶就中寬。

閨中月夜

閨中日已暮。樓上月初華。樹陰綠砌上。牕影向牀斜。開帷傷隻鳳。吹鏡惜落花。

誰能當此夕。獨處類倡家。

侯司空宅詠妓

佳人徧綺席。妙曲動鵝弦。樓似陽臺上。池如洛浦邊。思啼歌扇後。花落舞衫前。

翠柳將斜日。偏照晚妝鮮。

侍宴賦得竹

夾池一叢竹。青翠不驚寒。葉醞宜城酒。皮裁薛縣冠。湘川染別淚。衡嶺拂仙壇。

欲見葳蕤色。當來兔苑看。

和樊晉侯傷妾

畫梁朝日盡。芳樹落花辭。忽以千金笑。長作九原悲。鏡前塵素粉。機上綳紅絲。

戶餘雙燕入。牀有一空帷。名香不可得。何見反魂時。

南征閨怨

湘水舊言深。征客理難尋。獨愁無處道。長悲不自禁。逢人憎解佩。幽居懶聽音。

惟當有夜鶻。南飛似妾心。

班婕妤怨

栢梁新寵盛。長信昔恩傾。誰謂詩書巧。翻爲歌扇輕。花月分牕進。苔草共階生。

妾淚衫前滿。單眠夢裏驚。可惜逢秋扇。何用合歡名。

賦得蕩子行未歸

坐樓愁回望。息意不思春。無奈園中柳。寒時已報人。捉梳羞理鬢。挑朱懶向唇。

何當上路晚。風吹還騎塵。

詠雪

飄飄千里雪。倏忽度龍沙。從雲合且散。因風卷復斜。拂草如連蝶。落樹似飛花。

若贈離居者。折以代瑤華。

金石樂

前溪流碧水。後渚映晴天。登臺臨寶鏡。開窗對綺錢。玉顏光粉色。羅袖拂金鈿。

春風散輕蝶。明月映新蓮。摘花競時侶。催指及芳年。

閨怨

陸罩

自憐斷帶日。偏恨分釵時。留步惜餘影。含意結離眉。徒知今異昔。空使怨成思。欲以別離意。獨向蘼蕪悲。

昭君辭

庚信

拭淚辭戚里。回顧望昭陽。鏡失菱花影。釵除却月梁。圍腰無一尺。垂淚有千行。綠衫承馬汗。紅袖拂秋霜。別曲真多恨。哀弦須更張。

明君辭

斂眉光祿塞。遙望夫人城。片片紅顏落。雙雙淚眼生。冰河牽馬渡。雪路把鞍行。胡風入骨冷。漢月照心明。方調琴上曲。變入胡笳聲。

結客少年場行

結客少年場。春風滿路香。歌撩李都尉。果擲潘河陽。折花遙勸酒。就水更移牀。今年喜夫婿。新拜羽林郎。定知劉碧玉。偷嫁汝南王。

對酒

春水望桃花。春洲藉芳杜。琴從綠珠借。酒就文君取。牽馬向渭橋。日落山頭晡。山簡接羅倒。王戎如意舞。箏鳴金谷園。笛韻平陽塢。人生一百年。歡笑惟三五。何處覓錢刀。求爲洛陽賈。

看妓

綠珠歌扇薄。飛燕舞衫長。琴曲隨流水。簫聲逐鳳凰。膺風蟬鬢亂。映日鳳釵光。懸知曲不誤。無事顧周郎。

春日題屏風

昨夜鳥聲春。鶯鳴動四鄰。今朝花樹下。定有詠花人。流星浮酒泛。粟瑱逐梧脣。何勞一片雨。喚作陽臺神。

玉臺新詠卷九

陳尚書左僕射太子少傅東海徐陵孝穆編

歌詞二首

東飛伯勞西飛燕。黃姑織女時相見。誰家女兒對門居。開華發色照里閭。南窓北牖挂明光。羅幃綺帳脂粉香。女兒年幾十五六。窈窕無雙顏如玉。三春已暮花從風。空留可憐與誰同。

【二】

河中之水向東流。洛陽女兒名莫愁。莫愁十三能織綺。十四採桑南陌頭。十五嫁爲盧家婦。十六生兒字阿侯。盧家蘭室桂爲梁。中有鬱金蘇合香。頭上金釵十二行。足下絲履五文章。珊瑚掛鏡爛生光。平頭奴子提履箱。人生富貴何所望。恨不嫁與東家王。

越人歌一首

楚鄂君子脩者乘青翰之舟。張翠羽之蓋榜棹。越人悅之。權櫂而越歌。以感鄂君。歡然舉繡被而覆之。其辭曰。

今夕何夕兮。舉舟中流。今日何日兮。得與王子同舟。蒙羞被好兮。不讐詬恥。心幾頑而不絕兮。得知王子。山有木兮木有枝。心悅君兮君不知。

琴歌二首并序

司馬相如

司馬相如遊臨邛。富人卓王孫有女文君。新寡。竊於壁間窺之。相如鼓琴歌以挑之曰。鳳兮鳳兮歸故鄉。遊遊四海求其凰。時未通遇無所將。何悟今夕升斯堂。有豔淑女在此方。室邇人遐獨我傷。何緣交頸爲鴛鴦。

【二】

皇兮皇兮從我棲。得託字尾永爲妃。交情通體心和諧。中夜相從知者誰。雙興俱

起翻高飛。無感我心使予悲。

歌詩一首并序

烏孫公主

漢武元封中。以江都王女細君爲公主。嫁與烏孫昆彌。至國而自治室宮。歲時一再會。言語不通。公主悲愁。自作歌曰。

吾家之嫁我。今天一方。遠託異國兮烏孫王。穹廬爲室兮氈爲牆。肉爲食兮酪爲漿。常思漢土兮心內傷。願爲飛黃鶴兮還故鄉。

童謠歌二首并序

(漢成帝時)

漢成帝趙皇后名飛燕。寵幸冠於後宮。常從帝出入。時富平侯張放亦稱倭幸。爲期門之遊。故歌云。張公子時相見也。飛燕嬌妬。成帝無子。故云。啄王孫。華而不實。王莽自云。代漢德者土色尚黃。故云。黃雀飛燕。竟以廢死。故爲人所憐者也。燕燕尾殿殿。張公子時相見。木門倉琅根。燕飛來啄皇孫。

【二】

桂樹華不實。黃雀巢其顛。昔爲人所羨。今爲人所憐。

童謠歌二首

(漢桓帝時)

大麥青青小麥枯。誰當穫者婦與姑。丈夫何在西擊胡。吏買馬君具車。請爲諸君

鼓嚙胡。

【一】

城上烏尾畢逋。公爲吏兒爲徒。一徒死百乘車。車班班至河閒。至河閒。姪女能數錢。錢爲室金爲堂。戶上春臘梁。臘梁之下有懸鼓。我欲擊之丞相怒。

四愁詩四首

張衡

張衡不樂。久處機密。陽嘉中。出爲河閒相。時國王驕奢。不遵法度。又多豪右并兼之家。衡下車治威嚴。能內察屬縣。姦猾行巧劫。皆密知名。下吏收捕。盡服擒諸豪俠。游客悉惶懼。逃出境。郡中大治。爭訟息。獄無繫囚。時天下漸弊。鬱鬱不得志。爲四愁詩。屈原以美人爲君子。以珍寶爲仁義。以水深雪氣爲小人。思以道術相報。貽於時君。而懼讒邪不得以通。其辭曰。

一思曰。我所思兮在太山。欲往從之梁甫艱。側身東望涕霑翰。美人贈我金錯刀。何以報之英瓊瑤。路遠莫致倚逍遙。何爲懷憂心煩勞。

【二】

二思曰。我所思兮在桂林。欲往從之湘水深。側身南望涕霑襟。美人贈我琴琅玕。何以報之雙玉盤。路遠莫致倚惆悵。何爲懷憂心煩怏。

【三】

三思曰。我所思兮在漢陽。欲往從之隴阪長。側身西望涕霑裳。美人贈我貂襜褕。何以報之明月珠。路遠莫致倚躊躇。何爲懷憂心煩紆。

【四】

四思曰。我所思兮在雁門。欲往從之雪紛紛。側身北望涕霑巾。美人贈我錦繡段。何以報之青玉案。路遠莫致倚增歎。何爲懷憂心煩惋。

贈婦詩一首四首

秦嘉

曖曖白日。引曜西傾。啾啾雞雀。羣飛赴楹。皎皎明月。煌煌列星。嚴霜悽愴。飛雪覆庭。寂寂獨居。寥寥空室。飄飄帷帳。熒熒華燭。爾不是居。帷帳焉施。爾不是照。華燭何爲。

樂府燕歌行二首

魏文帝

秋風蕭瑟天氣涼。草木搖落露爲霜。羣燕辭歸雁南翔。念君客遊多思腸。慊慊思歸戀故鄉。君爲淹留寄他方。賤妾覺覺守空房。憂來思君不可忘。不覺淚下霑衣裳。援琴鳴弦發清商。短歌微吟不能長。明月皎皎照我牀。星漢西流夜未央。牽牛織女遙相望。爾獨何幸限河梁。

【一】

別日何易會日難。山川悠遠路漫漫。鬱陶思君未敢言。寄聲浮雲往不還。涕零兩
面毀容顏。誰能懷憂獨不歎。展詩清歌聊自寬。樂往哀來摧肺肝。耿耿伏枕不能
眠。披衣出戶步東西。仰看星月觀雲間。飛鶴晨鳴聲可憐。留連顧懷不能存。

樂府妾薄命行一首六言

曹植

日月既是西藏。更會蘭室洞房。花鏡步障舒光。皎若日出扶桑。促樽合坐行觴。
主人起舞娑盤。能者冗觸別端。騰觴飛爵闌干。同量等色齊顏。任意交屬所歡。
朱紅發外形蘭。袖隨禮容極情。妙舞仙仙體輕。裳解履遺絕纓。俛仰笑喧無呈。
覽持佳人玉顏。齊接金爵翠盤。手形羅袖良難。腕弱不勝珠環。坐者歎息舒顏。
御巾裏粉君傍。中有霍納都梁。雞舌五味雜香。進者何人齊姜。恩重愛深難忘。
召延親好宴私。但歌枯來何遲。客賦既醉言歸。主人稱露未晞。

擬北樂府三首

傅元

歷九秋篇 董逃行

歷九秋兮三春。遺貴客兮遠賓。顧多君心所親。乃命妙妓才人。炳若日月星辰。
序金罍兮玉觴。賓主遞起雁行。杯若飛電絕光。交觴接卮結裳。慷慨歡笑萬方。其一

奏新詩兮夫君。爛然虎變龍文。渾如天地未分。齊謳楚舞紛紛。歌聲上激青雲。其二

窮八音兮異倫。奇聲靡靡每新。微笑素齒丹脣。逸響飛薄梁塵。精爽眇眇入神。其三

坐咸醉兮沾歡。引樽促席臨軒。進爵獻壽翻翻。千秋要君一言。願愛不移若山。其四

君恩愛兮不竭。譬若朝日夕月。此景萬里不絕。長保初醮結髮。何憂坐生胡越。其五

攜弱手兮金環。上遊飛閣雲間。穆若鴛鴦雙鸞。還幸蘭房自安。娛心極樂難原。其六

樂既極兮多懷。盛時忽逝若頽。衰暮革御影迴。春榮隨風飄摧。感物動心增哀。其七

妾受命兮孤虛。男兒墮地稱姝。女弱難存若無。骨肉至親更疎。奉事他人託軀。其八

君如影兮隨形。賤妾如水浮萍。明月不能常盈。誰能無根保榮。良時冉冉代征。其九

願繡領兮含輝。皎日迴光側微。朱華忽爾漸衰。影欲捨形高飛。誰言往恩可追。其十

齊與麥兮夏零。蘭桂踐霜逾馨。祿命懸天難明。委心結意丹青。何憂君心中傾。其十一

車遙遙篇

車遙遙兮馬洋洋。追思君兮不可忘。君安遊兮西入秦。願為影兮隨君身。君在陰
兮影不見。君依光兮妾所願。

燕人美篇

燕人美兮趙女佳。其室則邇兮限層崖。雲為車兮風為馬。玉在山兮蘭在野。雲無

期兮風有止。思心多端兮誰能理。

擬四愁詩四首并序

昔張平子作四愁詩體小而俗七言類也聊擬而作之名曰擬四愁詩其詞曰

我所思兮在瀛洲。願爲雙鶴戲中流。牽牛織女期在秋。山高水深路無由。慙余不
遘嬰股憂。佳人貽我明月珠。何以要之比目魚。海廣無舟恨勞劬。寄言飛龍天馬
駒。風起雲披飛龍逝。驚波滔天馬不儼。何爲多念心憂世。

【二】

我所思兮在珠崖。願爲比翼浮清池。剛柔合德配二儀。形影一絕長別離。慙余不
遘情如攜。佳人貽我蘭蕙草。何以要之同心鳥。火熱水深憂盈抱。申以瓊瑤夜光
寶。卞和既沒玉不察。存若流光忽電滅。何爲多念獨蘊結。

【三】

我所思兮在崑山。願爲鹿麇窺虞淵。日月廻曜照景天。參辰曠隔會無緣。慙余不
遘罹百艱。佳人貽我蘇合香。何以要之翠鴛鴦。縣度弱水川無梁。申以錦衣文繡
裳。三光騁邁景不留。鮮矣民生忽如浮。何爲多念祇自愁。

【四】

我所思兮在朔方。願爲飛鴈俱南翔。煥乎人道著三光。胡越殊心生異鄉。慙余不
遘罹百殃。佳人貽我羽葆纓。何以要之影與形。增水憂結繁華零。申以日月指明
星。星辰有翳日月移。駑馬哀鳴慙不馳。何爲多念徒自虧。

盤中詩一首

蘇伯玉妻

山樹高鳥鳴悲。泉水深鯉魚肥。空倉雀常苦飢。吏人婦會夫稀。出門望見白衣。
謂當是而更非。還入門中心悲。北上堂西入階。急機絞杼聲催。長歎息當語誰。
君有行妾念之。出有日還無期。結巾帶長相思。君忘妾天知之。妾忘君罪當治。
妾有行宜知之。黃者金白者玉。高者山下者谷。姓爲蘇字伯玉。作人才多智謀足。
家居長安身在蜀。何惜馬蹄蹄不數。羊肉千斤酒百斛。令君馬肥麥與粟。今時人
智不足。與其書不能讀。當從中央周四角。

擬四愁詩四首

張載

我所思兮在南巢。欲往從之巫山高。登崖遠望涕泗交。我之懷矣心傷勞。佳人遺
我箇中布。何以贈之流黃素。願因飄風超遠路。終然莫致增想慕。

【二】

我所思兮在朔涓。欲往從之白雪霏。登崖永眺涕泗積。我之懷矣心傷悲。佳人遺

我雲中翮。何以贈之連城璧。願因歸鴻起遐隔。終然莫致增永積。

【三】

我所思兮在隴原。欲往從之隔太山。登崖遠望涕泗連。我之懷矣心傷煩。佳人遺我雙角端。何以贈之賺玉環。願因行雲超重巒。終然莫致增永歎。

【四】

我所思兮在營州。往欲從之路阻脩。登崖遠望涕泗流。我之懷矣心傷憂。佳人遺我綠綺琴。何以贈之雙南金。願因深波超重深。終然莫致增永吟。

童謠歌一首

(晉惠帝時)

鄴中女子莫千妖。前至三月抱胡腰。

樂府燕歌行一首

陸機

四時代序逝不追。寒風習習落葉飛。蟋蟀在堂露盈階。念君遠遊常苦悲。君何緬然久不歸。賤妾悠悠心無違。白日既沒明鏡輝。寒禽赴林匹鳥棲。雙鳩關關宿河湄。憂來感物涕不晞。非君之念思爲誰。別日何早會何遲。

代淮南王二首

鮑照

淮南王好長生。服食鍊氣讀仙經。琉璃藥盃牙作盤。金鼎玉匕合神丹。合神丹戲

紫房。紫房綵女弄明璫。鸞歌鳳舞斷君腸。朱城九門門九開。願逐明月入君懷。入君懷。結君珮。怨君恨。君恃君愛。築城思堅劍思利。同盛同衰莫相棄。

代白紵歌辭二首

朱唇動素腕舉。洛陽少童邯鄲女。古稱綠水今白紵。催弦急管爲君舞。窮秋九月荷葉黃。北風驅鴈天雨霜。夜長酒多樂未央。

【一】

春風澹蕩使思多。天色淨綠氣妍和。桃含紅萼蘭紫芽。朝日灼燦發園花。卷橫結。韓羅玉筵。齊謳秦吹盧女弦。千金顧笑買芳年。

行路難四首

中庭五株桃。一株先作花。陽春妖冶二三月。從風簸揚落西家。西家思婦見之惋。零淚霑衣撫心歎。初送我君出戶時。何言淹留節迴換。牀席生塵明鏡垢。纖腰瘦削髮蓬亂。人生不得恆稱意。惆悵徒倚至夜半。

【二】

劉藥染黃絲。黃絲歷亂不可治。昔我與君始相值。爾時自謂可君意。結帶與我言。死生好惡不相置。今日見我顏色衰。意中錯漠與先異。還君玉釵瑋瑋管。不忍見

之益悲思。

【三】

奉君金卮之酒盃。瑤瑁玉匣之雕琴。七彩芙蓉之羽帳。九華葡萄之錦衾。紅顏零落歲將暮。寒花宛轉時欲沉。願君裁悲且減思。聽我抵節行路吟。不見栢梁銅雀上。甯聞古時清吹音。

【四】

璿闈玉墀上椒閣。文窓繡戶垂綺幙。中有一人字金蘭。被服纖羅蘊芳蕋。春燕差池風散梅。開帷對影弄禽爵。含歌攬淚不能言。人生幾時得爲樂。甯作野中雙飛鳥。不願雲間別翅鶴。

行路難一首

釋寶月

君不見孤雁關外發。酸嘶度揚越。空城客子心腸斷。幽閨思婦氣欲絕。凝霜夜下拂羅衣。浮雲中斷開明月。夜夜遙遙徒相思。年年望望情不歇。寄我匣中青銅鏡。情人爲君除白髮。行路難。行路難。夜聞南城漢使度。使我流淚憶長安。

李夫人及貴人歌一首

陸厥

屬車挂席塵。豹尾香煙滅。彤殿向藤蕪。青蒲復萎絕。坐萎絕對藤蕪。臨丹階泣。

椒塗。寡鶴羈雌飛且上。雕梁翠壁網蜘蛛。洞房明月夜。對此淚如珠。

八詠二首

沈約

登臺望秋月

望秋月。秋月光如練。照耀三爵臺。徘徊九華殿。九華瑤瑁梁。華榭與璧璫。以茲雕麗色。持照明月光。凝華入黼帳。清輝懸洞房。先過飛燕戶。卻照班姬牀。桂宮裏裏落桂枝。露寒淒淒凝白露。上林晚葉颯颯鳴。雁門早鴻離離度。淇秀質兮似規。委清光兮如素。照愁軒之蓬影。映金階之輕步。居人臨此笑以歌。別客對之傷且慕。經衰圃映寒叢。凝清夜帶秋風。隨庭雪以借素。與池荷而共紅。臨玉墀之皎皎。含霜靄之濛濛。轉天衢而徒步。轢長漢而飛空。隱巖崖而半出。隔帷幌而纔通。散朱庭之奕奕。入青瑣而玲瓏。閑塔悲寡鶴。沙洲怨別鴻。昭姬泣胡殿。明君思漢宮。余亦何爲者。淹留此山東。

會圃臨春風

臨春風。春風起春樹。遊絲暖如網。落花雰似霧。先泛天淵池。還過細柳枝。蝶逢飛搖颺。燕值羽差池。揚桂旆動芝蓋。開燕裾吹趙帶。趙帶飛參差。燕裾合且離。廻簪復轉黛。願步惜容儀。容儀已炤灼。春風復廻薄。氛氳桃李花。青柑含

素夢。既爲風所開。復爲風所落。搖綠帶抗紫莖。舞春雪雜流鶯。曲房開兮金鋪響。金鋪響兮妾思驚。梧桐未陰。洪川如碧。迎行雨於高唐。送歸鴻於碣石。經洞房響素紈。感幽閨思韓翃。想芳園兮可以遊。念蘭麝兮漸可摘。拂明鏡之冬塵。解羅衣之秋裳。既鏗鏘以動珮。又氤氳而流麝。始搖蕩以入閨。終徘徊而緣隙。鳴珠簾於繡戶。散芳塵於綺席。是時恨思婦。安能久行役。佳人不在茲。春風爲誰惜。

春日白紵曲一首

蘭葉參差桃半紅。飛芳舞縠戲春風。翡翠羣飛飛不息。願在雲閒長比翼。

秋日白紵曲一首

白露欲凝草已黃。金瑠玉桂響洞房。雙心一影俱廻翔。吐情寄君君莫忘。

行路難二首

吳均

君不見上林苑中客。冰羅霧縠象牙席。盡是得意忘言者。探腸見膽無所惜。白酒甜鹽甘如乳。綠腸皎鏡華如碧。少年持名不肯嘗。安知白駒應過隙。博山鑪中百和香。鬱金蘇合及都梁。逶迤好氣佳容貌。經過青瑣歷紫房。已入中山陰后帳。復上皇帝班姬牀。班姬失寵顏不開。奉帚供養長信臺。日暮耿耿不能寐。秋風切

切四而來。玉階行路生細草。金爐香炭變成灰。得意失意須臾頃。非君方寸逆所裁。

【二】

洞庭水上一株桐。經霜觸浪困嚴風。昔時榴心耀白日。今且臥死黃沙中。洛陽名工見咨嗟。一剪一刻作琵琶。白璧規心學明月。珊瑚映面作風花。帝王見賞不見忘。提攜把握登建章。掩抑摧藏張女彈。殷勤促柱楚明光。年年月月對君子。遙遙夜夜宿未央。未央綵女棄鳴篋。爭見拂拭生光儀。茱萸錦衣玉作匣。安念昔日枯樹枝。不學衡山南嶺桂。至今千年猶未知。

擬樂府長相思二首

張率

長相思久離別。美人之遠如雨絕。獨延佇心中結。望雲去去遠。望鳥飛飛滅。空望終若斯。珠淚不能雪。

【三】

長相思久別離。所思何在若天垂。鬱陶相望不得知。玉階月夕映羅帷。羅帷風夜吹。長思不能寢。坐望天河移。

白紵歌詞二首

歌兒流唱聲欲清。舞女趨節體自輕。歌舞並妙會人情。依弦度曲婉盈盈。揚蛾爲

態誰目成。

【二】

妙聲屢唱輕體飛。流津染面散芳菲。俱動齊息不相違。令彼嘉客憺忘歸。時久甞夜明星稀。

行路難二首

費昶

君不見長安客舍門。倡家少女名桃根。貧窮夜紡無燈燭。何言一朝奉至尊。至尊離宮百餘處。千門萬戶不知曙。唯聞啞啞城上烏。玉欄金井牽轆轤。丹梁翠柱飛屏蘇。香薪桂火炊雕胡。當年翻覆無常定。薄命爲女何必麤。

【二】

君不見人生百年如流電。心中坎壈。君不見我昔初入椒房時。詎減班姬與飛燕。朝踰金梯上鳳樓。暮下瓊鉤息鸞殿。栢臺晝夜香。錦帳自飄颺。笙歌膝上吹。琵琶陌上桑。過蒙恩所賜。餘光曲霑被。既逢陰后不自專。復值程姬有所避。黃河千年始一清。微軀再逢永無議。蛾眉偃月徒自妍。傅粉施朱欲誰爲。不如天淵水中鳥。雙去雙歸長比翅。

烏棲曲四首

皇太子聖製

芙蓉作船絲作絳。北斗橫天月將落。採蓮渡頭礙黃河。郎今欲渡畏風波。

【二】

浮雲似帳月成鉤。那能夜夜南陌頭。宜城醞酒今行熟。停鞍繫馬暫棲宿。

【三】

青牛丹穀七香車。可憐今夜宿倡家。倡家高樹烏欲棲。羅幃翠帳向君低。

【四】

織成屏風銀屈膝。朱唇玉面鏡前出。相看氣息望君憐。誰能含羞不自前。

雜句從軍行一首

雲中亭障羽檄驚。甘泉烽火通夜明。貳師將軍新築營。嫖姚校尉初出征。復有山西將。絕世受雄名。三門應遁甲。五壘學神兵。白雲隨陣色。蒼山答鼓聲。遞進觀鵝翼。參差睹雁行。先平小月陣。卻滅大宛城。善馬還長樂。黃金付水衡。小婦趙人能鼓瑟。侍婢初笄解鄭聲。庭前桃花飛已合。必應紅妝起見迎。

和蕭侍中子顯春別四首

別觀葡萄帶實垂。江南豈惹生連枝。無情無意猶如此。有心有恨徒別離。

【二】

蜘蛛作絲滿帳中。芳草結葉當行路。紅臉脉脉一生啼。黃鳥飛飛有時度。故人雖故昔經新。新人雖新復應故。

【三】

可憐淮水去來潮。春堤楊柳覆河橋。淚迹未慘詎終朝。行聞玉珮已相要。

【四】

桃紅李白若朝妝。羞持顚顚比新楊。不惜暫住君前死。愁無西國更生香。

雜句春情一首

蝶黃花紫燕相追。楊低柳合路塵飛。已見垂鈎挂綠樹。誠知洪水霑羅衣。兩童夾車問不已。五馬城南猶未歸。鶯啼春欲駛。無爲空掩扉。

擬古一首

窺紅對鏡斂雙眉。含愁拭淚坐相思。念人一去許多時。眼語笑靨迎來情。心懷心想甚分明。憶人不忍語。銜恨獨吞聲。

倡樓怨節一首六首

朝日斜來照戶。春鳥爭飛出林。片光片影皆麗。一聲一轉煎心。上林紛紛花落。洪水漠漠沿浮。年馳節流易盡。何爲忍憶含羞。

春別應令四首

湘東王

昆明夜月光如練。上林朝花色如霞。花朝月夜動春心。誰忍相思不相見。

【二】

試看機上交龍錦。還瞻庭裏合歡枝。映日通風影朱幔。飄花拂葉度金池。不聞離人當重合。惟悲合罷會成離。

【三】

門前楊柳亂如絲。直置佳人不_二自持_一。適言新作裂紈詩。誰悟今成織素辭。

【四】

日暮徒倚渭橋西。正見涼月與雲齊。若使月光無近遠。應照離人今夜啼。

春別四首

蕭子顯

翻鸞度燕雙比翼。楊柳千條共一色。但看陌上攜手歸。誰能對此空中憶。

【二】

幽宮積草自芳菲。黃鳥芳樹情相依。爭風競日常聞響。重花疊葉不通飛。當知此時動妾思。慙使羅袂拂君衣。

【三】

江東大道日華春，垂楊挂柳拂輕塵。洪水昨送淚沾巾，紅妝宿昔已應新。

【四】

銜悲攬涕別心知，桃花李色任風吹。本知人心不似樹，何意人別似花離。

樂府烏樓曲應令二首

握中酒柸瑪瑙鍾，裾邊雜珮琥珀龍。欲持寄君心不惜，共指三星今何夕。

【二】

淚黛紅輕點花色，還欲令人不相識。金壺夜水誰能多，莫持賒用比懸河。

燕歌行

風光遲舞出青蘋，蘭條翠鳥鳴發春。洛陽梨花落如雪，河邊細草細如茵。桐生井底葉交枝，今看無端雙燕離。五重飛樓入河漢，九華閣道暗清池。遙看白馬津上吏，傳道黃龍征戍兒。明月金光徒照妾，浮雲玉葉君不知。思君昔去柳依依，至今八月避暑歸。明珠蠶繭勉登機，鬱金香蘂特香衣。洛陽城頭鷄欲曙，丞相府中鳥未飛。夜夢征人縫狐貂，私憐織婦裁錦綉。吳刀鄭綿絡，寒閨夜被薄。芳年海上水中鳧，日暮寒夜空城雀。

行路難一首

王 筠

千門皆閉夜何央，百憂俱集斷人腸。探揣箱中取刀尺，拂拭機上斷流黃。情人逐情難可恨，復畏邊遠乏衣裳。已縲一繭摧衣縷，復擣百和裏衣香。猶憶去時腰大少，不知今日身短長。襦襜雙心共一抹，相複兩邊作八撮。褰帶雖安不忍縫，開孔裁穿猶未達。胸前卻月兩相連，本照君心不見天。願君分明得此意，勿復流蕩不如先。含悲含怨判不死，封情忍思待明年。

元廣州景仲座見故姬一首

劉 孝 綽

留故夫不峙囑，別待春山上。相看采藤燕。

擬古應教一首

劉 孝 威

雙棲翡翠兩鴛鴦，巫雲落月乍相望。誰家妖冶折花枝，蛾眉暇睇使情移。青鋪綠瑣琉璃屏，瓊筵玉筍金縷衣。美人年幾可十餘，含羞轉笑斂風裾。珠丸出彈不可追，空留可憐持與誰。

別義陽郡二首

徐 君 倩

翔鳳樓遙望與雲浮，歌聲臨樹出。舞影入江流。葉落看村近，天高應向秋。

飾面亭妝成更點星，頰上紅凝淺。眉心黛不青。故留殘粉絮，挂看箔簾釘。

贈答一首

王叔英婦

妝鉛點黛拂輕紅。鳴環動珮出房櫳。看梅復看柳。淚滿春衫中。

古詩題六首

沈約

歲暮感衰草

感衰草。衰草無容色。憔悴荒運中。寒荻不可識。昔時兮春日。昔日兮春風。含華兮瓊實。垂綠兮散紅。氛氳鳩鵲右。照耀望仙東。送歸顧慕泣洪水。嘉客淹留懷上宮。巖陬兮海岸。冰多兮霰積。爛漫兮客根。橫幽兮寓隙。布綿密於寒臯。吐纖疏於危石。既惆悵於君子。倍傷心於行役。露高枝於初旦。霜紅天於始夕。彫芳卉之九衢。賈靈茅之三脊。風急峭道難。秋至客衣單。既傷檐下菊。復悲池上蘭。飄落逐風盡。方知歲早寒。流螢暗明燭。雁聲斷纜續。萎絕長信宮。蕪穢丹墀曲。霜奪莖上紫。風銷葉中綠。山變兮青薇。水折兮平葦。秋鴻兮疎引。寒鳥兮聚飛。逕荒寒草合。桐長舊巖圍。夜漸靡蕪沒。霜露日霑衣。願逐晨征鳥。薄暮共西歸。

霜來悲落桐

悲落桐。落桐早霜露。燕至葉未抽。鴻來枝已素。本出龍門山。長枝仰刺天。上

峰百丈絕。下趾萬尋懸。幽根已盤結。孤枝復危絕。初不照光景。終年負霜雪。自顧無羽儀。不願生曲池。芬芳本自乏。華實無可施。匠者特留盼。王孫少見之。分取生孤楫。徒置北堂陲。宿莖抽晚幹。新葉生故枝。故枝雖遼遠。新葉頗離離。春風一朝至。榮戶坐如斯。自惟良菲薄。君恩徒照灼。願已非嘉樹。空用憑阿閣。願作清廟琴。為舞雙元鶴。薜荔可為裳。文杏堪作梁。勿言草木賤。徒照君末光。末光不徒照。為君含嗽眺。陽柯綠水弦。陰枝苦寒調。厚德非可任。敢不虛其心。若逢陽春至。吐綠照清潯。

夕行聞夜鶴

聞夜鶴。夜鶴叫南池。對此孤明月。臨風振羽儀。伊吾人之菲薄。無賦命之天爵。抱踟促之長懷。隨春冬而哀樂。感海上之驚鳧。傷雲間之離鶴。離鶴昔未離。近發天北垂。忽值疾風起。暫下昆明池。復值冬冰合。水宿非所宜。欲留不可住。欲去飛已疲。勢逐疾風舉。求溫向衡楚。復值南飛鴻。參差共成侶。海上多雲霧。蒼茫失洲嶼。自此別故羣。獨向瀟湘渚。故羣不離散。相依滄海畔。夜止羽相切。晝飛影相亂。刷羽共浮沉。湛澹泛清潯。既不得離別。安知慕侶心。九冬霜雪苦。六翮飛不任。且養凌雲翅。俛仰弄清音。所望浮邱子。旦夕來見尋。

晨征聽曉鴻

聽曉鴻。曉鴻度將旦。跨弱水之微瀾。發成山之遠岸。恍春歸之未幾。驚此歲之云半。出海漲之蒼茫。入雲途之杳漫。無東西之可辨。孰遐邇之能算。微昔見於洲渚。赴秋期於江漢。集勁風於弱軀。負重雪於輕翰。寒谿可以飲。荒阜可以竄。谿水徒自清。微容豈足翫。秋蓬飛兮未極。寒草萎兮無色。楚山高兮杳難度。越水深兮不可測。美明月之馳光。願征禽之騁翼。伊余馬之屢懷。知吾行之未極。夜縣縣而難曉。愁參差而盈臆。望山川悉無似。惟星河猶可識。聞雁夜南飛。客淚夜霑衣。春鴻思暮反。客子方未歸。歲去歡娛盡。年來容貌非。攬枉形雖是。撫臆事多違。青蒲雖長復易解。白雲誠遠詎難依。

解珮去朝市

去朝市。朝市深歸暮。辭北纓而南徂。浮東川而西顧。逢天地之降祥。值日月之重光。伊當仁之菲薄。非余情之信芳。充待詔於金馬。奉高宴於栢梁。觀鬪獸於虎圈。望宵窕於披香。遊西園兮登銅雀。舉青瑤兮眺重陽。講金華兮議宣室。畫武帷兮夕文昌。珮甘泉兮履五柞。贊粉詣兮紱承光。託後車兮侍華輦。遊渤海兮泛清漳。天道有盈缺。寒暑遞炎涼。一朝賣玉琬。眷眷惜餘香。曲池無復處。柱

枝亦鎖亡。清廟徒肅肅。西陵久茫茫。薄暮余多幸。嘉運重來昌。忝稽郡之南尉。典千里之光貴。別北荒於濁河。懸橫橋於清渭。望前軒之早桐。對南階之初卉。非余情之屢傷。寄茲焉兮能慰。眷昔日兮懷哉。日將暮兮歸去來。

披褐守山東

守山東。山東萬嶺鬱青葱。兩溪共一瀉。水潔望如空。岸側青莎被。巖間丹桂叢。上瞻既隱軫。下睇亦溟濛。遠林響咆獸。近樹聒鳴蟲。路帶若溪右。澗吐金華東。萬仞倒危石。百丈注懸叢。掣曳瀉流電。奔飛似白虹。洞井含清氣。漏穴吐飛風。玉寶膏滴瀝。石乳室空籠。峭崿塗彌險。崖岨步纒通。余捨平生之所愛。歎暮年而逢此。願一去而不還。恨鄙衣之未襜。揖林壑之清曠。事氓俗之紛詭。幸帝德之方升。值天網之未毀。既除舊而布新。故化民而俗徙。播趙俗以南徂。扇齊風以東靡。乳雉方可馴。流蝗庶能弭。清心矯世濁。儉改革民侈。秩滿撫白雲。淹留事芝髓。

定情歌

大火流兮草蟲鳴。繁霜降兮草木零。秋爲期兮時已征。思美人兮愁屏營。

白紵曲

玉臺新詠卷九

劉 鑠

六一七

張 衡

遷遷徐動何盈盈。玉腕俱凝若雲行。佳人舉袖耀清蛾。慘慘擢手映鮮羅。狀如明月汎雲河。體如輕風動流波。

北風行

鮑照

北風涼。雨雪雱。洛陽女兒多妍妝。遙豔帷中自悲傷。沉吟不語若爲忘。問君前行何當歸。苦使妾坐自傷悲。虛年去。虛顏衰。情易復。恨難追。

楚明妃曲

湯惠休

瓊臺彩楹。桂寢雕甍。金閨流耀。玉牖含英。香芬幽藹。珠彩珍榮。文羅秋翠。執綺春輕。驂駕鸞鶴。往來仙靈。含姿綿視。微笑相迎。結蘭枝。送目成。當年爲君榮。

白紵歌

少年窈窕舞君前。容華豔豔將欲然。爲君嬌凝復遷延。流目送笑不敢言。長袖拂面心自煎。願君流光及盛年。

秋風歌

秋風嫋嫋入曲房。羅帳含月思心傷。蟋蟀夜鳴斷人腸。夜長思君心飛揚。他人相思君相忘。錦衾瑤席爲誰芳。

歌思引

秋寒依依風過河。白露蕭蕭洞庭波。思君末光光已滅。眇眇悲望如思何。

江南弄

梁武帝

衆花雜色滿上林。舒芳耀綠垂輕陰。連手躑躅舞春心。舞春心。臨歲腴。中人望獨踟躕。

龍笛曲

美人綿眇在雲堂。雕金鏤竹眠玉牀。婉愛寥亮繞紅梁。繞紅梁。流月臺。駐狂風鬱徘徊。

採菱曲

江南稚女珠腕繩。金翠搖首紅顏興。桂棹容與歌採菱。歌採菱。心未怡。翳羅袖望所思。

遊女曲

氛氳蘭麝體芳滑。容色玉耀眉如月。珠珮嫋嫋戲金闕。戲金闕。游紫庭。舞飛閣。歌長生。

朝雲曲

張樂陽臺歌上歌。如寢如興芳曖曖。容光既豔復還沒。復還沒望不來。巫山高心徘徊。

白紵辭二首

朱絲玉柱羅象筵。飛珀促節舞少年。短歌流目未肯壽。含笑一轉私自憐。

【二】

纖腰嫋嫋不任衣。嬌態獨立特爲誰。赴曲君前未忍歸。上聲急調中心飛。

江南曲

昭明太子

枝中水上春併歸。長楊掃地桃花飛。清風吹人光照衣。光照衣景將夕。擲黃金留上客。

龍笛曲

金門玉堂臨水居。一嘔一笑千萬餘。遊子去還願莫疎。願莫疎意何極。雙鴛鴦兩相憶。

採蓮曲

桂楫蘭橈浮碧水。江花玉面兩相似。蓮疎藕折香風起。香風起白日低。採蓮曲使君迷。

東飛伯勞歌二首

簡文帝

翻階蛺蝶戀花情。容華飛燕相逢迎。誰家總角岐路陰。裁紅點翠愁人心。天窓綺井暖徘徊。珠簾玉匣明鏡臺。可憐年幾十三四。工歌巧舞入人意。白日西傾楊柳垂。含情弄態兩相知。

【二】

西飛迷雀東羈雉。倡樓秦女乍相值。誰家妖麗鄰中止。輕妝薄粉光閨里。網戶珠綴曲瓊鉤。芳茵翠被香氣流。少年年幾方三六。含嬌聚態傾人目。餘香落盡坐相催。可憐絕世爲誰媒。

燕歌行

元帝

燕趙佳人本自多。遼東少婦學春歌。黃龍戍北花如錦。元菟城壽月似蛾。如何此時別夫婿。金羈翠眊往交河。還聞入漢去燕營。怨妾心中百恨生。漫漫悠悠天未曉。遙遙夜夜聽寒更。自從異縣同心別。偏恨同時成異節。橫波滿臉萬行啼。翠眉漸斂千重結。并海連天合不開。那堪春日春臺。惟見遠舟如落葉。復看遙舸似行栝。沙汀野鶴嘯羈雌。妾心無趣坐傷離。翻嗟漢使音塵斷。空傷賤妾燕南睡。

烏棲曲四首

沙棠作船桂爲楫。夜渡江南採蓮葉。復值西施新浣紗。共泛江干瞻月華。

【二】

月華似碧星如珮。流影燈明玉堂內。邯鄲九投朝始成。金卮銀椀共君傾。

【三】

交龍成錦圖鳳紋。芙蓉爲帶石榴裙。日下城南兩相忘。月沒參橫掩羅帳。

【四】

七彩隨珠九華玉。蛺蝶爲歌明星曲。蘭房椒閣夜方開。那知步步香風逐。

別詩二首

別罷花枝不共攀。別後書信不相關。欲覓行人寄消息。衣帶潮水暝應還。

【二】

三月桃花含面脂。五月新油好煎澤。莫復臨時不寄人。漫道江中無估客。

趙瑟曲

沈約

邯鄲奇美出文梓。禁弦急調切流徵。元鶴徘徊白雲起。白雲起鬱披香。離復合曲

未央。

秦箏曲

羅袖飄飄拂雕桐。促柱高張散輕宮。迎歌度舞遏歸風。遏歸風止流月。壽萬春歡

無歇。

陽春曲

楊柳垂地燕差池。絨情忍思落容儀。弦傷曲怨心自知。心自知人不見。動羅裙拂

珠殿。

晨風行

范靖妻沈氏

理楫令舟人。停艫息旅薄河津。念君劬勞冒風塵。臨路揮袂淚沾巾。颺流勁澗逝

若飛。山高帆急絕音徽。留子句句獨言歸。中心覺覺將依誰。風彌葉落永離索。

神往形返情錯漠。循帶易緩愁難卻。心之憂兮頗銷鑠。

白紵歌辭三首

張率

秋風蕭條露垂葉。空閨光盡坐愁妾。獨向長夜淚承睫。山高水遠路難涉。望君光

景何時接。

【二】

日暮寒門望所思。風吹庭樹月入帷。涼陰既滿草蟲悲。誰能離別長夜時。流歎不

寢淚如絲。與君之別終何如。